



OPVSCVLA
NONNVLLA

Quorum index est in versa pagina

AD PTOLEMÆVM . GALLIVM
CARDINALEM . COMENSEM
A M P L I S S I M V M



R O M A E .

P R Æ S I D V M . P E R M I S S V

Apud Vincentium Accoltum ; & Valentē Panitium Socios .

M . D . L X X I I I I .



DE . VITAE . ET . STVDIORVM . RA-
TIONE . HOMINIS . SACRIS
INITIATI

DE . RATIONE . SCRIBENDAE . HI-
STORIAE

DE . CAVSSIS . MAGNITVDINIS
TVRCARVM . IMPERII

TYBVRTINVM . HIPPOLYTI . CAR-
DINALIS . FERRARIENSIS

BRVMANVS . SIVE . DE . LAVDIBVS
VRBIS . NEAPOLIS

DE . NONNVLLIS . IN . QVIBVS
PLATO . AB . ARISTOTELE
REPREHENDITVR

DE . NORMA . POLYBIANA

ORATIO . IN . FESTO . DIE . OMNI-
VM . SANCTORVM



PTOLEMAEO . GALLIO
CARDINALI . COMENSI
AMPLISSIMO
VBERTVS . FOLIETA . S. P. D.



V M M A Dignitas, & amplitudo
tua, ac status mei tenuitas faciunt,
PTOLEMAEE . AMPLISSIME
vt non modo tuis in me meritis re-
ferre parem gratiam nullam possim,
sed in hac ipsa qualicumque referenda gratia,
non tam obseruantiae ac studij, quod tibi summum
debeo, onus leuare, quam augere videar. Etenim
in libellis meis, quos amicorum hortatu edere de-
creui, tibi nuncupandis beneficium me potius ac-
cepturum, quam daturum intelligo. neq. enim tibi,
clarissimarumq. virtutum tuarum gloriae, quae excel-
so loco posita ab omnibus conspicitur, quidquam
lucis scriptis meis possum afferre, sed contra haec ipsa
scripta per se obscura futura nomine tuo praefere-
do mire illustrabuntur. quae vero splendidior esse possit
inscriptio, quam nominis tui, cum tu is extiteris, qui
nullis externis opibus subnixus, sed meritum tan-
tum tuorum gradibus ex priuata fortuna ad altissi-
mum istum honoris & auctoritatis locum conscen-
deris,

deris, cuiusq. eximia & præstātes virtutes, in primis
vero singularis prudentia ita enituerint, vt non mo-
do Pius Quartus te in Senatum legerit, atq. ad inte-
riora cōsilia perpetuo abhibuerit, summāq. grauio-
rum negotiorum præfecerit, sed Gregorius quoq.
tertiusdecimus, cum quo nihil priuati iuris aut ne-
cessitudinis tibi intercedebat, raro, atq. haud scio,
an vnico ex multorum sæculorum memoria exem-
plo idem tibi munus mandarit. quas summas & sin-
gulares virtutes tuas nō necesse habeo in præsentia
stilo persequi, cum quod ex splendore ipsæ suo sine
cuiusquam oratione satis sunt illustres, tum ne eas
tibi ipsi narrando pudorē tuum onerare videar vo-
luisse. Atq. ea cum ita sint, tuæ tamen sapientiæ &
æquitatis est PTOLEMAEE . CLARISSIME,
voluntate ac pietate mea, quod vnum facultatis
meæ est, in quaq. me a nemine vinci umquā patiar,
te satis remuneratū putare, in hisq. lucubratiuncu-
lis accipiendis te ita humanitati tuæ proximū esse,
vt in studio & obseruantia mea tum, cum illam ad
te detuli, amplectenda fuisti: ac quemadmodum
tum quantum tuæ gratiæ & beneuolentiæ mihi im-
partireris, ex eadem potius humanitate tua, quā ex
meis vllis meritis statuisti, ita nunc quam grata ti-
bi esse debeant opuscula hæc nostra, non ex eo quā
ti ipsa facienda iudicabis, sed ex amore in me tuo
statuas oro . Vale .

V B E R T I . F O L I E T A E
D E . V I T A E . E T . S T V D I O R V M
R A T I O N E . H O M I N I S . S A C R I S
I N I T I A T I .



A D . R O B E R T V M . N O B I L E M
C A R D . A M P L I S S I M V M



T si hominum tui studioforum neminem omnino esse puto, cui secundæ res tuæ iucundiores sint, quam mihi, tamen in ista tua amplissimi honoris accessione duæ me res à gratulatione retrahebant. Altera, quod occupationibus tuis parcendum esse statuebam; nolebamque in tam magno gratulantium numero, quibus tu omnibus pro tua humanitate voles respondere, necessitatem meis quoque litteris respondendi tibi imponere; Altera quod cum iam diu gradus iste honoris à Pontifice tibi sit non modo destinatus, ac promissus, sed pene delatus, existimabam voluptatem ex ea re iam ex eo tempore animo conceptam meo tibi ita cognitam esse, ac perspectam, vt litterarum testificatione non indigeret. cum præsertim sæpe coram tecum hanc ipsam honoris adeptionem gratulatione præcurrissem. Sed tamen cum audissem te Cardinalem factum, quamuis voluptas iam (vt dixi) inueterata cumulata non sit, neque enim vllus erat cumulo locus, tamen novos quosdam letitiamotus eo nuntio mihi sensi in animo excitari, quos

A ita

ita comprimere non potui, ut non hanc Epistolam statim exararem, qua primum tibi iterum gratularer, atque ita gratularer, ut magis ex animo non possem, eamque rem precarer tibi bene, feliciterque euenire: deinde ut incredibili meo erga te amoris obsequerem, in te nonnullis de rebus admonendo. quæ res quamquam minime necessaria potest videri, cum quod virtus tua non egeat monito re, tum quod sint apud te multi cum eximia doctrina, tum singulari prudentia præditi viri, qui te admonitionibus, & consilio iuuare possint, & regere, tuus præsertim optimus, & sapientissimus parens; a cuius voluntate numquam tibi est discedendum, tamen non omnino alienum duxi à singulari meo erga te studio, si hæc quoque veluti meæ obseruantix signa ad te peruenirent. quibus tu tantum tribues, quantum & ipse tribuendum censebis, & ceterorum iudicia, qui me prudentia antecedunt, ab ijs non discrepare intelliges. Quorum primum est, ut Diuinæ benignitatis erga te magnitudinem agnoscas, quæ tibi in tam altum dignitatis locum præbuerit ascensum, in ea præsertim ætate, quæ ab eo gradu longissime absit; neque in hac re aut quidquam tibi, aut Pontificis Max. propinquitati assumas, quasi idcirco debitus tibi fuerit iste honor. nam contra ea res maiorem in te animi demissionem debet excitare. Etenim hoc ipsum, nactum fuisse te Auunculū Magnum Pontificem Maximum, magnus est Diuinæ benignitatis cumulus. Quare Diuino numini tantæ gratiæ à te sunt habendæ, quantas animus tuus capere potest maximas. Quod eo etiam facies impensius, si tecum reputare volueris, tam multos homines partim generis splendore, partim innumerabilibus virtutum laudibus florentes in Romana Aula consensuisse, neque tamen ad istum gradum, quem tu puer es adeptus, peruenire potuisse. Omnis igitur (ut dixi) tibi ætas esse debet in tanto beneficio grata recordatione colendo, gratiaque ob illud Deo habenda

habenda, quam debes. cuius rei faciendæ vna est tantum via, si te in omnibus non solum factis, & dictis tuis, sed etiam cogitationibus ad præceptorum Diuinorum præscriptum conformabis. Proximum monitum est, ut cum præstantissimum inter sacros homines locum obtineas, ad eas res mentem cogitationemque adijcias, quas sacerdotis professio postulat. Etenim plerique nostra ætate, (quod lugendum sit) dignitatem tantummodo, & opes in sacerdotio spectantes ipsique hianti cupiditate imminentes, quanti oneris, quantæque sollicitudinis res sit sacerdotium, sibi curandum non putant, eaque re fit, ut nullam officij sui partem in sacerdotio gerendo tueantur. qua re quid dici potest indignius? Nam si nullum est tam sordidum artificium, aut tam humile, ut ad illud sese conferentes, non sibi prius querendum putent, quod sit illius artificij officium, quidue sit illi propositum, ut ad illud possint industriam, & diligentiam suam accommodare, quam turpe est, in re omnium maxima, & grauissima ab infimi generis hominibus vinci? neque reputare, quæ sint sacerdotum partes; cuiusque muneris colendi causa à Deo institutum sit Sacerdotium? Hoc te genus hominum à veteri Sacerdotum virtute tantopere degenerantium nequaquam volo imitari: sed contra considerare, cum nihil aliud sit Sacerdos, quam inter Deum, & hominem internuntius quidam, atque interpres, precibusque, & sacrificijs Deum hominibus propitium reddendo, humana apud Deum; sacris vero Mysterijs hominibus communicandis, ipsdemque Diuinorum sermonum vberissimo pabulo alendis, & ad Diuinum amorem excitandis, Diuina apud homines Legatione mutuo fungatur, quantum, ac quam magnum inunus sit Sacerdotium, quamque non modo ad honorem, & ad dignitatem insigne, sed ad curam, animique sollicitudinem graue. Cuius sustinendi cum duplex omnino ratio sit morum, & doctrinæ, in utraque summa

tibi cura; diligentiaque est ponenda; & (quod ad mores attinet) danda opera, vt manum, linguam, mentem ab omni sceleris contagione castam, & integram serues; cauendumque, ne quod in omni vita vilius flagitij vestigiū appareat. Omnium præterea voluptatum, & libidinum illecebræ declinandæ sunt, quod nulla res maiorem vim habeat ad animos adolescentium corrumpendos, & ab officij regione deducendos. quæ res tametsi difficultatem nonnullam videtur habere, tamen si secum reputare uoluerint ij, qui sacris initiantur, sese Dei esse ministros, facile intelligēt, qui apud homines Deū referūt potestate, eosdem illum ipsum Deum vitæ imitatione, & similitudine exprimere oportere. Neque enim sacerdotibus cōmuni tantummodo omnium Christianorum officio cursus quidam vitæ ab omni vitio disunetæ, & cum virtute coniunctæ est tenendus, sed præcipua quædam, & magis necessaria ratio virtutis à Deo ipso illis est imposita, cum illorum vitam edito loco sitam esse diceret, in qua ceteris hominibus exemplum ad imitandum esset propositum; cumque illos lucernarum persimiles esse prædicaret in montium vertice constitutarum, quarum virtute, ac splendore lumen ceteris mortalibus præferretur. quæ præcepta si nostri temporis sacerdotes secum ipsi interdum agitare, & cum Deo maiore in gratia, & cum hominibus maiore essent in honore; minusque ex inuidia, & populorum offensione laborarent. nunc illorum nonnulli Diuinorum monitorum penitus obliti, flagitijsque, & sceleribus contaminati in summo iacent populorum cōtemptu. Ab hac tam perditā, tamque profligata ratione te volo Roberte abhorrere: neque putare (quod plerique stulti facere solent) in ceterorum vitijs, si iisdem tu, quibus illi, fueris inquinatus, tibi excusationem inesse: sed contra potius, eo maiore laude dignam fore virtutem tuam, quo pauciores socios habebis. Quare omnis vitæ ratio ad
eorum

eorum similitudinem tibi est accommodanda ; quorum laude ordo sacerdotalis , qui ceterorum infamia premittitur , subleuatur . Neque tamen cum ab ipsorum lutulentis vitij abfueris , perfectum opus tibi debes existimare , sed alia quædam superesse putare , quæ tibi nequaquam sint negligenda . In primis modestiæ ratio . quæ virtus ut est propria ætatis tuæ , ita tibi alia maiore ratione seorsum a ceteris adolescentibus magnopere est amplectenda . Nihil est enim , quod animos hominum ab officio magis abducatur , quam secundæ res , bonæque fortuna . hæc solet animos hominum inflare , spiritusque quosdam elationis , & arrogantiae plenos secum afferre . quæ res facit , ut cum amplitudo fortunæ non satis æquis oculis ab omnibus aspici soleat , si ad illam superbiam præterea , arrogantiamque adiunxeris , intolerabilis res fiat ; summoque in omnium odio versetur . Quare omni ratione cohibendus est hic impetus , modestiæque freno coercendus , omnisque asperitas vitanda , contraque summa humanitas , atque in omnibus & dictis , & factis , suauitas inducenda . qua virtute , ut nulla est Christianæ professioni cōiunctior , ita nec quæ magis secundæ fortunæ inuidiam mitiget ; communemque hominum beneuolentiam illi conciliet . Neque tamen ut in vnaquaque re magnam habet reprehensionem nimium esse , ita in hac nobis est committendum , ut dum modestiæ laudem nimium consecramur , ad leuitatem dilabamur , sed ita temperanda est tota ratio , ut simul cum humanitate grauitatis rationem habeamus . Neque enim cum aditus faciles laudo , idcirco proiectam , nimisque familiarem cum quibuscumque hominibus etiam ignotis consuetudinem probō : neque si superbum supercilium , & frontis contractionem detestor , ideo minorem mihi stomachum facit leuitatis , ac fuci cuiusdam plena submissio . Sit igitur in vultu cum dignitate quadam coniuncta hilaritas , absit humilis blanditia ; sit in sermone suauitas , vitetur

vitetur assentatio; sit in quotidiana consuetudine facilitas, & comitas, facessat dissolutio. Atque vt summam dicam, non ita humanitatis laudem amplexemur, vt grauitati, & dignitati parum consulamus; neque rursus grauitatis retinendæ cupiditate ita efferamur, vt ab humanitatis ratione abhorreamus. quamquam si in alterutram partem peccādum sit, ad humanitatem potius est incumbendum, quod grauitas, & dignitas fortunæ splendore facile sese tueantur. Ad mores adiungenda est doctrina. In qua re si tu, vt reliqui adolescentes liberam haberes voluntarem, ad quod te studium potissimum conferres, plus operæ sumerem in sententia in ea de re tibi exponenda; plurimumque darem animi tui propensione, quam vt sequereris, te hortarer. Cum vero Sacerdotis officium in Christiana doctrina hominibus tradenda in primis sit explicandum: eiusque doctrinæ promulgandæ, ac cum hominibus communicandæ causa a Christo ipso toto orbe terrarum legati sint sacerdotes, intelligis profecto hanc tibi libertatem a sacerdotis professione præcidi: Theologiæque studium, quod ceteris quoque hominibus sua nobilitate omnium studiorum debeat esse iucundissimum, tibi etiam esse necessarium. Hoc igitur tibi propositum esse debet, eoque omnis labor, opera diligētia tua est conferenda, ceteraque omnia quæcumque leges, & audies, ad illud sunt referenda. Ac Theologiæ studium est eiusmodi, quod etiam si omnibus ornamentis careat, quibus cetera studia commendari solent, tamen subiectæ materiæ dignitate, quæ est Deus, maximaque vtilitate, quod ad æternam salutem beatitudinemque hominibus iter monstret, ac patefaciat, omnes homines neglectis ceteris ad se attrahere debeat. Cum vero ad materiæ nobilitatem omnis generis ornamenta accesserint, quàm non probanda est illorum ratio, ne dicam vituperanda, qui ab hoc studio abhorrent. Caue enim putes

Roberte,

Roberte, vllum doctrinæ genus aut maiore copia ac rerum varietate, aut maiore eloquentia, aut subtiliore disputandi ratione, aut à præstantioribus hominum ingenijs vñquam fuisse tractatum. vt veritas, quæ huic studio subiuncta est, quæ etiam sine vñlo fūco nuda, & simplex sua pulchritudine, & specie est iucunda, admirabiliōres etiā habeat delectationes luce orationis ornata. Nam vt o-mittam sacros ipsos vtriūsq; testamenti libros, qui cum diuino spiritu dictante conscripti sint, sua sese maiestate sine vñlo fūco, aut verborum ornamentis satis commendant; quis Basilio in disputando acrior, aut subtilior, aut grauior? quis maioribus ingenij, aut doctrinæ opibus instructus? Quid? in Nazianzeni oratione præter eximiam sacrarum rerum scientiam, ob quam merito est Theologus appellatus, præstantemq; in omni genere doctrinā an Demosthenis sonitus, & fulgura desideramus? Chrysostomus vero an non beatissima illa copia, & vbertate, omniumq; fere ornamentorum genere, ingenij præterea nobilitate Ciceronem nobis expressit? Multiplicem vero Hieronymi doctrinam; omniumq; magnarum rerum absolutam notitiam, & orationis copiam, acerrimū quoque Tertulliani ingenium, variamq; eruditionem, quo in gradu laudis collocabimus? In Augustini vero cælestis ingenij acie an non præstantissimorum Philosophorum laudibus Christiana gloria respondit. cuius in disputando, erroribusq; refellendis ac vera doctrina asserenda acerrimam vim quæ satis æquare possit admiratio? Quid? Recētior hæc Scholasticorum industria an est filētio prætereunda? quorum ratio disputandi quamuis non nullis paullo angustior, paulloque exilior, ac spinosior videri possit, tamen negare non possumus, lumen ab ea præferri, iterq; monstrari, quo minore cum erratione quæ contraria videantur inter se aptare; ambigua distinguere, ac denique in amplissimis illis sacrarum librorum spatijs

spatijs liberius possimus, minoreque cum offendēdi periculo excurrere. Deinde cum ad doctrinas consequendas magnam partem sine dubio ordo obtineat, certe veterum scripta splēdida illa quidem, ac prope diuina hac commoditate carent: neque quisquam siue de Græcis, siue de Latinis fuit, qui illud susceperit, ac spectarit, quēadmodum totam Theologiæ doctrinam plenam, & absolutam traderet, remque à principio ad extremum ordine quodam perduceret. sed modo hanc, modo illam rem tractantes, disputationes suas ad Ecclesiæ tempora accommodabant. Quorum egregia scripta cum hac ordinis luce carerent, Diuino consilio factum puto, vt recentiora hæc ingenia existerent, quæ quod superioribus deerat, id ipsa acumine, & diligentia sua adderent, confusæque illas, & sparsim tractatas quæstiones in ordinem digererent; seriemque quandam conficerent, quarebus alijs ex alijs annexis, & dilucidior esset hæc doctrina, & ad perdiscendum faciliior. Quorum hominum labor, & industria handquaquam videtur aspernanda. nam etsi multa sæpe inculcant à Philosophis sumpta, quæ fortasse omittere potuissent, nonnullisque quæstionibus forte superuacaneis hoc studium consperferunt, à quibus abstinere potuissent, tamen ijs reiectis possumus quæ vtilia in ipsis sunt, carpere. Quid illa? quanta est huius doctrinæ commendatio? quod cum reliqua studia ingenia tantum hominum, vimque intelligendi oblectent, ac teneant, sacræ litteræ animi quoque affectū pascant, & eo quidē pabulo, quo nullum sit aut ad sensum iucundius, aut ad fructum vtilius. animos enim hominum terrenis his, & caducis bonis incubantes totos immutant, & ad cælestium rerum amorem traducunt, sublimesque quosdam, ac Diuinos spiritus paullatim instillant, quibus humiles has, fluxasque res despiciant; ac pro nihilo ducant; contra diuinas suspiciant; in easque omnibus animi motibus tantum-

tantummodo ferantur . Qua re fit, vt sic affectæ mentes purissima, ac perpetua tranquillitate fruantur, nullis ægritudinibus lacerentur, nulla inani lætitia titillentur, nullis denique perturbationibus exagitentur, quippe quibus omnia humana contemptui sint, futuraque beatitudo ab ijs studijs etiam in hac vita fere repræsentetur. Illud quoque accedit, quod Theologiæ vtilitas non æterna illa, coelestique beatitudine tantummodo terminatur, sed humanarum quoque rerum administrationem complectitur . Neque enim ab vllis Philosophorum scholis vitæ ciuilis præcepta aut subtilius sunt, aut elegantius, aut vero etiã vberius tradita, quã a Theologis nostris. Quare cū tu maxime omniū reipublicæ Senator creatus sis: ob eamque rem politicarū rerū cognitio tibi in primis sit necessaria, debes te toto pectore ad illud studium conferre, quod te in illis facere possit instructiorem. Neque tamen te ad Theologiam tam vehementer hortor, vt à reliquis bonarum artium studijs plane deterream, sed vt moneam, tibi in ijs ita esse versandum, quasi ex illis ad Diuinam doctrinam tibi gradus quidam fiat. vt enim insectores non statim, neque temere quamcūque lanam conchylio tingunt, ne per rudem materiam aliquid de purpuræ splendore detrahatur, sed lanam prius viliori fuce inficiunt; ac molliorem reddunt, vt superinductum ostrum splendidiùs niteat, sic adolescentium animi, in quos Diuina doctrina est infundenda, ingenuis prius sunt artibus informandi, atque imbuendi. quibus perpoliti sensa illa Diuinarum rerum non quidem præstantiora efficiant (neque enim possunt villo modo) sed & ad ea percipienda instructiores fiant, & percepta maiore cum dignitate possint efferre . Ac quemadmodum non si ad fructuum copiam, & sinauitatem nihil folia valent, sunt tamen frondes plane abiiciendæ, quod arboris decor plurimum illarum ornatu commendetur, ita nec si Diuina doctrina nullo extrinsecus

præsidio subnixa suis tamen radicibus firmissime hæret, seseque viribus suis abunde tuetur, sunt tamen ideo ab illa ceterarum doctrinarum ornamenta repellenda, quæ & si eam meliorem nō faciunt, homines tamen, in quibus ea sunt, non modo exornant, sed magna etiā illis ad illam tractandam afferunt adiumenta. Itaque tibi impedimento esse nō possumus, quo minus aliquot etiam ætatis tuæ annos ponas in ijs studijs, sed ita, vt non illa existimes Christiano homini, sacerdoti præsertim per se esse querenda, sed (vt dixi) ex ijs putes expeditiorem viam tibi ad Diuinam doctrinam communiri: neque (quod plerique faciunt) vt omnem tibi ætatem in ijs studijs ponendam censeas, sed susceptam in ijs diligentiam eo vsque perducendam, quo ad te ad grauiorem doctrinam satis ab illis instructum sentias, ad quam cetera omnia studia, & consilia tua tibi sunt dirigenda, illiusque vtilitate processus in ceteris artibus terminandi. Hæc sere sunt Roberte Amplissime, quæ ego & ætati tuæ, & honori, quem es affectus, singulare meum erga te, ac Parentem tuum, totamque domum vestram studium debere existimaui. in quibus exponendis cum videam, me epistolæ modum pene transgressum, finem tādē faciam cum ea clausula, vt Deum immortalem tibi istum honorem velim fortunare, teque orem, vt Parenti, ac Fratribus, meis verbis quamplurimam salutem dicas. Vale.

II

V B E R T I . F O L I E T A E
D E . R A T I O N E . S C R I B E N D Æ
H I S T O R I A E



A D . O C T A V I A N V M . P A S Q V A M
E P I S C O P V M
H I E R A C E N S E M



VLTORVM studijs & adhortationibus impulsus Octauiane Pasqua, cum ad vniuersam nostrorū temporum historiam conscribendam animum & cogitationem contulissem, duæ me res ab eo consilio magnopere deterrebant. altera erat rei ipsius magnitudo, cui me haudquaquam parem existimabam. arduum enim in primis est opus ac perdifficile, plurimique ac diuturni laboris, quodq. cum excellens ingenium ac singularem eloquētiam postulat, tum acres quosdam & viuidos animi motus, qui ad excogitandum sint celeres, & ad inueniendum acuti, atq; ad explicandum copiosi: præterea ciuiliū & bellicarum atque omnium fere magnarum rerum haud mediocrem scientiam & vsum. quæ omnia aut nulla, aut perexigua in me esse intelligebam. altera quæ me deterrebat res, erat, inuidorum & obtrectatorum, quorum plena sunt omnia, malevolentia & improbitas, insitaque quorundam ingenijs peruersitas, ac prauum studium de eorum, quos aliquo numero esse ægre ferunt, laudibus detra-

hendi . quippe qui alienam gloriam ad suum dedecus reuocent . animis enim minutis ac ieiunis homines ; imbecillitatifque suæ consciij cum se se attollere non posse sperent, quantum alios altius euolantes cernunt, tantundem se infimo loco relictos deprimi putant . Quibus igitur assurgendo se se æquare non ualent, eos ad imum, quantum in ipsis est, deprimēdo sibi pares facere contendunt . Quæ incommoda eo magis mihi erant formidanda & cauenda, quo ij, qui natura simplici sunt & aperta, qualem me esse, nemo est de ijs, quibus notus sum, qui nesciat, grauius ijs rebus offenduntur: ego quidem me animo quibusuis iniurijs facile irritabili esse sentio . Quare verebar, ne labore ipse meo negotium mihi permolestum struerem, magnamq. contentionum molem, a quibus ingenio longe abhorrens semper fui, constarem. Verum cum nullum instandi & vrgendi finem facerent ij viri, quorum complures amicitia & beneuolētia, multi etiam auctoritate apud me plurimum valebant, obsequi tādē tantæ hominum voluntati quamuis inuitus & retractans sum coactus, cum præsertim illi bono me animo esse iuberent, fortiterque agendum dicerent . nam quod ad ingenium & facultatem attinet, plus me aliorum iudicio de me, quàm meo tribuere debere : neque obtræctationem & inuidiam mihi esse pertimescendum . quam si veriti essent graues viri ac docti, neminem omnino animum ad scribendum adiecturum vñquam fuisse nullam enim ætatem eius vitij expertē, aut ab ea labe sinceram atque integram fuisse : neque liuorem & improbitatem cuiquam ex omni sæculorum memoria pepercisse . Vt in communi incōmodo me vnum eximium esse postulare nō debeā, ac ne optare quidem. Verum non me fefellit opinio mea. In varias enīn reprehensiones incurrimus, neque eas genere leues . Quibus faciendum mihi putauī, vt responderem; hominumque importunam temeritatem refellerem.

lerem. quod non omnino ieiune me hoc libro fecisse arbitror. quem ad te Octauiane Pasqua multis de caussis mittendum duxi. primum, quod id a me postulare videbatur studium meum ab egregia tua voluntate, tuisq. haud leuibus in me meritis & officijs prouocatum. quæ me rita si pari referenda gratia remunerari haudquaquã possum, at hoc saltem grati memorisq. animi testimonio illustranda duxi. Deberi præterea hoc a me putavi veteri nostræ animorum coniunctioni, compluribusq. necessitudinis caussis inter nos intercedentibus, in primis verò obseruantix atque adeo pietati, qua Simonem Pasquam patrum tuum Cardinalem amplissimum perpetua prosecutus sum omnibus officijs, omniq. beneuolentiæ significatione cum in vrbe & in Tridentino Concilio, tum multis alijs locis ab illo amplexus. Nihil autem maioris ponderis fuit, quã dignitas tua, ex qua haud parum commendationis huic nostræ disputationi accessurum intelligebam. Illæ sunt enim in omni genere laudes tuæ, quas si stilo paullo diligentius & prolixius persequi velim, nemini, cui illæ notæ sunt, aut nimius fuisse, aut plus æquo gratiæ tribuisse videri debeam; difficileq. sit, statuere, vtrum in te ingenij, an morum & virtutum gloria magis excellat. nam ingenij præclarum specimen iam inde a primis annis, qui eloquentiæ studijs & pulitioribus artibus dati sunt, coepit apparere; & in adolescentia, quæ tota in iure ciuili perdiscendo posita est, maxime enituit. Innocentia vero, integritas, fides, probitas, diligentia, industria, doctrina in forensi opera, qua iuuentutis tempora per octo annos in Romana Aula in caussis iudicandis, atque in vtroq. munere supplicum libellorum fungendo districta fuerunt, conspectæ sunt. Iam vero morum sanctitas, continentia, religio in omni vita caste & diligenter culta cum omnibus admirationi fuit, tum vero Gregorio Tertiodecimo Principi sapientissimo, minimumq. gratiæ

gratiæ largienti, ac præmiorum modum meritorum momentis metienti ita probatæ, vt te dignum iudicarit, cui tertium & trigefimum annum ætatis nondum egresso insignem Locrorum Episcopatum, quem Hieracensem vocant, vltro deferret, cunctis approbantibus, & ampliore honore te dignum iudicantibus. Ad hæc accedit singularis humanitas, tantaq. in quotidiana consuetudine comitas & naturæ suauitas, vt nemo a te tristis vinq. discesserit. Romæque ad mandatum munus profectus ardentissimum omnibus tui desiderium reliqueris. Quibus rebus sit, vt in te ornando minimum, aut nihil omnino sit de generis commendatione petendum. quod tibi vtraq. familia nobile & insigne est. Nam paternum Cardinalatus honore præfulget, quo a Pio Quarto Simen Pasqua patruus, vt diximus, cum ob ceteras præstantes virtutes, tum ob multiplicem eximiamq. doctrinam donatus est. Vt omittam alios complures, qui eiusdem familiæ tuæ gloriam laudibus suis amplificarunt; in primis Stephanum Pasquam parentem tuum virum in omni vita recti exempli, atque in multis partibus Genuensis reipublicæ administrandis, primarijsque magistratibus gerendis ita versatum, vt eius opera, consilium, fides, integritas, pacis & concordie studiū in summo præsertim Magistratu positi difficillimis ac turbulentis temporibus magno vsui patriæ fuerit. Maternum vero Marchesiorum nomen perpetua iuris ciuilis laude floruit, multisque insignibus stigmatibus clarum est, memorabili illo in primis fratrum pari Francisco Iurisconsulto, qui ab auis tuus fuit, & Leonardo Ingaunorum Episcopo. quorum ille perpetua reipublicæ in magnis & arduis rebus domi forisq. nauata opera nobilitatur; hic singulari pietate, religione, doctrina, morum sanctitate præditus in Episcopatu administrando, cui multos annos præfuit, quæ sunt ejus muneris magna & præclara cumulate impleuit. Nec paruo

paruo decori familiæ fuit Petrus Marchesius Hierosolymitanus eques bellicis laudibus florens. Tria igitur viri acutissimi nobis obijciunt. Principio consilium meum magnopere reprehendunt, qui latine historiam scribendam duxerim, requiruntque, quid ita qui veterum imitationem tantopere videlicet iactem, illorumque auctoritati in reliquis rebus tantum tribuam, in hac vna, in qua minime conueniebat, a perpetuo, & communi scribentium more discefferim. illud enim constare affirmant, omnes omnium ætatum, omniumque gentium scriptores patrio, non alieno sermone historiam scripsisse, idem igitur mihi faciendum fuisse, popularique Itala lingua nostra in rebus gestis nostrorum temporum narrandis, litterarumque monumentis mandandis vtendum. quod idem multos claros ætatis nostræ viros, magna cum ipsorum laude, atque omnium approbatione videmus fecisse. in qua re eo me, ac ceteros, qui idem consilium non sunt amplexi, grauius affirmant peccare, quod veteribus libera fuerint consilia, qua lingua scriberent; at nobis libertas hæc sit erepta: Italoque populari sermone scribendi necessitas a re ipsa nobis imponatur, tot nouis post latinæ linguæ vsum extinctum exortis rebus, quæ latino nomine careant. innumera enim inuentionum genera reperta, quæ veteribus plane ignota ne latino quidem vocabulo notata sint, neque nobis notare liceat in aliena videlicet lingua; infinita præterea machinarum, tormentorum, bellicorum instrumentorum, telorum, armorum genera: ad hoc innumerabiles magistratuum, ac procurationum, & honorum, tam ciuiliū, quam militarium titulos, quæ omnia tot, ac tam varia, cum nomen latinum non habeant, frequentissimaque in historiam incidant, atque adeo maximam partem historię obtineant, necessarioque in omni rei gestæ narratione, in omni que consiliorum explicatione sint exprimenda, ac creberrime repetenda,
nouo-

noouoque proinde vocabulo popularisque linguæ sint appellanda, efficietur vt ex duobus diuersis inter se sermonibus historia necessario sit contexenda. quæ res præterquam, quod nullo exemplo fiet, ac non ferendæ erit audaciæ, & temeritatis, quid tandem ea dici poterit absurdius? aut quod magis aures respuant? aut quod tandem id erit monstrum ex dissimilibus, tamq. parum inter se congruentibus membris conflatum? Sequitur altera oppugnatio, in qua sese non minus illorum iactat oratio, quæque cum reprehensione insignem iniuriam, & contumeliam meam habeat coniunctam. Negant enim me non ad vniuersam modo, sed ad historiam omnino scribendam esse aptum, munusque me suscepisse affirmant, cui nullo modo par sim, neque enim cuiusuis esse, quamuis excellenti ingenio, atque eximia eloquentia, scribendique arte præditi, ac quamuis ingenuis artibus exculti historiam conscribere, sed opus haud sciunt an dicant omnium maximum, & præstâtissimum vni tantum hominum generi conuenire. quod vt planum fiat, illud disputationi præmuniunt, historiam veram esse oportere. neq. enim aliud esse historiam, quàm veram rerum narrationem. nam si historia narratio dumtaxat sit, tum vero historia nihil ab Epici Poetæ narratione differat: quippe quod vtraque res gestas contineat. vna igitur veritate duas has narrationes inter se distingui. Denique veritatem ita esse propriam historię, vt pars eius essentia sit, qua veritate carentem narrationem non prauam modo, ac malam historiam esse, sed ne historiam quidem esse, neque historię nomen omnino posse obtinere. Itaq. quamuis apta, ornata, copiosa, elegans sit narratio, quæq. omnia locis, temporibus, personis, conuenientia, plane seruet, consilia apte, & luculenter explicet; egregijs descriptionibus situs locorum, formas urbium, ac munimentorum, instructiones acierum, ordines præliorum, discrimina, & casus

casus ante oculos ponat, ac veluti in rem præsentem legentium animos inducat, ac pro auditoribus spectatores faciat, omnibus denique eloquentiæ, & artis numeris explera sit, si veritas in illa desideretur, decorâ quidem, & aptam fore narrationem, at historiam non dico falsam, & prauam, sed nullam omnino futuram; contra si rudi, & incomperto scribendi genere litteris sit mandata narratio, neque vllas partes ex ijs habear, quas Rhetorû præcepta præscribunt; omnibusque ornamentis plane sit orbata, ad hoc consilia, & causas inepte explicet, res gestas confusa narratione obscurer, ac pro eo vt lucem afferat, tenebras rebus offundat, veritas tamen adsit, vilem quidem, & ineptam, ac despiciendam rem fore, historiæ tamen vim, & nomen retenturâ. Magnopere igitur normæ similitudinem à Polybio commentam veluti rei mirifice aptam probant. Vt enim (inquit) norma ex auro, & ex quamuis prætiosa materia facta, si recta non sit, res quidem prætiosa est, at norma nullo modo esse potest, cum enim norma causa dirigendi operis inuenta sit, munus suum præstare non potest, nisi recta ipsa sit, quare ne norma quidem erit; contra si recta sit ex quamuis vili materia fabricata, nullius quidem pretij erit, sed norma tamen erit; ita cum idem sit verum in historia, quod rectum in norma, efficitur id quod diximus, vt falsa narratio neque sit, neque appellanda sit historia, quamuis omnibus verborum, & sententiarum luminibus illustrata, ac politissimo genere conscripta; contra vera quamuis sordida, & inops, atque inepta, re & nomine sit historia. Qua re probe fixa & stabilita ita disputant, ad veritatem rerum, quæ explicandæ sunt, perueniri nullo modo posse, nisi ab ijs viris, qui res ipsas tractarunt; quique rebus gerendis, & consilijs interfuerunt, ac veras, & certas, non autem commentitias, ac vulgo, & forensibus sermonibus iactatas causas cognouerunt. ij autem sunt, qui ad interiora Principum

consilia adhibiti sunt, qui in liberarum Ciuitatum Senatu fuerunt, qui legationes obierunt, quorum opera in scederibus faciendis; in conditionibus pacis componendis, in belli consilijs explicandis multū diuq; sit versata; quiq; exercitus duxerint, praelijs interfuerint, discrimina subierint, belli subita, & improuisa subinde exorientia cognouerint. quæ vulgo ignota Duces sæpe coegerint suscepta rerum gerendarū ratione omissa ad nouos casus noua cōsilia accommodare. Quærunt igitur, qua ratione me ad abditas rerum causas penetraturū somniam, qui nullam gerendæ reipublicæ partem umquā attigerim. in quibus enim Principum consilijs, aut in quo Senatu me tandem fuisse? quas legationes obiisse? quibus deliberationibus de bello, de pace, deq; ceteris publicis ac magis rebus umquam adhibitū fuisse? quibus praelijs interfuisse? quæ bella tractasse? quam deniq; reipublicæ partem mihi umquam commissam? & tamen me hominem omnium publicorum negotiorum expertem historiam, & eam quidem vniuersam de rebus gestis nostrorum temporum perscripturum profiteri ausum, illudq; munus suscipere non veritum esse, quod viri in omnibus ijs, quas diximus, rebus diu, multumq; versati, diuturnoq; reipublicæ gerendæ vsu contriti, vix se implere posse sperent. Qua oratione in speciem non spernenda fidem, & auctoritatem historiæ meæ nituntur derogare. Extrema est reprehensio, quæ nō tam in me, quam in omnium gentium, omniumq; sæculorum auctoritatem inuadat, perpetuumq; atq; ab omnibus ætatibus, omnibusq; scriptoribus vsurpatum, & approbatum morem damnare non dubitet; adeo nullus est audaciæ, & confidentiæ modus. Negant enim conciones, rectas in historia vllō modo ferendas esse. nam cum prima historiæ professio, & commendatio veritas sit, atque adeo vt diximus, ipsius historiæ essentiæ pars, & forma, qua detracta historia vim, & nomen suum retinere non possit,

possit, quem non pudeat eiusmodi concionibus, quas res commentitias esse, & a se confictas, ne ipsi quidem qui eas confixerunt, inficias eunt, in historia tam frequentem locum dare? se se igitur priorū saeculorum, ac tot clarorum virorum omnibus ceteroque naturæ, & industriæ præsidij cumulatorum vicem pudere, quos ambitio, & gloriæ cupiditas ita transuersos egerit, vt impotenti ingenij, & eloquentiæ ostentandæ cupiditate elati professionis susceptæ plane sint obliti; legemque historiæ perspicue perfrēgerint, quam dum minime necessarijs ornamentis illustrare nimium student, eius naturam corrumpere non sint veriti. Cum hac igitur vna exceptione præclara ingenia esse laudanda; neque vllum quamuis diuturnum vsum, ac quamuis magnam, & consentientem auctoritatē tam euidenti rationi debere præponderare. Nō quidem genere leuia videntur hæc Octauiane, quæ nobis obijciuntur, neque prima specie ita parum probabilia, vt non in rem minus acriter intuentibus errorem possint obijcere. quem tamen errorem nos facile crepturos confidimus, verum ijs tantum hominibus, qui ad intimam rationem possint penetrare, ingenijque aciem in rem bene penitus defigere, qui que veritatem subtilitate disputationis ad tenue sciant limare, ac singula momentis suis ponderare; qui deniq; non ex eo genere sint hominum, qui ab anticipationibus ita possidentur; itaq; semel comprehensæ opinionis pertinaciter sint retinentes, vt si eam ratio labefactarit, si veritas extorserit, illam tamen depōnere in animum non inducant. Ac negantibus historiam hoc tempore posse latino sermone cōscribi, satis copiose ni fallimur, in libris nostris, de linguæ latinæ vsu & præstantia respondimus, remque diligentissima, ac satis, vt putamus, subtili disputatione persecuti sumus; docuimusque & historiam, & omnes magnas res nostra ætate non modo commode, & dilucide posse, sed debere quoq;

litteris latine mandari; idque longe rectius, & præstabilius esse, ac cum legentibus vtilius, tum scribentibus gloriosius non igitur necesse habeo eundem laborem aut mihi scribendi, aut tibi legendi iterare. Quare quod secundo loco obijcitur, magisque rem continet, videamus. In quo, quæ de natura, aut veritate historiarum præmuniuntur, ea omnia non retractanter concedo, Polybique sententiam, & comparisonem in præsentia accipio. quamquam non sum nescius, multa ad ea posse responderi, esseque nonnullos, neque eos indoctos, qui a Polybio magnopere dissentiant, comparisonemque ab illo inductam improbent, remque ad iudiciorum similitudinem reuocent; affirmentque eandem esse veritatis in historia rationem, quam in iudicijs iustitiæ; ac quemadmodum iniustus Iudex, Iudex tamen est, & iniustum iudicium, iudicium tamen est, ita mendacem historicum, historicum tamen esse, & falsam historiam, historiam tamen esse. quæ quamquam a nonnullis dicuntur subtiliter, neque parum in speciem probabiliter, a nobis tamen in præsentia omittenda sunt tamquam quæ nihil ad nos pertineant, nihilque sit, quod de illis pugnemus. quippe qui a tota hac ratione longe absumus; Polybioque & ijs, qui historiam, quæ eadem vera non sit, vere esse historiam, eoque nomine appellandum negant, magnopere assentiamur. Neque nos hæc attigimus, quod veritati historiarum nostrarum diffidamus. neque enim plus diligentiae aut studij a quoquam omnino nostra ætate in rebus quarrendis & inuestigandis adhibitum putamus, eaque nostri documenta in omni vita dedisse speramus, ut minus esse in nobis fidei, quam in ceteris ijs, quibus noti sumus, numquam sint existimaturi, sed historiarum scribentium, patrocinium suscepimus, quos ætate nostra indignissima invidia videmus laborare, in qua homines vitium, quod est in re, ad scribentes transferunt, in-

sita

sita in humanis ingenijs importunitate de aliena laude, perinde quasi in illa vituperatio ipsorum sit, quantū quisque potest, detrahendi. a quibus illud quæro, cū homines in veritate perquirenda & inuestiganda, eaq; ex altissimis tenebris in lucem extrahenda omnia summa fecerint, an satisfecisse officio illos putent? & an quisquam præter diligentiam & fidem vlla omnino in re præstare amplius sit obstrictus? Quod si ea est humanarum rerum conditio, vt quamplurimas earum cum ipsas tum illarum causas non modo vulgo, sed ipsis quoq; summis viris, quiq; publicas res, ac bella & paces, negotiaque Principum tractant, ignotas esse necesse sit, quæ, malum, tanta est ista in quorundam, ingenijs peruersitas, vt scriptorum tamen laborem & industriam lacerare non desistant, quos intelligant omni culpa a re ipsa liberari? Qui homines male de hominum genere mereri sunt existimandi, qui tan iniquam legem in se ipsos, & in ceteros statuunt, vt necessitati culpam assignent. Quod si dicant, quamuis scriptores omnes diligentia & suscepti muneris partes impleuerint, ac proinde ipsi quidem crimine sint liberandi, non tamen ideo effici, vt perfecta sit historia tanto vulnere sauciata, dicant quæso, qui ita disputant, quæ tandem de omnibus artibus, omnibusque doctrinae professionibus ad perfectionem sit adducta? & in qua non multa desiderentur. Quid igitur in communi vitio vnam scribendæ historiae facultatem ad vituperandum & insectandum arripiunt? cum ceteras non ferant modo, sed laudent quoque? Verum communi defensione omissa tempus est, vt ad ea, quæ mihi propiora sunt, tandem veniam, ijsque respondeam, quia me historiâ præsertim vniuersam scribi posse negant. Odiosus est hic locus & lubricus; meque (quod aiunt) lupo & præcipitijs interpositum video: Concedam illis quod obijciunt? tum vero me non ferendæ temeritatis, & summæ stultitiæ, proiectaq; impudentiæ

tix ipse condemnaro, qui eam rem tanto conatu, tanta-
 que operæ & studij impensa susceperim, cui me haudqua-
 quā parem confitear: tantiq; exudati labores proijciendi
 fuerint, atq; inchoata opera, quæq; iam multum proces-
 serit, interrompenda, omnique industria plane depo-
 nenda. Refellam oppugnantes? at quomodo arrogantia
 & leuitatis notam effugero, si in caussa mea defendenda
 aliquid de me sublatius & magnificentius dicere coactus
 fuero? Sed fortiter agendum est; neq; arrogantia crimen
 formidandum, quod necessitas omnibus rebus validior a
 me deprecatur. cum præsertim auctoritate ipsorum sapi-
 entia Antistitum subleuer. qui licere hominibus tradide-
 runt, sese sine leuitatis nota multis locis laudare. quorum
 ille maxime celebratur, cum egregiorum hominum vir-
 tus detrahentium inuidia & maledictis incessitur; recteq;
 facta ac merita calumnijs & obtreptione maleuolorum
 premuntur. quam tamen rem faciam modice, neq; quid-
 quam mihi assumam, in quo quisquam repugnet, quod-
 que non omnium consensu mihi tribuatur. Equidem
 nescio, qualem isti hominem fingant, quem ad historiam
 scribendam admittunt. Nam si eum, qui hebeti, ac tardo
 sit ingenio, nullaque doctrina, aut eruditione excultus,
 nullisque Rhetorum præceptis informatus, qui nihil le-
 gerit, nihil didicerit, quiq; præterea in otio, & solitu-
 dine consenuerit, idem nullum humanarum rerum vsum
 sit consecutus, ab historia scribenda excludunt, me quo-
 que sententia suæ adscribant. quod si eum hominem, qui
 sollerti, & viuido sit ingenio, celeribusque quibusdam
 mentis motibus, & ad inueniendum vberibus, & ad ex-
 plicandum copiosis sit præditus, qui multorum scripta le-
 gerit, qui Philosophorum disputationes, quæ ad vitam
 ciuilem pertinent gustarit, qui in Rhetorum scholis sit
 versatus, qui eorum, qui res scripserunt, quorumque no-
 men clarius, & celebrius est, monumenta diu multumq;
 euoluerit,

euoluerit, ad eorumque imitationem acri studio, & indefessa diligentia se se contulerit; quique diuturna meditatione, & exercitatione eam scribendi facultatem sit adeptus, cuius illum haudquaquam poeniteat, qui idem in foro sit versatus, quique vel in magnis Ciuitatibus, vel in Principum Aulis magnam ætatis partem egerit, magnorumque, ac præstantium virorum, qui publicas res tractant, consilijs Principum adhibentur, bellis gerendis præsent, legationes obeunt, diuturna, & assidua consuetudine vsus sit; cumque illis de bellis, de foederibus, de conditionibus pacis, de consilijs Principum sermones sæpe contulerit, coetibus hominum dum de publicis, ac magnis rebus, deque nouis exorientibus casibus, deque futuris euentibus inter se commentatur, interfuerit, talibus naturæ, & industriæ præsidij instructum hominem cur reiiciant non video. Verum age videamus, quamobrem eos duntaxat, qui res ipsas tractarint, quique in consilijs interioribus Principum fuerint, quique ipsi bella gesserint exercitibusque perfuerint, ac res bellicas administrarint, ad scribendam historiam admittant, ceteros arceant. quod abditæ (inquiunt) rerum causæ, & consilia Principum illis tantum nota sint, ceteris ignota; neque vllius rei perfecta esse possit cognitio ignoratis causis, a quibus res manant, ac sine consiliorum cognitione manca quædam, & cæca sit rerum gestarum narratio. qua re sit, vt nullus possit aut perexiguus percipi ex historia fructus, sine quo fructu inutilis plane, ac superuacanea est historia. neque enim historia, vt poema delectandi causâ in primis conscribitur; neque vt nouorum casuum uarietate allectos animos hominum pascat, & teneat, sed vt hominibus profit, neque ijs modo, qui nunc viuunt, sed posteritati quoque. nam cum duæ sint facultates, quæ commune bonum, & vtilitatem publicam spectant, quæque hominibus

bus ad beatam vitam iter expediunt, illosque ad civilem societatem tuendam, & ornandam instituunt, moralis Philosophia, & historia, ita hæ duæ facultates partitæ sunt inter se munera, ut illa disputationibus, & præceptis animos, & mores hominum informet, hæ vtilibus exemplis salubribusque documentis quid sequendum in vita, quid fugiendum sit, doceat; moneatque ad quorum similitudinem actiones, & consilia sua homines dirigant, & conforment; casusque atque exitus, qui bona consilia, & prava consequi soleant, ante oculos hominum ponat, quorum cognitione illi vel ad virtutem inflammentur, vel a sceleribus reuocentur. at eiusmodi vtilitates ex simplici nudaque rerum narratione percipi nullo modo possunt. influunt enim causæ vi sua in res, quæ geruntur, ac veluti anima sunt rerum, à quibus actiones ipsæ formæ, & naturam accipiunt: fitque, ut eadem actio laudanda, vel vituperanda sit, prout sunt causæ, à quibus actio illa manat, prout est finis, qui rerum gerendarum auctoribus fuit propositus. Speciose differuntur, hæc quidem, atque ita probabiliter, ut errorem parum cautis possint obijcere. verum falsitas eo periculosior est, quo in insigniore specie latet. quare nobis discutiendæ sunt tenebræ subtilitate disputationis, veritasque eruenda. Duplex erit disputatio; prima de causis, altera de rebus, quæ geruntur, quæque a causis manant. quod antequam facio, illud silentio præterire non possum, non adhuc plane exploratum esse, neque omnium consensu approbatum, necessearium esse historiam scribenti causarum explicationem, sed rem bene longam disputationem habere. sunt enim neque ij indocti, qui contra disputant; historiamque narrationem esse gestarum rerum & euentuum tantummodo, neque de causis quærendis, & inuestigandis, illisque tradendis historię scriptori magnopere esse laborandum, neque enim hoc esse historiographi munus, neque
historię

historiæ nomen causas vi sua complecti. quæ res confirmari potest sacrarum litterarum auctoritate, in quibus historiæ nudam, & simplicem rei gestæ habent narrationem. Verum ut hæc in præsentia missa faciamus, demusq; causas magnam, & necessariam partem in rerum narratione obtinere; sine quibus res ipsæ veluti mancæ, ac detruncatæ sint, cum duo sint in rebus gerendis hominumq; actionibus genera causarum, alterum earum, quæ vulgo iactantur, omnibusque notæ sunt, alterum abditarum, quæq; a Principibus, ijsq; qui illis sunt in consilio, fere comprimuntur, & occultantur; de primis nulla potest esse controuersia, cum omnibus æque sint notæ. quare omnes ad illas exprimendas æque idonei sunt, si modo ingenio, & facultate scribendi valeant. De secundis pugna est, sed non difficilis exitus. Nam si nemo idoneus est ad historiam scribendam, nisi qui interioribus Principum consilijs interfuerit, intimasque causas cognouerit, nemo omnino ad vniuersam historiam scribendam idoneus fuerit. non enim vniuersa historia vnius tantum Principis consilij, & actionibus definitur; sed omnes Europæ Principes amplectitur. Bella enim nostra ætate in Europa varijs de causis varijsque temporibus excitata, si quis rem vere existimare velit alia ex alijs annexa fuerunt, singulaque bella ipsa non ad eos tantum Principes pertinuerunt, qui apertas inimicitias, apertaq; odia inter se exercebant, quosque apertæ dissidiorum causæ in aperta bella stimulabant, atq; inter se committebant, sed ceteros quoque Europæ Principes varie attingebant. nam alios vetus amicitia veterisq. clientelæ ius, ac vetera partium studia in aperta consiliorum, ac belli societate trahebant, alios quibus libera erant consilia, ad hunc vel ad illum ex ijs, qui aperte bella gerebant, occultis studijs se se applicabant, occulteque hunc, aut illum iuuabant, prout rebus suis conducere putabant; prout bellorum exitus

D . sibi

sibi utiles, aut damnosos fore prouidebant, prout alterius secunda, vel aduersa in se ipsos, atq; in Regna sua redundatura existimabant. quare nihil in Europa nostra, aut Patrum nostrorum ætate motum est, quod non omnium Principum animos erexerit, atque in alienos euentus oculos, & animum omnium intenderit, exercitarique ad consilia sibi in omnes casus præparanda, & ad novos, subitosque euentus accommodanda. Quare factum est, ut bella, resque in Europa gesta non in eorum tantummodo à quibus gerebantur, sed in omnium Principum deliberationem caderent, in omniumque consilijs agitentur. fieri autem non potest, ut vnus idemque homo ad arcana, & intima plusquam ab vno Principe vno eodemque tempore adhibeatur, ac plurium Principum consilia, & cogitata simul cognoscat. cumque in historia vniuersa scribenda omnium Principum, & liberarum Ciuitatum consilia explicanda sint, quomodo is, qui in vnus tantum Principis consilio fuerit, magis ad intima ceterorum Principum consilia penetrabit, illaue melius explicabit, quam is, qui nulli omnino consilio interfuerit? Aequè enim illi, ac mihi consilia ceterorum vel coniectura inuestiganda, vel ab alijs discenda erunt; & æquè ille, atque ego, & coniectura falli, & ab alio decipi potest. quota igitur pars fuerit totius historię ea, in qua me superabit? profecto tam exigua, ut vix compareat. Quid? quod ne res quidem vnus eiusdemque Principis, cuius ipse adnister est, omnes scire ipse per se potest, sed multo maximā earum partem ab alijs cognoscat necesse est? quæ tamen res in historia necessario sunt completendæ, neque ab ijs, quæ ipse per se cognouit, in scribenda historia vlllo modo disiungi possunt, id quod mox planius explicabitur. Deinde haud facile concesserim, illum ad res illius ipsius Principis, cui in consilio fuerit, & a quo arcanorum particeps factus sit, scribendas, consiliaque exponenda,

ponenda, & explicanda magis idoneum, quam me esse, si modo consilia ipsa atque atque ille cognouero. Nam res ipsum tractasse, atque in deliberationibus ipsum esse verfatum, gerendæque reipublicæ diuturno usu assuefactum esse; hæc atque huiusmodi complura ad prudentiam augendam valent plurimum, instructioresque homines, & aptiores ad rempublicam gerendam faciunt. Quo circa sapientius consilium profecto dabit in deliberationibus de magnis, ac publicis rebus, faciliusque res implicatas expediet is, qui res ipsas usu cognitatas, & pertractatas habet, quam is, qui nullam unquam reipublicæ partem, aut in consilijs capiendis, aut in rebus gerendis, & administrandis attigerit, sed ad eas ipsas res, quas ille ipse tractarit, quibusque etiam præfuerit scribendas, ampliusque, & distinctius, atque ornatius, etiam & nervosius explicandas haudquaquam magis aptum faciet. nam hoc totum ingenij est, & eloquentiæ. Neque enim Annibal res, quas ipsemet gessit, melius quam Livius scripsisset, aut maiore cum dignitate explicuisset. At enim causæ, & consilia illis, qui rebus in consulendo, vel in agendo non interfuerunt, nota plane esse non possunt. quæ comprimi solent, cumque ijs tantummodo communicari, quos Principes ad interiora consilia adhibent. Hic ego tempora distinguo. si occultari causas, & consilia dicunt, tum cum res ipsæ geruntur, assentior, sed historia post res gestas scribitur, tum cum sine periculo consilia, & arcana deteguntur, neque enuntiantibus obesse possunt rebus iam transactis. quare facile est, ea consilia ab ijs, qui rebus interfuerunt, quibusque nota sunt, cognoscere, ut in nulla superiore conditione futurus sit is, qui perse ipsa consilia cognoverit, eo qui ab alijs cognoverit. At enim post res quoque gestas arcana consilia nihilominus comprimuntur, neque temere diuulgantur. Non pugno, sed nihil contra me hoc facit, nam si

eiusmodi sunt consilia, quæ nullo modo diuulganda sint, non magis, atque adeo multo minus stilo, quam ore diuulgabuntur. quare ne is quidem, qui illis interfuit, litterarum monumentis illa consignare audebit. atque vt res planior fiat, aut consilia, quæ silentio teguntur, turpia, & iniusta, parumque decora ipsis Principibus, consiliorumque auctoribus sunt; aut honorifica, & cum honestate, atque officio coniuncta. Primi generis consilia numquam enuntiabuntur, multoque minus scriptis ad posteritatem propagabuntur. nihil igitur in ijs gnarus, ab ignaro differet. a neutro enim scribentur. At secundi generis consilia vltro prædicari solent, percunctantibusque cupide narrari; nemoque tam sui ipsius, & Principis sui hostis est, vt quæ ab ipsis egregia, & reipublicæ salutaria profecta sunt, esse velit ignora, meritaque laude se ipsum fraudare; ac non contra magnam habeat gratiam, si quis illa laboribus, & industria sua ab obliuione hominum vindicarit. Quod si obstinate adhuc restiteris, eumque, qui consilia abdita enuntiat, percunctantes sæpe decipere contenderis, facile respondeo, eiusmodi esse ea consilia necesse esse, quorum auctores pudeat, in quibus narrandis, atque inuertendis non minus legentes scribendo, quam percunctantes fallit pronuntiando. Quare fiet, vt legentes, quorum causa res gestæ scribuntur, nihilo certius, ac verius, nullamque meliorem historiam ab ijs, qui consilij, & rebus agendis interfuerunt, quam ab ijs, qui eadem de alijs cognouerint, habituri sint. eadem est actio-num, & rerum gestarum ratio, quæque de consilijs disputata sunt, ea hic commodè repeti possunt, singulaque in hunc locum aptè trāsferri. aut enim res gestæ a nemine bene narrari possunt, aut non minus ab ijs, qui ipsis gerendis non interfuerunt. neque enim actiones a consilijs separari possunt, neque ex ijs duæ confici historiæ, sed ita altera res ab altera est annexa, vt disiungi nullo modo possint,

possint, necessarioque vno historiarum corpore sint contenda. Ex ijs vero hominibus, quorum opera, industria, prudentia, fide Princeps in maximis rebus, & in summa republica procuranda vitur, non omnes omnia tractant; sed sua sunt cuiusque separati munera. nam alios domi, & apud se retinet Princeps, quos ad deliberationes de bello, ac de pace, deque alijs grauibz negotijs adhibet, omniaque, quae in deliberationem cadunt, de illorum consilio expedit alios a se amandat, Prouincijsque regendis, atque exercitibus, & rebus bellicis praeficit. quo fit, vt si quis illorum ad historiam scribendam animum adijciat, non omnia, quae scripturus est, ipse viderit, sed multo maxima eorum pars de alijs sit cognoscenda. neque enim is, qui exercitui praest intetioribus consilij Principis potest interesse; quaeque ibi agitantur, & deliberantur ipse audire, & ei quoque, qui apud Principem remanet casus belli sunt ab alio perdiscendi. Quid? quod ijs ipsis, qui in acie steterunt, in parteque laborum, ac periculorum fuerunt, multo maxima pars eorum, quae in ipso praelio, cui ipsi interfuerunt, gesta sunt, ab alijs cognoscenda est: nam cum ingens loci spaciū acies obtineat, is, qui in sinistro constitit cornu, quae in dextro gesta sint, qui casus ibi praeriorum fuerint, quae ibi variauerit fortuna, vnde fugae, vnde victoriae initium factum sit, nisi ab alijs narrata cognoscere non potest. Vix quae prope se gerantur, quis pra clamoribus, discurrentium turba, signorum cantu, strepitu armorum, ictu sonitu, tormentorum bombis, equorum innitu, cadentium gemitu cum omnia oborti fumi, ac pulueris nubes tegant, aspectumque adimant, exaudire, ac videre possit, ne dum sit in longin quas partes circumspiciat, aut in extremam aciem oculi, atque aures cuiusquam possint intendi. Vt ne ipse quidem summus Dux, quae in sua acie gesta sunt, nisi de alijs maxima ex parte cognita stilo persequi possit. Quid dicam

dicam de hostili acie? cuius euentus quoq; , & casus ipsi prorsus ignoti non minus distincte , ac dilucide , nisi historia manca plane futura sit, sunt explicandi? Quæ omnia innumerabilia cum de alijs, vel de ijs ipsis, qui interfuerunt prælijs necessario sint perdiscenda , qua tandem re , aut quot tandem partibus is , qui a prælio commissio abfuerit, eo, qui interfuerit , erit inferior? siquidem utriq; tanta pars rerum aliorum narratione est cognoscenda? ut præ illis, ea quæ ipse, qui interfuit, vidit, minimum instar sint? Dicet aliquis . Nihil igitur sciens, diuturnoq; usu bellicarum, & ciuiliū rerum doctus ignaro eoq; , qui nullum usum in rebus habeat, nullaq; re præstabit? In agendo innumerabilibus, in scribendo nulla, aut perexigua. neq; enim rei militaris rudis aciem instruere, omniq; bellica ratione firmare, tempora pugnae cognoscere, hostem ad pugnandi necessitatem suo tempore, hosti alieno adigere , quæ in rem fuerint, imperare, locum idoneum castris capere , per hostiles fines tuto ducere, e saltuosis, & impeditis locis incolumis euadere , insidias cauere , & struere , com meatu, & annonam sibi expedire, hosti intercludere, ad subita belli consilio præparatum esse, hæc, & sexcenta alia imperatorij muneris magna, & præclara egregius belli Dux facile expediet . quemadmodum si in consilijs Principum anceps, & ardua incidat deliberatio, is qui diuturnum usum gerendæ reipublicæ habet, magnamq; prudentiam est consecutus, difficultates suborientes cōsilio facile expediet, futura providebit, quæq; in rem sunt, consulēt, firmisq; , & solidis rationibus cōtraria, & damnosa suadentes refellet, errores aperiet, alijsq; veluti lumen prudentia sua præferet, ac quid in deliberando sequendum, quid repudiandum sit, demonstrabit, hæc omnia splendida, & magnifica, quæq; bonum, & salutē publicam cōtinent periti, & gnari præstabunt; illorumq; auctoritas, & cōsiliū numinis cuiusdā instar ceteris erit; contra imperitus nulloq; usu

vsu tractandæ reipublicæ eruditus æstuabit, & hærebit,
 ignotoq; onere obruetur. idem tamen si eloquentia scri-
 bendiq; facultate superior sit, ingenioq; poleat, si modo
 diligens in perquirendo, & cognoscendo fuerit, eas ipsas
 res gestas longe planius, & distinctus, quàm ij ipsi rerum, &
 consiliorum auctores scribet, copiosiusq;, & ornatus ex-
 plicabit. quàm rem consiliorum auctores ægre ferre, aut in-
 dignari nō debent, facileq; pati, naturam ita partitam inter
 homines munera, ut cum ipsi in rebus gerendis excellent,
 quæ res altissimum in humanis rebus locum obtinet, scri-
 bendiq; facultatē magno interuallo antecedit, in secunda
 hac laude se se esse inferiores. Extremo loco in conciones
 inuadunt, quas viri ex omni sæculorū memoria acutissimi
 in historia rectas ferendas esse negant, cū obliquas nō rei-
 ciant. rectas vocāt Prosopopœias; obliquas, non cū per-
 sona ipsa loquens inducitur, sed cū quæ dixit aliquis, nos
 ipsi tamquàm nostris verbis nostraq; persona narramus. Ve-
 ritati enim, cui rei studere in primis historia debet, proso-
 popœiam perspicue aduersari affirmant. Eiusmodi enim
 orationes à se confictas, ne ipsos quidē scriptores negare.
 proinde ingens flagitiū ab ijs fieri, qui ingenij, & eloquen-
 tiæ ostentandæ studio a veritate palam defleant. quæ
 opinio si vera est, vanitatis, & mēdacij omnes omniū sæcu-
 lorum, omniumq; gentiū, ut superius diximus, scriptores
 coarguit. Quod nouū istud tantū veritatis studiū nostram
 ætatē tenet? quod veteribus ita ignotū fuit, ut Lucianus,
 is, cuius aculeos nulla non modo professio, ac nemo om-
 nino mortaliū, sed ne Deorum quidē ullus ex cōmentitijs
 illis effugit, cōciones historicorū intractas reliquerit, quin
 etiam illas laudarit, licereque in illis *ψυποποιεῖν* affirmarit.
 Quam vereor, ne eiusmodi homines, dum in veritate
 retinenda supra ceteras ætates religiosi volunt videri,
 ad superstitionem incubuerint. nam cum historia non
 res tantum, quæ manu geruntur, narret, sed con-
 filia

filia quoque , & caussas necessario cum illis con-
 ðat ; neque enim alia res ab alia separari potest , con-
 filia autem , & caussæ loquendo explicentur , non video
 quomodo magis a veritate recedat is , qui auctorem con-
 filiorum ipsum sua persona loquentem inducit , profopo-
 poeiamque in historia inserit , quam is , qui Senatorem ,
 aut Ducem non loquentem ipsum , sed hæc illū dixisse
 ipse sua persona refert . quod hoc exemplo planum facio .
 » Tuum est Serui , si vir es , Regnum , non eorum , qui alienis
 » manibus pessimum facinus fecere . Erige te , Deosque
 » duces sequere , qui clarum hoc fore caput diuino quon-
 » dam circumfuso igne portenderunt . Nunc te illa cælestis
 » excitet flamma : nunc expergiscere vere . Et nos peregrini
 » regnauimus . qui sis , non vnde natus sis , reputa . si tua re
 » subita consilia torpent , at tu mea consilia sequere . Qui
 magis quæso a veritate recessit Liuius , hæc inducta pro-
 fopopoeia , quam si ipse , quæ dixit Tanaquil , suis verbis
 suaque persona ita rettulisset . Ipsius esset , si vir esset , Regnū ,
 non eorum , qui alienis manibus pessimū facinus fecerunt ;
 erigeret se , Deosque duces sequeretur , qui clarum illud
 fore caput diuino quondam circumfuso igne portende-
 runt . nunc ipsum illa cælestis excitaret flamma , nunc ex-
 pergisceretur vere . & se peregrinos regnasse ; qui esset ,
 non vnde natus esset , reputaret , si illius re subita consilia
 torperent , at sua consilia sequeretur . Doceant igitur
 Religiosi isti veritatis patroni , quid tandem intersit ,
 hoc an illo modo verba concipiantur , nam ego diffe-
 rentiam excogitare nullam possum . Deinde quæro in
 verbis ne , ac forma verborum , an in re veritas sit . at om-
 nem dubitationem tollit definitio ipsa , quæ docet , veri-
 tatem esse rem intelligendi facultati æquatam . quod si
 ita est , quid tandem refert , his ne an illis verbis , hac an
 illa verborum forma recta ne an obliqua concione rem
 pronuntiemus , modo a sententia ne discedamus ? Tum
 autem

autem illud quæro, quamobrem a rectis concionibus tantopere isti abhorreant. quod in illis, inquit, multa ponantur, quæ ij, qui conciones habuerunt, ne somniant quidem. Vt hoc verum sit, idem vitium est in obliquis concionibus, quas si ipsas quoque tollere volunt, eadem opera & historiam tollant licet. scribi enim sine illis prorsus non potest. ex rebus enim, quæ manu geruntur, & quæ sermone pronuntiantur, narratio historica constat. Omnino nugatorium est, verba aucupari, atque ad ea velle rem, & veritatem desectere. quod si suscipitur, iam ne quotidianæ quidem narrationes inter nos cohærebunt. nemo enim est tanta memoria præditus, qui quæ de altero audiuit, ea ipse iisdem totidemque verbis expressa reddere memoriter possit. Sententia igitur inspicienda est, in qua veritas posita est. nam si verba sequimur, ad incertum fides reuocabitur, neque ullus sermo verus erit. At enim historiæ scriptores dum famam ingenij, & eloquentiæ nimium captant, non modo verba immutant, variisque elocutionum formis res exornant, sed rem dilatant, multosque ambitus faciunt, ac multa addunt, quamplurimasque sententias de suo inserunt, atque eas interdum e media Philosophia sumptas, grauiioresque & sapientiores quam ut illæ ipsis concionum auctoribus umquam in mentem venire potuerint. ut hac in re Historici cum Poetis in fingendo certare videantur. Primum, ut hæc vera sint, idem tamen vitium esse potest, & vero est in concionibus obliquis. neque enim minus à scriptoribus minoreue arte elaborantur, quam rectæ. quas tamen obliquas conciones in inuidiam ipsi non vocant. Deinde non negabo, scriptores multa in concionibus sæpe addere de suo, & nunc obrectatores aliquid dicere concedam. Verum illud monitos omnes volo, me non de quocumque historiæ scriptore, sed de egregio scriptore loqui, qui quæ sint scriptoris partes, & scientia teneat, & facultate valeat ex-

E

plicare.

plicare. quod opus magnum est, magnique ingenij, ac magnæ eloquentiæ. Vt Cicero, is, qui summum oratorem ceteris artibus, ac facultatibus anteferre, ac pene cum diuina laude coniungere non dubitet, haud se scire dicat, an historia sit omnium oratoris munerum maximum. Sed nescio, quo humani ingenij vitio fiat, vt cum ceteras artes humiles ac sordidas, quæque in perdiscendo non multi sint laboris, ac temporis, quæque sint mediocri ingenio contentæ, nemo tamen ad illas tractandas nisi gnarus accedat; quique illas a Magistro non perdidicerit, is se se illarum inscium, ac rudem, neque ad opus artis illius faciendum aptum fateri non erubescat. at eas facultates, quæ in rebus humanis maxime excellunt, quæque non nisi diuturno vsu, ac labore percipi possunt, & quæ tarda, atque hebetia ingenia magnitudine, ac difficultate sua a se repellunt, nemo attingere expauescat, nemoque non se se magnum aliquod in illis præstare posse confidat. nemo enim est, qui non se se ad rempublicam consilio, & sapientia regendam in primis idoneum putet, qui non se satis virium ad eius grauissimas partes sustinendas habere confidat, qui non se se dignum existimet, qui summum auctoritatis locum in consilijs Principum obtineat, atque in deliberationibus de maximis rebus, ac de summa republica princeps sententiam rogetur; cui non summi magistratus, ac grauissimæ procuraciones mandentur; qui non moribus regendis, ac legibus ferendis præficiatur; quin etiam quosdam noui, quos tanta sui ignoratio teneat, quique eo temeritatis, & arrogantiae prouchi se sinant, vt cum numquam aciem viderint, confidant tamen, si exercitibus præficiantur, se se præstantissimos belli Duces illico euasuros. Quod vitij est in rebus ciuilibus, atque in ijs facultatibus, quæ sunt ad actiones, & ad reipublicæ procuracionem dispositæ, idem videmus in litterarum, & doctrinæ

Grinæ studijs vsu venire . in quibus cum a ceteris facultatibus, quibus non studuerunt, homines abstineant, nemo tamen est, qui non se ad poemata conficienda, & ad historiam conscribendam aptum putet. quare fit, vt ætate nostra plures fere rerum scriptores, quam actores habeamus. qui cum infelicitè in multis suscepti muneris partibus versentur, tum in concionibus, quæ grauissima, & omnium maximâ pars est, quæque veluti oculus totum historiæ corpus illuminat, ac proinde ingenio, & eloquentia quam maxime opus habet, in primis peccant, idque dupliciter. nam alij ita ieiuni sunt, & exiles, ita nulla inuentione, nulla amplificandi, & exornandi vi, vt imbecillitate sua rem eneruent, ac deprimant, atque adeo obruant, ac iugulent. qui homines recte faciant, si a concionibus abstineant; rectius, si historiam omnino non attingant. alij contrario vitio laborant, qui nimia ostentandi ingenij cupiditate prouecti legis historiæ obliuiscuntur, easque orationes, easque sententias loquentibus affingunt, quæ neque loquentibus vlllo modo conueniant, neque non modo veræ non sint, sed ne verisimiles quidem. qui homines mihi non intelligere videntur quantum inter Philosophum in scholis, atque in coetu doctorum, & ingeniosorum virorum disputantem, præceptaque viuendi tradentem; & ciuilem virum in concione, & in imperitorum turba verba facientem intersit; neque meminisse quantum vtriusque munera inter se discrepent. Est enim Philosophi de proposita questione prolixè, & copiose disserere, eamque omni argumentorum genere tractare, ac rem disputandi subtilitate enucleare, & veritatem ad tenue limare, easque rationes, & sententias sæpe afferre, quæ ab imperitorum sensu, & intelligentia sint disiunctæ. At longe diuersa dicendi via in foro concionanti, aut etiam in Senatu verba facienti ingredienda est. nam neque infinitam illam argumentorum copiam.

persequi necesse habet, quam multitudinis aures alijs negotijs distentæ ferre non possunt, rationibusque in differendo ijs vti debet, quæ in medio positæ, & in usu, atque in hominum more, & sermone versantur, quæque non a vulgari genere orationis; neque à consuetudine communis vitæ abhorreant; in quibus denique nihil sit reconditi, aut longe petiti, vt demum rationes, quas afferat, a re ipsa subijci, nõ a concionantis ingenio fingi, & excogitari videantur, in primis ne scholam redoleant; sed omnis oratio ad aures, & sensus audientium accommodetur. aliter enim fidem, & auctoritatem amittet, auditoresque ita concionantem non ad suadenda quæ in rem iudicat, sed ad ipsos decipiendos processisse existimabunt. a quibus vitijs quemadmodum ij, qui vel ad multitudinem, vel ad exercitum, vel in Senatu, vel in consilijs Regum verba faciunt, solent abstinere, neque oratione nimis in speciem elaborata vtuntur, neque sententias, ac rationes nimis reconditis e locis erutas, aut nimis longe accersitas consueverunt usurpare, ita bonus quoque historicus in prosopopœia virorum prudentia, & ingenio præstantium inducenda ab illis ipse quoque abstinebit, neque quæ dici possint, studiose vndique conquisita sine vllò delectu in concionibus inculcabit, sed quæ rationes, ac sententiæ hominibus in foro, ac curia diu multumque versatis venire in mentem solent, eas illos dicentes inducet. cumque verisimile sit illos ita locutos, quis tandem falsi historici præsertim diligentem arguere possit? aut pugnare, non ita concionantem locutum? cum præsertim historiæ scriptor neque gregarijs militibus, neque de infima plebe hominibus, in quorum oratione propter humilitatem, ac propter rerum incertitiam nulla sit auctoritas, ac pondus, neque rursus hominibus, qui in scholis, atque in otio litterarum totam ætatem egerint ciuiliū vsuum expertibus conciones assignet, sed eos viros loquentes faciat, quos verum est locutos

locutos esse, hoc est, quorum consilium, & prudentia multis locis spectata sit, quiq; magnum vsum in rerum administratione, ac proinde magnam auctoritatem consecuti sint, vel aliquam, neq; eam infimā reipublicæ partem gerant. qui hæc non seruant historiæ scriptores, neq; hunc hominum, & rerum delectū habent, sed quæcumque passim inculcant, atque in exquisitis, & abditis rationibus, & a communi usu, & sensu remotis, quæq; vulgarem captum superent, inueniendis, & excogitandis, ac confingendis ingeniosi videri volunt, ij neque eam, quam nimis auide consecuntur, gloriam assequuntur, & mendacij se ipsos arguunt. quod crimen cum omni professioni turpe est, tum vero in historia abominandum. At qui ad clarorum scriptorum imitationem se se conformant, illorumque insistant vestigijs, ea dicunt in concionibus, quæ homines communi, & vsitata, ac forensi prudentia præditi solent pronuntiare, argumentaque, & rationes, e schola petitas, quæque reconditam illam sapientiam præferunt, vt ab auribus multitudinis, & forensium virorum respuuntur, ita ipsi quoque reiiciunt, cumque eadem, quæ quiuis e numero prudentium, & ciuiliū virorum dicturus fuerat, ipsi dixerint, eo tamen modo dicent, quo nemo dicturus fuerat; mirasque sui admirationes excitabunt, quippe qui eloquentiæ, & ingenij vi facultateq; dicendi, & copia consecuti sint, vt res eadem longe diuersæ videantur ab ipsis pronuntiata; resq; per se humiles, & exiles amplæ, ac magnæ videantur rhetoricis coloribus illustrata, verborumque splendore, atq; orationis vi auctæ, & ornata. quā rem duobus Liuij locis demonstrare sat habeo, cum innumeris possim. A consilio manus cum Annibale conferendæ Aemiliū ad exercitum proficiscentem reuocare aggreditur Fabius, cuius rei flagrantem cupiditatem collega Varro præferebat. Quis Fabium in hac sententiam abnuat locutum? Nō ideo se collo-

colloquium illius Collegæ petisse, quod animus pugnandi cupiditate insaniens, nihil sani consilij capere posset. quare omnem sibi cum ipso vno Aemilio esse orationem. monere se igitur illum magnopere, ut stultissimo collegæ & furentis multitudinis prælium deposcentis insanis vocibus constanter resistat; neque cum Annibale hoste tot victorijs feroce villo modo manū conferat, quæ cunctando; & extrahendo haud dubie Romani sint superaturi, cum omnia illum deficient, omniaq; inimica, & infesta vndiq; circumstent in alieno, & hostili solo omniū necessariarū rerum inopem, & egentem, ut haud dubie onere, quod diu sustinere iam nō possit, ipsis sedentibus, sineq; villo ipso forum, aut reipublicæ discrimine sit opprimendus. contra ipsis omnia ad ducendū bellum abunde suppeditare, qui in sua terra tot Ciuium, & sociorū auxilijs circumsepti bellum gerant. proinde a fortuna prælij tentanda etiam, atq; etiam abstineat, neq; rempublicā temere in tam præcipitè casum det, suumq; ipsius Fabij exemplū & proximorum consulum sapientiā, potius quā Flaminijs temeritatem sibi imitandam ducat. Quis igitur Fabium talem virum neget dixisse, quæ res ipsa vel mediocriter sapienti suggestisset, quæque cuius vel tardo ingenio, modo idem cum Fabio sentiret, venissent in mentē. Age videamus, quemadmodum illa ipsa a Fabio pronuntiata Liuius nihil de suo ad sententiam addens, nullasque reconditas rationes conquirens admirabili eloquentia sua explicet, atque exornet, ut cum nihila Fabij sententia recedat eademque dicat, longe tamen plura, & præclariora dicere videatur. qua in re neq. a veritate desectitur, & maior ingenij, & eloquentiæ vis exprimitur, quam in numero exquisitarum rationum, & confictorum argumentorum agmine veritatem obruendo. oratio a Liuijs ita composita est. Si
 „ aut collegam (id quod mallet) tui similem L. Aemili haberes,
 „ aut tu collegæ similis esses, superuacanea esset
 oratio

„ oratio mea . nam & duo boni consules etiam me tacente
„ omnia e republica fide vestra faceretis , & mali nec mea .
„ verba auribus vestris , nec consilia animis acciperetis .
„ Nunc & collegam tuum , & te talem virum intuenti mihi
„ tecum omnis oratio est . quem video nequidquam & vi-
„ rum bonum , & ciuem fore , si altera parte claudicet res-
„ publica , malis consilijs idem , ac bonis iuris , & potesta-
„ tis erit . Erras enim Luci Paulle , si tibi minus certaminis
„ cum C. Terentio , quàm cum Annibale futurum censes .
„ nescio an infestior hic aduersarius , quàm ille hostis maneat .
„ & cum illo in acie tantum , cum hoc omnibus locis , ac
„ temporibus certaturus es ; aduersus Annibalem , legiones-
„ que eius tuis equitibus , ac peditibus pugnandum tibi est ;
„ Varro Dux tuis militibus te est oppugnaturus . Ominis est
„ tibi caussa absit C. Flaminij memoria . tamen ille Consul
„ demum , & in Prouincia , & ad exercitum coepit furere , hic
„ priusquàm peteret consulatû ; deinde in petendo consulatu ,
„ nunc quoq; Consul priusquàm castra viderit , aut hostem in-
„ sanit . & qui tantas iam nunc procellas , proelia , atq; acies
„ iactando inter togatos ciet , quid inter armatam iuuentutem
„ censes facturum ? & vbi extemplo verba res sequitur ? At-
„ qui si hic , quod facturum se denuntiat , extemplo pugnaverit ,
„ aut ego rem militarem , belli hoc genus , hostem hunc ignoro ,
„ aut nobilior alius Trasymeno locus nostris cladibus
„ crit . Nec gloriandi tempus aduersus unum est , & ego con-
„ temnendo potius , quam appetendo gloriam modum ex-
„ cefferim : sed ita res habet . Vna ratio belli gerendi aduer-
„ sus Annibalem est , qua ego gessi . nec euentus modo hoc
„ docet ; stultorum iste magister est , sed eadem ratio , quæ
„ fuit , futuraq; donec res eadem manebunt , immutabilis
„ est . in Italia bellum gerimus ; in sede ac solo nostro ; om-
„ nia circa plena Ciuium , ac sociorum sunt , armis , viris ,
„ equis , commeatibus iuuant , iuuabuntque , id iam fidei
„ documentum in aduersis nostris rebus dederunt . meliores
pruden-

„ prudentiores, constantiores nos tempus, diesque facit.
 „ Annibal contra in aliena, in hostili est terra: inter omnia
 „ inimica, infestaque, procul a domo, procul a Patria; neque
 „ illi terra, neque mari est pax; nullæ eum vrbes recipiunt,
 „ nulla mœnia, nihil vsquam sui videt; in diem rapto viuunt;
 „ partem vix tertiam exercitus eius habet, quem Iberum
 „ amnem traiecit. plures fames, quam ferrum absumpsit,
 „ nec his paucis iam victus suppeditat. Dubitas ergo quin
 „ eum sedendo superaturi simus, qui senescat in dies? non
 „ commeatus, non supplementum, non pecunias habeat?
 „ Quandiu pro Geryonis castelli Apuliæ inopis tamquam
 „ pro Carthaginis mœnibus pugnatum est. sed ne aduersus
 „ te quidē gloriabor. Gneus Seruilius, atque Attilius pro-
 „ ximi Coss. vide quemadmodum eum ludificati sint. Hæc
 „ vna salutis est via L. Paulle, quam difficilem infestamque
 „ ciues tibi magis, quam hostes facient. idem enim tui,
 „ quod hostium milites volent: idem Varro Cōsul Roma-
 „ nus, quod Annibal Pœnus Imperator cupiet. duobus
 „ Ducibus vnus resistas oportet. resistes autem aduersus
 „ famam, rumoresque hominum si satis firmus steteris; si
 „ te neque collegæ vana gloria, neque tua falsa infamia mo-
 „ uerit. A veritate laborare nimis ius sæpe aiunt, extingui
 „ numquam. Gloriam qui spreuerit, veram habebit. sine
 „ timidum pro cauto, tardum pro considerato, imbellem
 „ pro perito belli vocent. malo te sapiens hostis metuat,
 „ quam stulti Ciues laudent. omnia audentem contemnet
 „ Annibal, nil temere agentem metuet. Nec ego vt nihil
 „ agatur, sed vt agentem te ratio ducat, nō fortuna moneo;
 „ tuæ potestatis semper, tuæque omnia sint. armatus intētusque
 „ sis. neque occasione tuæ desis, neque suam occasionem
 „ hosti des. omnia non properanti certa, claraque erunt.
 „ festinatio improvida est, & cæca. Hæc Liuius. Age alte-
 „ rum locum subiungamus, non minore verborum splen-
 „ dore illustratum, neque minoribus ornamentis variatum &
 amplifi-

amplificatum, ne verbo quidem ad sententiam addito. Cum legati captiuorum, qui e Cannensi clade superfuerant, & in potestatem hostium venerant, permissu Annibalis Romā venissent, iureiurando dato, se se legatione obita reuersuros, miserabilique oratione calamitates suas Senatui exposuissent, petissentque, vt tot Ciuum suorum misericordia patres caperet, eosque e durissima seruitute redimere in animum inducerent; ac multi ex Senatoribus lugentiū fletu, & supplicium imagine flecterentur. L. Manlius Torquatus vir priscae seueritatis, ac gentilitiae duritatis acerba, & vehementi oratione in eorum ignauiam inuectus illos nullo modo redimendos censuit. qui cum silentio noctis, omnibusque apud hostem solutis & neglectis acri eruptione in tutum euadere potuerint, id tentare ausi non sint, neque praetimore fortissimam illam sexcentorum manum, quae Duce Sempronio per summam virtutem, & audaciam per medios hostes incolumis erupit, secuti, sed subita, ac turpi deditione se se, & castra hosti prodiderint. Oratio Livijs talis est. Si tantummodo postulassent legati pro ijs, qui in hostium potestate sunt, vt redimerentur, sine vllius insectatione eorum breui sententiam peregissem. quid enim aliud, quam admonendi essetis, vt morem traditum à Patribus necessario ad rem militarem exemplo seruaretis? nunc autem cum prope gloriati sint, quod se hostibus dederint, praeferrique non captis modo in acie ab hostibus, sed etiam ijs, qui Venusiam, Canusiumque peruenierunt, atque ipsi C. Terrentio Consuli æquum censuerint, nihil vos eorum P. C. quae illic acta sunt, ignorare patiar. Atque vtinam hæc quae apud vos acturus sum, Canusij apud ipsum exercitum agerem optimum testem ignaviae cuiusque, & virtutis, aut vnus saltem adesset P. Sempronius, quæ si isti Ducem secuti essent, milites hodie in castris Romanis, non captiui in hostium potestate essent; &

„cum fessis pugnando hostibus, tum victoria lætis, & ipsis
 „plerisque regressis in castra sua noctem ad erumpendum
 „liberam habuissent, neq; per se ipsi id facere conati sunt,
 „neque alium sequi voluerunt. Nocte prope tota P. Sem-
 „pronius Tuditanus nō destitit admonere adhortariq; eos
 „dum paucitas hostium circa castra, dum quies, ac silen-
 „tium esset, dum nox incœptum tegeret, se Ducem seque-
 „rentur: ante lucem peruenire in tuta loca in sociorum Vr-
 „bes posse. Sicut auorum memoria P. Decius Trib: mil:
 „in Samnio: sicut nobis adolescentibus priori Punico bel-
 „lo Calpurnius Flamma trecentis voluntarijs, cum ad tu-
 „mulum eos capiēdum situm inter medios hostes duceret
 „dixit. Moriamur milites, & morte nostra eripiamus ex
 „obsidione circumuentas legiones: Si hoc P. Sempronius
 „diceret: nec viros quidem, nec Romanos vos duceret, si
 „nemo tantæ virtutis existeret comes. Viam non ad glo-
 „riam magis, quam ad salutem ferentem demonstrat: du-
 „cem se in Patriam ad parentes, ad coniuges, ac liberos
 „facit: vt seruemini deest vobis animus; quid si moriendū
 „pro patria esset, faceretis? Quinquaginta millia ciuium so-
 „ciorumque circa vos eo ipso die caesa iacent: si tot exem-
 „pla virtutis non mouerunt, nihil vmquam mouebit: si tan-
 „ta clades vobis vilem vitam non fecit, nulla faciet. liberi
 „atq; incolumes desiderate Patriam, imo desiderate, dum
 „Patria est, dum ciues eius estis. Sero nunc desideratis,
 „diminuti capite, abalienati iure Ciuium, serui Carthagi-
 „nensium facti. Pretio redituri estis eo, vnde ignauia, ac
 „nequitia abestis. P. Sempronium ciuem vestrum non au-
 „distis arma capere, ac se iubentē sequi; Annibalem paullo
 „post audistis castra prodi, & arma tradi iubentē? Quā ego
 „ignauiam istorū accuso, cum scelus possim accusare? non
 „enim modo sequi recusarunt bene monentem, sed obfi-
 „stere, ac retinere conati sunt, ni strictis gladijs viri fortis-
 „simi inertes summouissent. prius, inquam P. Sempronio
 per ci-

„per ciuū agmen, quā per hostiū, fuit erumpendum.
„Hos ciues Patria desideret, quorum si ceteri similes fuif-
„sent, neminem hodie ex ijs, qui ad Cannas pugnauerunt,
„ciuem haberet? E millibus septem armatorum sexcenti
„extiterunt, qui erumpere auderent, qui in Patriam liberi,
„atque armati redirent: neque ijs quadraginta millia hosti-
„um obstitere. quam tutum iter duarum prope legionum
„agmini futurum censeris fuisse? haberetis hodie viginti
„millia armatorum Canusij fortia, fidelia P. C. Nunc au-
„tem quemadmodum hi boni fidelesque (nam fortes ne
„ipsi quidem dixerint) ciues esse possunt? nisi quis credere
„potest fuisse, qui erumpentibus, quin erumperent, obfi-
„stere conati sunt: aut non inuidere eos cum incolumitati,
„tum gloriæ illorum per virtutē partæ, cum sibi timorem;
„ignauiamque seruitutis ignominiosæ causā sciant. Malue-
„runt in tentorijs latentes simul lucem, atque hostem ex-
„pectare: cum silentio noctis erumpendi occasio esset. At
„enim ad erumpendum e castris defuit animus, ad tutanda
„fortiter castra animum habuerunt. dies, noctesque aliquot
„obfessi, armati se ipsi tutati vallo sunt; tandem vltima ausi,
„passique cum omnia subsidia vitæ decissent, affectisque fame
„viribus arma iam sustinere nequirent, necessitatibus
„magis humanis quàm armis victi sunt. Orto sole hostis ad
„vallum accessit, ante secundam horam nullam fortunam
„certaminis experti tradiderunt arma, ac se ipsos. Hæc
„vobis ipsorum per biduum militia fuit, cum in acie stare
„hæc pugnare decuerat, tum in castra refugerunt, cum pro
„vallo pugnandum erat, castra tradiderunt, neque in acie,
„neque in castris viles. Vos redimam? cum erumpere
„castris oportet, cunctamini, ac manetis; cum manere, &
„castra tutari necesse est, & castra, & arma, & vos ipsos
„traditis hosti. Ego non magis istos redimendos P. C.
„censeo, quam illos dedendos Annibali, qui per medios
„hostes e castris eruperunt, ac per summam virtutem se

Patriæ restituerunt. Hactenus Liuius. Nihil amplius sententia complectitur, quàm ea quæ superius proposui, quæque minus decima verborum parte perstrinxi. nec quidquam præterea rationum, aut conquisitorum argumentorum inculcat oratio a Liuiio composita, si quis singula verba acri attentione perpendat. Qui autem paucioribus quiuvis quamuis infans, qui non redimendos captiuos censeret, agere potuisset? Vt nemo inficiari possit, omnia hæc non modo verisimiliter, sed ne cessario a Mælio pronuntiata, nihilque propterea à veritate declinare Liuium, neque quidquam de suo affingere nisi ornamenta, & Rhetorum pompam, quæ dictionem illustrant, veritatem non corrumpunt. Quid est igitur, quod isti vociferentur? Cælum, ac terras misceant? clament pro historijs poemata nos habere? Ecquid intelligunt, quam magno conatu, magnas nugas dicant? Atenim non omnes Liuij similes sunt, sed sæpe historiam scribentes Senatorem, ac ciuilem virum in omni litterarum, & studiorum genere rudem; aut virum militarem omnis elegantis eruditionis plane expertem, quiq;ne scholas vix vnumquam nominari audierit, in re improuisa, ac subita orationem habentem inducunt ita omnibus coloribus artis pictam, vt Rhetorum officinas omnes pene compilasse videantur, eamq; acutissimorum argumentorum, & conquisitissimarum rationum vim infarciunt, quæ otiosus Philosophus annua meditatione, perfectumque ciuilem virum informare intendens vix inueniat. Vt hoc illis dem. quid tum postea? an vnius error omnibus inuidiosus esse debet, paucorumque inscienter facultate scribendi abutentium inuidia omnem historicorum cœtum premi æquum est? prauum vsum concionum damnent; conciones ipsas ne tollant. nam eadem opera omnia artificia tollât licebit, si nonnullorum artificum inscitiam, qui opus imperitia sua corrumpunt, ad artificia ipsa transferant. Dicet aliquis,

quis, quid? non hæc saltem Rhetorum ornamenta, quæ passim in orationibus inculcantur, atque adeo multo maximam partem illarum occupant, ficta esse concedis, atque a concionantibus ne cogitata quidem? quæque hominum videlicet nulla eleganti eruditione perpolitum facultatem, & captum superantia ne somnari quidem ab illis potuerint? quomodo igitur non fallant, qui ea homines loquentes faciant, quæcumque tandem, & cuiuscumque generis sint, quæ numquam illi locuti sint? quomodo igitur ex hoc laqueo te euolues? nullus est facilius exitus. Plurimum inter se differre dico, alia dicere, atque alio modo dicere. is enim qui alia dicit, mentitur profecto, at non is, qui alio modo dicit. Ut recte Diogenes Dialecticam, & Rhetoricam eandem facultatem esse dixerit; nec quidquam referre, quod alio modo res explicet, Dialectica nimirum arte, & compressæ, Rhetorica ample, ac diffuse. ut non alia est manus pugno compresso, ac palma extenta, quam rem perspicuo exemplo planam facio. Si quis dixerit Regem Hispaniarum omnium opulentissimum decem eximios equos, nec quidquam præterea Pontifici Max. dono misisse, vel decem Psitacos humanam vocem mirifice imitantes, nec quidquam præterea, mentitus is profecto fuerit, qui nihil præterea dixerit, si Rex una cum equis decem quoque mulos miserit, aut una cum Psitacis decem Indicas simias. At si Rex equos tantummodo, verum illos textili aureo aut purpura egregio aureo opere picta instratos, ad hoc aureis frenis aureisque ephippijs ornatos; vel Psitacos tantummodo, verum aureis caueis inclusos miserit, si quis hunc mentitum dicat, quod nihil præterea misisse dixerit Regem, ineptam scilicet superstitionem ita disputantis ridebimus. atqui longe maioris pretij sunt stragula & ephippia, aureæ item caueæ, quam mulæ aut simiæ. quid ita igitur virum stolidè tantum ridebimus? quia mulæ, & simiæ aliæ prorsus sunt res, suæque

que proprium vsum habent; at stragula, & caetera quamvis pretiosiores multo, non tamen res sunt, quae per se comparentur, aut vllum habeant per se vsum, sed quae veluti partes sint rerum, quibus adduntur, ac tamquam illarum appendices, & ornamenta, vt conspectius, & magnificentius, ac tanto Rege munus dignum faciât. ita Rhetorum flores, ac pigmenta, verborumq; insignia non tamquam res concionibus adduntur, sed quae lumine suo splendore concionibus addant, vt historiae maiestas postulat. Atq; ego nescio cur tantopere isti a prosopopoeia abhorreant, cum iisdem obliquas conciones non tollant, quasi vero minus sint haec, quam illae elaboratae, minoribusque verborum, & sententiarum luminibus, haec quam illae soleant insigniri? ac quasi non eadem in his, quae in illis valeat veritatis consideratio. quam si addita ornamenta vitiant, vtrumque concionis genus aequè explendum est. aequè enim vtrumque iisdem figuris, & oratorum pigmentis illustrari, hoc vnum Liuji exemplum, quod subiiciam, liquido demonstrabit. Audiebantur ita-

„ que propalam voces exprobrantium multitudini, quod
 „ defensores suos in precipitem semper locum fauore tol-
 „ lat, deinde in ipso discrimine periculi destituat. sic Sp:
 „ Cassium in agros plebem vocantem, sic Sp: Melium ab ore
 „ ciuium famem suis impensis propulsantem oppressos, sic
 „ M. Manlium mercedem, & obrutam scenore partem Ciui-
 „ tatis in libertatem, ac lucem extrahentem proditum ini-
 „ micis. Saginare plebem populares suos, vt iugulentur.
 „ Hoccine patiendum fuisse, si ad nutum Dictatoris non
 „ responderit vir Consularis? fingerent mentitum ante, atq;
 „ adeo non habuisse, quod tum responderet: cui seruo vni-
 „ quam mendacij poenam vincula fuisse? Non obuersatam
 „ esse memoriam noctis illius, quae pene vltima, atq; aeterna:
 „ nomini Romano fuerit? non speciem agminis Gallorum
 „ per Tarpeiam rupe[m] scandentis? non ipsius M. Manlij:
 „ qualem

„ qualem eum armatum, plenum sudoris, ac sanguinis, ipso
 „ pene Ioue crepto ex hostium manibus vidissent? scilicet
 „ ne farris gratiam seruatori Patriæ relatum? & quæ prope
 „ caelestem, cognomine certe Capitolino Ioui parem fece-
 „ rint, eum pati vinctum in carcere; in tenebris obnoxiam
 „ carnificis arbitrio ducere animam? adeo in vno omnibus
 „ satis auxiliij fuisse; nullam opem in tam multis vni esse?

Quod tandem exornationis genus, quod quidē subiecta
 res capere possit, hoc in loco omissum est? Atque ego
 non intelligo qualem isti historicam narrationem esse
 oportere existiment. Equidem eam optimam esse statuo,
 quæ naturam ducem sequatur, ad quam bonus historicus
 scriptiōem suam dirigere debet. quotidianus autem lo-
 quendi vsus docet, ita naturam ferre, vt in referendis ho-
 minum sermonibus, quos aut priuatim, aut publice ha-
 buerint, eos modo in prima persona, modo in tertia refe-
 ramus, idque re non cogitata, sed natura ipsa rei ita mo-
 nente. neque quenquam discrimen hoc animaduertere,
 aut reprehendere; quin etiam si aliter fiat, absurdam, &
 ineptam videri narratiōem, ac naturæ repugnantem, il-
 laque aures audientium vehementer offendi, quæ non-
 nullis in locis personam ipsam loquentem requirunt, in
 nonnullis omissa prosopopœia sermonē a narrante in ter-
 tia persona pronuntiatum. ita in historia alia sunt loca,
 quæ prosopopœiam, alia quæ obliquam orationem po-
 stulant. quæ loca facilius eruditorum auribus diuturnaq;
 bonorum scriptorum lectiōe a peritis possunt discerni,
 quàm oratione cuiusquam indicari.



43
DE . CAUSSIS . MAGNITVDINIS
TVRCARVM . IMPERII



AD . M. ANTONIVM . COLUMNAM
DVCEM . CLARISSIMVM



Agno te dolore affectū scribis Colum-
na ex pace cum Turca a Venetis facta ;
Christianorumq. vicem pudere, quod
Navalis Victoria tuo magna ex parte
ductu & consilio, qui celsissimi Principi
Ioannis Austrij socius in imperio
fueris a Foederatis Principibus parta,
qua nulla post extinctum Romanū Imperium maior aut
memorabilior fuit , ingensq. lætitia ex ea cōcepta tā cito
nobis luxuriauērit, ac spes, ad quam felicia initia piorum
animos crexerant, tam breui euanuerit, tantorumq. cō-
siliiorum apparatus ad nihilum reciderint . Ego vero
M. Ant. Clarissime dolorem, & pudorem hunc puto om-
nibus bonis tecum esse cōmunem. Venetorum vero con-
siliū quale fuerit , nec satis mihi exploratum est , nec si
maxime sit, pronuntiare necesse habeo. Sunt enim, vt ti-
bi notum est, qui illud vehementer improbent , grauitē
q. ferant, illos nimis celeri rerum desperatione defecis-
se , ac sese bello illorum in primis causa suscepto subtra-
xisse . in quam sententiam te quoque Columna audio
propendere . Sunt contra qui illos excusandos ducant, si
dimicationem cum Turca nō suarum esse virium cernen-
tes,

res, ceterasque Christianas prouincias, ac Principes nihil feliciuenu, ac tam præclare positis initijs excitatos videntes ad partem laborum, & impendiorum capeffendā, egregiamque occasionem arripiendam, atque arma cum fœderatis coniungenda, societatemque Turcarum maritimis uiribus, ut tum putabatur, nudatorum pro tot acceptis omnium temporum iniurijs ulciscendorum, atque Europa expellendorum ineundam; Germaniamque in primis sæpe a Turcis bello petitam, illorumque armis continenter uexatam, atque ingentibus detrimentis affectā; tum autem ob propinquitatem periculo proximam. Quare ea spe destitutos Venetos, ac proinde haudquaquam par sibi vel Fœderatorum societate subnixis cum Turcis certamen esse intelligentes salutaria speciosis anteferre fuisse coactos, rebusq. suis priuatim consulere, neque in suam pernitiem pertinaces esse voluisse. Disputantur hæc in utramque partem a multis pro suo cuiusque ingenio, atque adeo pro suo cuiusque studio. Nos rem incertæ existimationis in medio relinquentes, ac suo quemque iudicio nostro non interposito uti sinemus. Cum præsertim superuacanea hæc sint, factumque infectum fieri non possit, inanisque omnis sit quæ sine ullo fructu est ex postulatio. Illud potius quod fructum aliquem habere potest, ut tecum communicem, litteræ tuæ occasionem mihi dederunt, cogitationemque, quæ tacite animum meum diu multumque versauit, tibi aperiam, ac sententiam de ea re meam exponam. quam rem sine vilo operæ pretio fore omnino non puto. siue enim tibi tali sapientia & usu magnarū rerū prædito viro probabitur opinio mea, tutum me putabo ab obrectatorum calumnijs, siue minus probabitur, at occasionem scriptis meis tibi dederō errorem iam diu animo insidentem mihi eripiendi. Ego enim cum res Turcarum Christianis prouincijs formidolosas semper existimaui, tum uero hoc tempore in ma-

ximam illarum admirationē versus sum , qui ingenti classe deleta , immaniꝛue rostratarum nauium numero partim depresso , partim a nostris capto , ad hoc magna arma mentorum & bellicorum apparatus & naualium instrumentorum vi vndis hausta , præterea haud exigua fortium bellatorum ac non obscuri nominis Ducum Virorumꝛ. naualis rei peritorum , quorum vbique magna penuria est prælio absumpta , quibus rebus amissis haud facile multorumꝛue annorum spatio vires recuperaturi viderentur , tantas tamen Turcarum esse facultates , vt nihil illi tanta clade animis infraçti continuo alteram nõ minorem fere classem compararint , omnibusꝛue rebus instructam & ornatam insequentis ætatis initio e portu emiserint , quæ in conspectum victricis nostræ venire ausa sit , speciemꝛue certamen non detrectantis præbuerit . Sæpe igitur mecum quæsiui , quæ caussa tantæ imperij magnitudinis fuerit , quibusꝛue artibus Turcæ in tantas opes uenerint , tantiꝛue illorum sint in bellicis rebus progressus . Simul qua re fiat , vt tot de nostris hominibus ad illos continenter trāsugiant ; Christianaꝛue religione eiurata Mahumetanae sectæ nomina dent , cum contra nulla , aut perrara illorum ad nos fiant transfugia . Quæ mihi in hac re veniebant in mentem hæc sunt . Principio vtramque rem dolendam potius nobis esse , quàm miram videri debere . nam tot populos eiusdem religionis charitate , & necessitudine nobis coniunctos cum tanta nostra , ac multorum ex Principibus nostris ignominia durissimo seruitutis iugo premi ; neque vlla nos illorum cura attingi , nihilꝛue de ope ferenda cogitare , ingemiscendum vehementer est ; ac lugendum , tantam mentibus nostris oblatam cæcitatem , cum non magis fratrum nostrorum oppressorum miseriæ nos commouere debeant , quàm earundem rerum nobis imminens periculum sollicitos habere . latius enim hoc incendium in dies serpere vide-

re videmus, ac proxima quæque amplectendo ad vltiora peruenire; neque immanem Turcarum, & hiantem cupiditatem vllis opibus impleri, aut amplissimis, & opulentissimis partis Regnis quiescere, sed ex rebus captis ad alia sibi gradum deinceps facere. quæ res eo est ad timorem horribilior, quod cum omnis seruitus tetra per se sit res, ac morte ipsa durior, tum quæ a Turcis impendit, omnium, quæ vniquam fuerunt, atrocissimam esse, & maxime execrandam constat. Neque enim Turcæ satis habent partas prouincias imperio suo subiungere, sed omnibus quicumque ingenio, fortuna, opibus, dignitate excellunt, extinctis, tum omni nobilitate vel trucidata, vel in remotissimas terras procul amandata, ad hoc omnibus præclaris artibus, omnibusque ornamentis detractis illas in omni genere deformatas, exangues, eneçtas; ad summum squalorem horridamque intuentibus speciem redigunt. Et tot fratrum nostrorum (quod alterum ad dolorem proponebatur) plorandam ne vicem, an nefarium scelus detestandum dicam? qui exigui, caduci. boni specie decepti sempiterna, ac cælestia bona relinquunt; Christianamque religionem de cælo demissam, & ab ipso Dei immortalis filio hominibus traditam, quæ vna ad sempiternam beatitudinem, cælestiaque Regna nobis iter patefaciat, & communiat, ceteris omnibus vijs obstruētis deferant? Dolenda hæc quidem, vt initio dixi, nobis sunt M. Antoni, omni. ope contendendum, ne eadem quoque nobis accidant, neue in eundem statum, ac locū, quo nullus est in miserijs inferior, perueniamus. Verū tanta Turcarū gloria; tot. annorū felices successus nē mini in rē acute intuenti miri videri possunt. neq. .n. aut inusitata est res, aut causæ sunt obscuræ. ea planiores fiēt, si nostros, & illorum mores, instituta, consilia, disciplinam inter se cōferēdo sigillatim persequemur. Principio illud inter oēs constat in ceteris causis, quæ Regna, ac Respu-

blicas ad magnas opes, magnaniqu. potentiã extollant; atq. imperium augment, religionem primas obtinere. Religionis autem duplex est munus, alterum præstantissimum illud ac Diuinum, cuius caussa religio ipsa hominum mētib. Diuinitus insinuata est, quod sese illa nobis ad cælestem, & immortalem beatitudinem, vt dixi, unam, & certissimam Duce[m] præbet, quo dono nullum a Diuino Numine ad homines maius peruenire potest, quodque eiusmodi est, vt omnes opes, & voluptates, omniaque Regna, & Imperia, & cetera humana omnia præ illo sordida, & nullius pretij sint. Quid enim (inquit Dominus) mortalibus profuerit orbis imperio potiri; atque interea animæ suæ damnum facere? Alterum illud est religionis munus, quod ad remp. gerendam; populosque in officio, & legum obseruatione continendos pertinet, ad quã rem sapientes uiros; quique ciuitates condiderunt; & respublicas instituerunt, religione vsos esse, omnium sæculorum monumenta testantur. quæ res non modo de Religionis maiestate nihil detrahit, sed eam suspiciendam magis facit, quod multiplex sit eius vsus; seseque illa in humanas quoque res gerendas, & moderandas, ac Ciuitates conseruandas utilitate sua fundat. De primo illo nobilissimo munere nullus nobis in præsentia erit sermo. neque enim ad institutam nostram disputationem quidquã pertinet. Illud tantum obiter attigisse sufficiat, omnem Christianis hominibus ætatem esse debere in gratijs Diuino Numini agendis, cuius beneficio eximij fuerimus, qui cæleste hoc veræ religionis mentibus hominum prælatum lumen soli agnoscere[m]us altissimis errorum tenebris discussis, quibus religionis nostræ expertium mentes cæcæ sunt; infinitoque interuallo Christianam conditionē Mahumetanis præstare, qui nefarij impostoris commētis decepti; impiaq. dogmata sequentes a cælesti itinere auersi ad infima tartara sempiternosque cruciatus præcipites

pites rapiuntur. Verum hæc, vt diximus, alterius sermōnis sunt. quare veniamus ad eam partem, quæ institutæ quæstionis propria est. in qua nihil refert, vtrum vera, an falsa sit religio. nam hoc, vt diximus, ad animarum salutem tantum valet, sed omnia in eo posita sunt, vt religio quæcumque tandem illa sit, caste, & integre obseruetur. Huius autem religionis in primis præsidio Regna, & Populos ad amplissimas opes peruenire, atque ad altissimum dignitatis, & potentiae locum ascendere cum firmissima ratione demonstratur, tum clarissimis exemplis comprobatur. Nam cum præcipua sit augendi Imperij rei militaris, ac bellicæ virtutis via; res porro militaris duabus in primis rebus contineatur obedientia, & disciplina, vtriusque rei fundamentum est religio. quo factum est, vt omnes populi quicumque ad magnam potentiam, & gloriam peruenerunt, iidem religionis diligentissimi cultores fuerint. Verum, vt ceteros omittam, Romanorum exemplo contentus ero, qui omnibus populis non minus humana sapientia, quàm opibus, & gloria præstiterunt. Intelligentes igitur viri sapientissimi ad rempublicam amplificandam, imperiumque propagandum, maxima, ac præcipua esse religionis momenta, de nulla re tantopere laborarunt, quàm de eius cultu tuendo; Diuinique Numinis metu, & opinione populo insinuanda. Quare religioni tantum semper tribuerunt, vt nihil neque publicæ, neque priuatæ rei nisi Dijs auctoribus gererent. Nihil igitur inchoabant, nullum negotiū ingrediebantur; nullam expeditionem suscipiebant, nullum prælium inibant nisi auspicato. Nihilque aliud agebant votis nuncupandis, & persoluendis, templis dicandis, prodigijs, quæ nuntiabantur, quibus numquam a sapientibus illorum sæculorum viris abrogata est fides, procurandis, pace Deorum sacrificijs, & supplicationibus exposcenda, quàm vt populo persuaderent, omnia Deorum nutu fieri, & regi; cosque omnia

nia humana animaduertere . ac cum omniū scelerum tum
sui in primis numinis spreti, ac violati acerrimos esse vin-
dices . quo fiebat , vt Romanus Populus nullum crimen
atrocius duceret, quam iusiurandum violare . cuius quāta
fuerit religio, vel illo exemplo clarissime patet, cum Con-
sul, vt populum a legum cura , quas Tribuni plebis pro-
mulgarant, & a concionibus auerteret, se se legiones in
expeditionem ducturum pronuntiauit . Cuius militiæ de-
trectandæ cum nulla esset via, neq; in Tribunitia interces-
sione quidquam præsidij, quod in verba Consulis iam an-
tea iurassent ; nullaque ostenderetur se se religione exol-
uendi ratio, quàm Consule de medio tollendo, consilium
cœperunt Consul interficiendi . & habuisset res effe-
ctum, nisi edocui fuissent, nullā scelere religionem exolui.
lenius videlicet cædis, quàm violati iurisiurandi crimen
putantes . quæ res milites dicto Imperatorum audientes
faciebat, in cuius verba iurauerant . vt is populus, qui
in pace togatus tam contumax esse soleret, tamque ad
seditiones promptus, idem in bello, & armatus, quæ
res hominibus animos, & spiritus facere solet, tam mitis,
ac continens esset ; iurisiurandi religione in bello vi-
delicet obstrictus, qua in pace erat solutus . cuius tanta
vis erat, vt eius obseruationem suæ ipsorum animæ ante-
ferrent ; ceruicesq; securi haud retractantes subiicerent,
si quando male gesta re Consul more militari in deci-
mum quemque capitali supplicio animaduertere consti-
tuisset . Qua re fiebat, vt ancipiti mortis timore , & ab
hoste, & ab Imperatore proposito milites strenuam, &
audacem operam in prælio nauarent ; ac potius quàm
aciem defererent, fortiter pugnantes occumberent . ne
incertæ mortis metu, cuius periculum virtute, & audacia
discutere poterant, in certam cuiusque effugiendæ omnis
a religione præcideretur spes, inciderent . Nemo igitur
fauus negauerit religionem cum totius publicæ, tum in
primis

primis bellicæ rei firmissimū esse fundamentum. Ab utris porro sanctius, & castius a Turcis ne, an a nobis hæc ipsa religio colatur, malo in aliena existimatione relinquere, quam ipse sententia mea statuere. nonnulla tantum persequar, quæ mihi veniebant in mentem. Principio cum illæ religionis præcipuæ sint partes, ut omnia ad Diuinum Numen referantur, eiusque voluntate omnia humana regi, & gubernari putemus; mirum est quantum Turcæ ea in re nos antecellant, quamque hanc opinionem mentibus penitus insitam habeant, qui Diuinæ providentiæ tantum tribuunt, ut ea in re nimij sint, quippe qui omnia ad fati necessitatem reuocent nullis humanis consilijs euitabile. quare unicuique terminū vitæ fato statutum putant, qui neque proferri, neque contrahi possit: proinde cum præstituta mortis hora venerit, eam omnino esse obeundam; ac nihilominus esse moriendū, si in cubiculo tuo clausus procul ab omni discrimine fueris, quā si in medio pugnæ ardore inter mille in te vnum intenta tela verferis; si non venerit, te ab eiusdem telis iugulum tuū petentibus nihilo minus, quā in cubiculo tutū fore. quæ opinio, & si quod ad fati necessitatem attinet, improbanda est, tamen ad id, quod nunc agimus, illud habet boni, quod Turcæ in prælijs ineundis, ac discriminibus adeundis audaciores, ac minime retractantes facit mortis metu dempto, cuius periculum nō a discriminibus, sed a fato pendere putet. Verum omnia humana in Diuina moderatione versari, omniaque a Diuino Numine pendere, pia in primis, ac vera est opinio, cuius retinentissimi esse debemus, omnesque causas illam labefactare solitas diligenter vitare; in primisque cauere, ne vllis Philosophorum disputationibus contraria suadentium ab illa abducamur, eorum præsertim, quorum secta maxime viget, & in flore est, hoc est Peripateticorum. quorum magna pars de Diuina natura ita disputant, ut illam nulla humanarum rerum cura attingi

tingi contendant; neque ullam illarum procurationem habere, aut vero habere posse, quæ etiam sordidissima res sit, tantique Numinis maiestate indigna. quæ impia opinio religionem prorsus tollit. frustra enim Diuinum Numen precibus, votis, sacrificijs, omniq[ue] religionis cultu nobis propitium facere contendimus, eiusq[ue] pacem frustra exposcimus, & opem imploramus, si quidem omnia hæc ab illo non animaduertuntur. quo impedimento plane carent Turcæ, quibus Philosophiæ studium legibus est interdictum. Quod quamquam alia de causa improbum Veteratorem fecisse non sum nescius, nimirum ne legum suarum vanitas appareret, vtile tamen Turcis cōmentum est, ad religionis opinionem tuendam. Omnino Philosophiæ hoc studium vtile ne, an damnosum mortalibus sit, neque huius loci, ac magnæ, & longæ disputationis est; nosq[ue] in eo insectando in tribus illis libris, quos adolescētes edidimus, nemiū fortasse acres, & vehementes fuimus ardore ætatis incitati, ingenioq[ue], ac se efferenti copiæ indulgentes. qui libri multis in locis corrigendi sunt; resq[ue] alio scribendi genere tractanda fuit; neque acri illo, & vehementi agitanda, sed æquabili, & sedato quærenda. Hæc igitur Turcarum animis penitus insita opinio illos Diuini Numinis metuentes facit, illorumq[ue] studia ad religionem excitat, & incendit. Qua re fit, vt erga erroris illum plenū cultū omnia illorum falsæ pietatis, & diligentix officia in omnes partes plane constent. nam templa summa cum veneratione frequentant; Diuini Numinis pacem, atque opem demississime, atque humi prostrati exposcunt; res sacras venerantur; sacerdotes non modo legis suæ, sed nostros quoque in tanto honore habent, vt illos quoquomodo violare nefas putent. quæ res innumerabilibus Piratarum exemplis, quod mirandum sit, patet. quorum plerique cum aliquem sacerdotem de nostris cepissent, cum e vestigio dimittere

dimittere solebant, ne se grauissimo crimine sacerdotis, & ministri eius retenti Deo immortalis obstringerent. cauentque diligenter, ne quid contra legem aperte admittant, eamque maximam offensionem in primis vitant; ac si quis eius criminis conuincatur, in eum seuerissime animaduertunt. nulla igitur in Deum immortalem conuicia apud illos audiuntur, nulla sunt adulteria, nihil denique in quo legis violata, aut negligenter adseruata sit offensio. Quamquam non sum nescius atrociora flagitia ab impia, & exacrabili illorum lege illis permitti. cuius observationis illustre exemplum nostra ætate a summo Imperatore Solimano editum non pigebit referre. Nam cum una ex puellarum gregibus, quas summi Imperatores intra septa in concubinato habent (licet enim per Mahumetis leges concubinas habere quot plurimas alere homines possunt) frequentius, quam cetera cubitum accersita summum Imperatorem sui amore captum sensisset, vafro commento affecuta est, vt ab Imperatore manumitteretur (in seruitute enim Imperatoris sunt pueri, & puellæ, qui septis illis includuntur) cumque postea lectica, vt assolet, missa accerferetur, mirari se illa summi Imperatoris rationem vehementer respondit, qui tantæ maiestatis Princeps sacram Mahumetis legem, qua liberarum concubinatus disertis verbis prohibeantur, aperte violare non vereretur, eaque in re apud populos, quorum oculi in illum essent coniecti, tam grauiter offendere. Qua responsione commotus Imperator libidinis impetu in præsentia inhibito, postero die quæsiuit ex legis peritis, an per legem liceret, liberas mulieres in concubinato habere. quod cum illi negassent, Imperatorque puellæ, quam perditæ amabat, consuetudine carere non posset, illam uxorem duxit. Non necesse habeo nunc contra referre, vt se se hac in re habeant Christiani, ne vulnera, quæ sanare non possum, attrectando refricem. Proximum a

religione locum in republica gerenda, atque in Imperio amplificando obtinet disciplina . in qua nihil est quod villa inter nos & Turcas suscipiatur comparatio; cum apud illos summa; apud nos nulla prorsus sit . Illud enim constat, summum Imperatorem stans temporibus conquisitores ompibus Imperij prouincijs circummittere ad puerorum delectum habendum . qui omnibus primæ ætatis pueris Ciuitatis in conspectum adductis, quorum indoles ex forma, habitu membrorum, totaq; corporis specie, & aspectu probatur, eos deligunt, eorumque greges in Regiam adducti in disciplinam traduntur, in qua iaculandi, equitandi, arma tractandi, omnes denique militiæ artes docentur; animiq; ac corporis vires longa exercitatione corroborantur, neq; quisquã ad militiam admittitur, aut ad bellica munera assumitur, nisi longa hac disciplina, & vsu assuefactus . At nostri contra exercitus hominibus militarium rerum rudibus, omnisque disciplinæ expertibus constant . Huius autem disciplinæ triplex est vsus, & utilitas . prima est hæc ipsa rerum bellicarum peritia, ac firmitus corporis robur . quæ in Turcis tanta sunt, quanta assidua, & diuturna exercitatio efficere potuit . cuius roboris argumento sit illud sæpe editum specimen, sagitta ex arcu Turcico tanta contentione emissâ, vt summam remi partem, atq; a scalmo interiore crassitudinis fere dodrantalis transfigat, ita vt cuspis spiculi ex altera parte appareat . At nostri contra milites ad militares ordines temere, ac sine delectu adscripti, omniumque rerum ignari tum vsus militares, atque artes discunt, cum illas multo ante perceptas explicandi tempus venit . altera est illa vel summa utilitas, laborum inopiæque tolerantia, animusq; aduersus omnia mala, rerumque penuriam inuictus . assidua enim exercitatione assuefactus animus nullo labore vinci potest: tenuisque victus, ac cultus, summaq; parsimonia, in qua educati sunt,

sunt, paucissimis, ac necessarijs rebus contenta est; maximæque copix minimis com meatibus aluntur. quo fit, vt in bello expeditiores sint illorum exercitus, ac classes haud magna sarcinarum, atque impedimentorum vi agmen tardantibus. At nostri exercitus, & classes ingenti vasorum, & supellectilis mole grauantur; militesque ad laborem insuetum subito deficiunt; neque nisi omnium rerum copia circumfluant, possunt durare. neq; necessario victu contenti delicatum quoq. quærunt; eoque iam turpitudinis res processit, vt maior pene sit conuiuiorum, & omnium apparatus in bello, & expeditionibus, quàm in pace, & in vrbero otio luxus. pudet referre, iam niuem ad potum refrigerandum classibus circumuehi. Tertia est obedientix utilitas, qua virtute res bellica in primis continetur. at hæc apud Turcas tanta est, vt neque nostra, neque vllis sæculorum ætatibus apud vllas gentes maior fuerit, cum contra nos contrario vitio flagitiose laboremus. contumaces enim sunt milites nostri; neque imperijs obedientes, quippe qui nulla disciplina mansuefacti sint; nulloque poenæ metu in officio contineantur. vt Christianorum castra ipsorum militum nostrorum seditionibus, quam hostium oppugnationibus infestiora fere sint. Quo vitio ne Duces quidem ipsi, ac Proceres carent. quorū pleriq; deprauatis cupiditatibus, ac priuatæ ambitioni, quoq; nil scèdus est, quæstui seruietes, ac bellum cauponantes reipublicam produnt; nullamq; Principibus suis non modo fidelem, ac fortem operam nauant, sed alter alterius gloriæ inuidia, & obreptatione ad rem bene gerendam sibi ipsi sæpe mutuo impedimento sunt, nulla poenæ expectatione a tanto flagitio deterriti. Vt nullus iam sit apud nos, quo descendamus, inferior dedecoris, & infamiæ locus. Iam vero virtutem, quæ in causis imperij, amplificandi præcipua est, si maiorem in Turcis, quàm in nostris hominibus esse

dixero, & iniuriosus in gentem nostram fuerim; & magnam inuidiæ molem mihi conflare. Illud tantum dicam, virtutem maiore in honore esse apud Turcas, illique vni esse in rebus militaribus locum, ijsq; tantum hominibus bellica munera mandari, quorum conspecta virtus, atque in rempublicâ merita per omnes deinceps honoris gradus ad summos honores extulerit, cum apud nos nobilitas altissimum locum teneat; eosque maximis muneribus præfici videamus, qui cum nullum sui documentum dederint, sola nobilitate, familiæque splendore eniteant. quæ res indignationem strenuorum, ac fortium virorum accedit. quorum multi Christianam militiam deferentes, in qua nullum virtuti suæ locum esse videant; omnemque sibi crescendi spem præcisam intelligant, ad Turcas se conferunt. quos virtutis fama spectatos Turcæ complectuntur, omniq; honorum genere prosequuntur, & ad summos militiæ gradus extollunt. quippe qui qualis sit vir, non vnde sit, quærendum putent: neque virtutem tamquam fortunæ bona hæreditariâ relinqui didicerint. Equidem non nego nobilitatem in magno pretio esse debere; magnamque vim habere ad hominum animos ad virtutem excitandos, magnumque ijs hominibus, in quibus virtus sit, addere ornamentum. Verum illam virtuti præferri; eaque de causâ grauissimas reipublicæ partes, ac bellicarum rerum summam hominibus mandari, quod sola nobilitate cõmendetur, hoc plane improbandum est, rei que publicæ damnosum. filios ac fratres Regum eximios facio, quibus summum Imperium mandari, non modo non damnosum; sed vtile in primis reipublicæ est. nam cum in omnibus humanis rebus plurimum auctoritas valet, tum vero in bello tanta sunt illius momenta, ut maxima rerum pars in illa posita videatur. quippe quæ obedientiam comitem habeat. qua rem militarem in primis contineri diximus. Quare illorum imperijs milites, &

Duces

Duces haud retractanter parent, quippe quorum summa dignitas omnem invidiam, & obtrectationem exuperet. cupideque illis operam nauant, quod egregia virtutis facinora in ipsorummet Principum oculis edita neque latere possint, neque obtrectatorum calumnijs obscurari, aut cleuari, sed debita præmia expectent. Postremo pœna, & premio respublicas in primis contineri constans est veterum sententia. qua vtraque in re mirum est, quanto interuallo Turcis sinus inferiores. Verum ego magnam me inuidiæ molem nomini meo constaturum; grauissimeque apud multos offensurum intelligerem, si Turcarum rationem nostræ anteponerem. à qua re tātum absum, vt nostram longe humaniorem, & præclariorem esse statuā. Turcarum enim omnia consilia, & instituta ad bellum referuntur, contra apud nos pacis, & otij studia potiora, ac maiore in pretio sunt; maioreque operâ, & diligentia; ac maiore pecuniarū, & tēporis impensa excoluntur. Principio ingens est apud nos Sacerdotum, ac Monachorum numerus, hiq̃ amplissimas opes, & magnam potentiam possident, ac splendidissimum cultū tuentur, latifundijsq̃; & opulentissimis, ac frequētissimis cœnobijs suis omnes Europæ prouincias occupant: maximâq̃ fructuum, & vectigalium nostrorum pars illis cessit. Qua in re laudanda in primis est maiorum nostrorum pietas, & sapientia, qui in Sacerdotū ordinem, & in sacras res tam liberales fuerint, quiq̃ tantam opum suarum partem in Diuinum cultum splendide tuendum, atq̃ in egentium inopiam subleuandam, bonarumq̃ artium, & doctrinæ studia fouenda, & alenda tam large cōtulerint. Præterea iudicia apud nos maioribus contentionibus, maioreque eloquentia, ac longiore temporis tractu exercentur. quare magnus est apud nos iuris consultorum, magnus Iudicum, oratorum, caussidicorum, scribarum numerus, quibus amplissima præmia, & magnæ mercedes sunt cōstitutæ forensibq̃; opera

opera, & industria haud exiguam Christianarum opum partem ad sese trahit. Iam vero litterarum, & doctrinæ Gymnasia frequentissima apud nos sunt. quæ magna impenſa ipsa quoque tuemur; multiq̃ue sunt, qui ad illa se conferant; in doctrinæq; studijs, quæ in magno honore esse videant, aut omnē, aut magnā ætatis partē ponant. Poſtremo quāti Dij immortales sumptus fiunt in manuū artificia; quā immanes apud nos sunt subſtructiones, quāta & publicorū, & priuatorū ædificiorū copia; & magnificētia; quanta ſignorum, tabularum, ſtragulæ; cælati argenti, ſuppellectilis vis; quantus domeſtici, ac quotidiani cultus ſplendor; quanti conuiuiorū apparatus: quātus in veſtitu, & in omnibus rebus luxus: quātis mercedibus eiufmodi rerū artifices alūtur. Quæ oīa vt Chriſtianas provincias mire exornant; atq; vt Turcæ rudes, & agreſtes præ nobis videātur, faciunt, ita bellicis rebus, & augēdo imperio minime apta ſunt. magnā enim opū Chriſtianarum partē in bellū inſumendarū auferunt. At cōtra apud Turcas hæc omnia tenuia, aut nulla ſunt: nā Sacerdotū numerus exiguus eſt, cultuſq; pertenuis neceſſarijs tantum modo rebus ſuppeditatis: iudicia nullis cōtentionibus agitantur; breuiq; ac ſemel, aut ſummū iterū cauſſa dicta ſine hac tanta cōmentariorū cōgerie forenſes cauſſæ trāſiguntur, vt nihil neceſſaria ſit tanta patronorū, & ſcribarum copia; nulla ſūt apud illos Monachorū inſtituta; nulla ædificiorū moles; nullus in quotidiano cultu ſplendor; victus tenuis, neq; vllō coquorū artificio elaboratus. neq; enī Turcæ iſta curant aut ſuſpiciunt, ſed omnia illorū in bellicos uſus inſumuntur; omneſq; opes, ac præmia viriſ militariſ cedūt. Hi ſoli apud illos ſūt in honore. ut mirari non debeamus, ſtrenuos, & bellicosos viros Chriſtiana militia relictā, cui per exigua præmia ſunt propoſita, quorū etiā pauciſſimi participes ſunt, ad eā ſeſe conferre, quæ ipſos dignitate, & opibus augeat. Cū igitur vna tan

tum

tum sit apud Turcas ex bellicis rebus crescendi via, haudmirum videri debet, omnes illorum curas in eam rem intentas, quæ una ipsos ad honores, opes, potentiâ perducatur, quo fit, ut illi bellica gloria, & rerû gestarû magnitudine ceteris gentibus antecellant; ingentq; sit apud illos militum, & fortium virorum numerus, magnæque eque stes, & pedestres copiarum alantur; illorumque nomen omnibus sit terribile, atque in bellis, quæ pro augendo imperio continenter suscipiunt, victores euadant. at nostrorû hominû studia in varias res distrahuntur: operaq; & industria in multis artibus occupatur, ut perexigua pars bellicis studiis possit vacare. Manuum. n. infiniti generis artificia, litterarum studia, rerum sacrarum professio maximam Christianorû hominû partem a bellicis cogitationibus auocant. eam enim viâ homines libetius insistant, quæ planior, & tutior, minusq; laboriosa est; ac discriminibus prorsus caret: ad illudq; vitæ genus sese conferunt, quod ad eosdem honores, & ad easdem opes nihilominus eos extollit. quo fit ut Urbes nostræ opificum, & sellulariorû copia sint refertæ; omniaq; Philosophorû, & Theologorû disputationibus, & forisibus clamoribus personent. quæ res ut Orbem nostrum mire exornant, ita rem bellicam enervat. exiguaq; proinde est apud nos bellatorum copia, viresq; sunt imbecillæ. Qua in re illud pro certo, ac subducta ratione affirmare non dubitabo, ex ea ætate, quæ sit armis ferendis, uix centesimam quæq; apud nos militaribus studiis sese dedere, cum contra Turcarum longe maxima pars militare rem colat. Poenæ vero, quorum metus ad civilem, & militare disciplinam continendam in primis valet, apud nos quidem æquæ atq; apud Turcas constitutæ sunt. Verum non in legum decreto, sed in obseruatione sanctitas disciplinæ posita est. at nos legum seueritatem, aut eloquentia vasisque patronorum, & oratorum comentis vitamus; aut gratia insecutimur; aut potentia perfringimus. contra apud Turcas nulla est aut

est aut culpæ deprecandæ uia, aut poenæ subterfugiendæ spes. Quo fit ut omnia apud nos corrupta, & soluta sint; summaq; sit omnium rerum licentia; atq; omnia pro animi libidine administrantur; militesq; poenæ metu liberi omnia solute, & negligenter agant; ad hoc omnia seditionibus, & rixis misceant, neque dicto audientes sint uerbis tantum feroces, factis ignaui, in aciemq; producti præliū vix initum turpiter omittant; ac primis ordinibus leuiter impulsis omnes sese ne tentata quidem pugna in foedam, & effusam fugam conijciant. Duces vero apud nos multi quidē præstantes sunt; ab omniq; sorde liberi, atq; omni infamia intacti. Sed quid tandem faciant viri quāuis egregij in tā corruptis moribus? impar illorū virtus adultis sæculi vitij est. Quamquam ex summis quoq; Ducibus nonnullos scimus priuata consilia, priuataq; cupiditates bono publico anteferre. Inferiorū vero ordinum Ductorum haud minora, quā militū sunt flagitia. quorum maxima pars bellum ad quæstū cōuertit; militiaq; nundinantur. stipendijs enim interuersis numerum militum mentiuntur, alijs in locum eorum, cum exercitus lustratur, subornatis. Quo fit, ut copiar nostrarū stipendijs frequentes, raræ sub signis sint. Oībus eiusmodi vitij castra Turcarum carent. quietissimi enim sunt milites; atq; imperijs obediētissimi; militariaq; munera impigre obeunt, atque omnem ferociam prælio reseruant. quod ingentibus animis ineunt, & sustinent; neque primis aduersis rebus secundaq; hostiū fortuna franguntur, aut aciem deserunt, sed maiore legum, & poenæ, quā hostis metu cōtinente fortissime dimicantes; locūq; assignatum tuētes fortunam se vertentem expectant; omniaq; vltima experiuntur. quippe quibus atrocissimi supplicij horribili; ac foeda specie animo obuersate fixum, ac statutum est, aut victores discedere, aut si uirtuti fortuna inuiderit, honesta morte, atq; ab hoste oblata in acie potius cadere, quā
domi

domi collum securi subijcere ; aut iugulum carnifici præbere. Cum militum obedientiâ Ducum virtus certat, qui nulla priuata consilia a publicis separata habent ; omniaque ab illis, & fortium virorum officia, & egregiorum

Ducum munera in remp. & in sumum Imperato-

rem extant . Habes Columna clarissime quæ

mihi de Imperio Turcarum in mentem

venerunt . ea si probabis, letabor,

si minus, comprimes, ne ea

in manus hominum ve-

niant, quæ de iu-

dicij mei

existimatione sint de-

tractura .



VBERTI · FOLIETAE

TYBVRTINVM. HIPPOLYTI

CARDINALIS.FERRARIENSIS



AD. FLAVIVM. VRSINVM

CARD. AMPLISSIMVM



OMPLVRIBVS, & exinijs tuis omnium
temporum in me meritis, quibus perpe-
tuam grati animi memoriam, singularia-
que studia me debere intelligo, magnū
cumulum Flauī amplissime addidisti hoc
postremo beneficio, quod opera tua in viri clarissimi Hip-
polyti Estij Cardinalis Ferrariensis familiaritate, ac dome-
sticum vsum veni. Cuius rei percupidus semper fui: neq;
id ijs sane de caussis, quibus homines in Principū familia-
ritate, & patrocinio appetendo duci solent, vt & opibus,
ac dignitate augeantur, & sibi ac rebus suis in illorum po-
tentia, & auctoritate praesidium parent. hæc enim homi-
nes in clarorum virorum clientelam se se tradentes spe-
ctare fere solent. Sed alia quædam sunt longe maiora,
quæ mea studia, ac voluntatem semper ad Ferrariensem
attraxerunt, quæque liberalia ingenia sibi deuincire so-
lent; præstantes nimirum, ac singulares hominis virtutes;
fides in primis, & integritas, ingeniumq; simplex & ve-
rax ac minime fucatum, aut fallax, nulloue simulationis
artificio eruditum. quo vitio ætas nostra ita laborat, vt
ad ingenij pene laudem fallax astutia reuocetur. Deinde
prudentia,

prudencia, ac ciuiliū magnarūq̃ue rerū intelligētia, quam ille nō in scholarū vmbra Philosophorumue disputationibus (quamquā ne huius quidem eruditionis est expertus) sed assiduo iam inde a primā adolescentia vsu, publicarūq̃ue rerū tractatione est assecutus, dum interioribus maximorum Regum consilijs adhibetur, vel de maximis rebus legationes obit. Verum hæc omnibus nota sunt. Illa est in Estio eximia, & singularis virtus, quæ vt magnæ celsæq̃; fortunæ perraro comes est, ita si ad sit, illam in primis cōmendat, & inuidiam mitigat. Ea est summa humanitas, morūq̃; facilitas, & comitas; clemensq̃. ac mitis natura, & ab omni asperitate, atq̃; iracundia longe remota non quidem vulgo ignota, sed nobis in intima familiaritate, quotidianisq̃ue colloquijs, & postmeridianis confessibus, atque in cetera consuetudine experta, ac plane perspecta. Vt non minus in domestico vsu alienæ libertatis, quā suæ dignitatis memor esse videatur. Comitatur egregias virtutes clarissimi, ac vetustissimi generis nobilitas, qua ille (absit verbo inuidia) inter Italos longe antecellit. Sed de ceteris virtutibus Ferrariensis alias. ad illud venio, cuius caussa hæc ad te scribere institui, idest ad Regium splendorem ac summam, & insignem liberalitatem, & magnificentiam, quam ille cum in quotidiano cultu ceterisq̃ue rebus, in quibus huius virtutis splendor potest elucere, tum vero in amplissimis substructionibus in primis declarat, quam rem nonnullis miror non valde probari. quippe quod nulla res sit, in qua vel magis magnorum virorum apparere possit benignitas, magnificusq̃ue animus, vel (quod Christianæ pietatis primum est munus) quæ magis egentium inopiam subleuet. quorum greges assidue aluntur in varijs ministerijs occupati. Hoc igitur laudabile in primis studium semper fuit in Ferrariensi. quam rem cum quamplurima ædificia multis in locis magno sumptu

ædificata testatur, tum vero hæ Tyburtinæ immanes sub-
 structiones in primis declarant. quas quoniam visendi
 numquam tibi commoda facultas data est, diligenterq; tu
 in meo ab vrbe discessu, cū me Ferrariensis in hūc æstiuū
 secessum secum duceret, mecum egisti, vt illarum for-
 mam, & rationem tibi perscriberem; morem tibi gessi,
 ac quancōmodissime, & minutissime potui magnam re-
 rum insigniorum partem stilo diligenter sum amplexus,
 non quidem munus plane implendi spe, sed obsequendi
 voluntate. Principio sacram Aedem in summo Oppido
 belli casibus dirutam vir non minus pius, quā magnificus
 præclaro Tyburtis marmoris opere in longe augustiorē
 formā restituere est aggressus, quā ædificationē assidue vr-
 gendo propediem ad finē perducet. Deinde campestris
 loci tria circiter passuum millia muro amplexus viuarium
 venaticum prope Oppidū fecit, in quod omnis generis fe-
 ras inclusit. Præterea viam, quæ ad Oppidum fert, prius ar-
 duam, asperā, cōfragosam, vt per eam vix ingredi iumen-
 tum posset, strauit, immanibusq; ac perincōmode promi-
 nentibus saxis reuulsis, ita cliuū molliuit, vt nunc fastigio
 leniter subuexo perfacilis sit vehiculis, ac pene planus
 ascensus. Paruū quoq; alterum viuariū prope arcem muro
 sepsit. Ad hoc vineta extra Oppidum instituit; in quibus
 multis ex orbis regionibus, in primis ex Gallis vites com-
 portatas seuit generosa, pretiosiorisq; notæ vina ferentes.
 Verum eiusmodi res alibi quoque visuntur. ad illud ve-
 niamus; quod toto orbe terrarum eximium, ac nescio
 an vnicum opus appellem. Is est fundus, quo caue pu-
 tes Flauī amplissime, vel extructionum magnitudinē, vel
 rerum varietatē, & aincenitate veterum magnificentiam
 quidquam facere potuisse præstantius. Eum tibi aliqua
 ex parte stilo adumbrare quidem possum, exprimendi
 vero, ac plane demonstrandi inanis omnis conatus
 fuerit. Ea est enim cum vniuersi operis species, tum
 singu-

singularum partium dignitas, quæ non modo omnem scriptoris facultatem, sed cogitationis quoque vim longe superet. Vix aspectus rem, qualis sit, perfecte indicat, neque id subito, quod singularum partium diuturna contemplatio admirationem paulatim augeat. Equidem cum multa ad me de hoc suburbano multorum sermone perferrentur, eam amplitudinem cogitationi meæ tacitus subiiciebam, quam maximam animus capere posset. Verum quanto in errore versarer, subiecta oculis res statim declarauit. nam primus aspectus animum, & oculos subito stupore defixit, & velut mentem à sensibus abduxit. Deinde, vt me collegi, & ad singulas partes oculos circumferens, eas cœpi paullo diligentius contemplari, tum vero eum esse locum statui, quem vix æquet admiratio. Inferior fundi pars (inde enim initium faciam, unde est aditus) planities est medio decumano, ac duabus vtriusque semitis, quæ ad dimidium cliuum perueniunt, secata, transuersisque alijs semitis in hortulos pomiferis arboribus confitos distincta. Hanc planitiem, cum prius perangusta esset, amplificare Dij immortales quantæ molis fuit? Nam cum læua collis incurrens vrgeret oppidanorum ædificijs frequens, dextra vallis in haud exiguam altitudinem deprimeretur, collis ædificijs directis, ac pretio Dominis soluto cōplanatus est; humusq; egesta: qui collis, cum non omnis terrenus esset, saxa sæpe occurrentia fuerunt excidenda. Et vallis crasso muro excitato, eoque validis anteridibus firmato, qui incumbenti; ac prægrauanti oneri reluctaretur neque succumberet, congesta humo impleta est. Ita planities ad hanc, qua nunc est, amplitudinem est perlibrata. Quæ res immensi operis, immanisq; atq; adeo Regij sumptus fuit. Decumanū binas vtriusque piscinas, easq; peramplās habet senisdenis pilis singulas ambientibus; plumbeis fistulis super exstantibus paullū à summo introrsum inflexis, per quas aqua magno impetu

impetu procurrens earum angustijs cōprimētibz incitata in sublime emicat curuata forma, paulatimq; sese dilatans in tenuissimas guttas dissipatur; imbrisq; instar in piscinam deēdit gratissimo murmure, decoroq; procul, & subz intuenti aspectu, veluti aquz fornicibus ex omnibus circū partibus orientibus piscinam testudineato tecto concamerantibus. Neq; hæc vna est aquz gratia, nam quocumq; oculos cōuerteris, scaturigines emergunt, tūta cū varietate, tū operis magnificētia, ut nullus toto terrarū orbe sit locus in eo genere non multis partibus inferior. Neq; vero necesse habeo singula persequi; longū enī, ac pene infinitum esset, illa tantum attingam, quorum dignitas, & amoenitas eminet. A planitie igitur ciuus assurgere incipit, in quo medio tria aquz immissaria in perpetuam longitudinem porrecta, quanta patet clii latitudo scandentibus aduersa in conspectu sunt, per quz gradatim inter se extantia, vt natura clii fert, tres euripi profluunt. In summi immissarii muro columellæ bipedales viginti quattuor per totam longitudinem positæ sunt forma candelaborum affabre factorum paribus interuallis inter se distantes. e quarum cacuminibus salientes aquz similitudinem aquz vehementissimo feruore tumentis exprimunt: candelabraque decedentes circumfundunt: ad hoc præclari operis fidilia uasā in intercolumnijs posita loci dignitatem mire augent. ac ne frons quidem muri suo caret ornatu. In qua perpetuus ordo laruarum est affixus, quas singulas ferta ambiunt interpendentibus simbrijs. At medijs immissarij pons egregio opere lythostroto ornatur, quo variaz auium, piscium, serpentium prominentes species exprimuntur, ex eoque in infimum immissarium per siphones aqua effunditur, huiusque infimi immissarii frons triglyphis veluti Zophorus Doricus distinguitur. Vniuersa huius operis species, & spectantium oculos uarietate, ac

venustate sua in primis tenet; & aures gratissimo, varioque murmure permulcet. Ac ne scalæ quidem, per quas ad dimidium clium rectus est assensus, sua aquæ commendatione carent alueolis vtrinquè gradatim communitæ, per quos ingens aquæ copia profluit, quæ per siphones à superioribus trāsmissa ab inferioribus deinceps excipitur. Superposita sunt alueolis uascula haud abssimili alabastrorum forma, ex quorum cacuminibus aquæ emergunt, ipsæ quoque tumorem præferuidæ aquæ salebrosa mobilitate imitantes. omnino nihil hoc cliuo amœnius, qui præter aquarum multiplicem cōmendationem multis in partibus grata vmbra contegitur, quam facit frequens consita sylua. Ascensus leniter fastigiatus idq; haud mediocri pecuniæ impensa, cum loci natura sua sponte perarduus esset à dimidio cliuo, ubi scalæ terminatur, multis obliquarum semitarum anfractibus mollitur. Dignitatem loci in primis augent quattuor xysta, quæ recta, & plana totam latitudinem cliui transuersam secantia gratissimas, ac salubres deambulationes, arborumque vmbra in margine cōsitarum opacatas præbent. Sed nullum opus toto hoc fundo tam conspiciendum est, quam fontium complures, ac miræ extruções. quarum tres in medio cliuo in ordinem gradatim positi decumano venientibus frontem aduersam habent, reliqui latera fundi vtrimque exornant. Horum alij vastissima mole sua horrore quodam contemplantes perfundunt; alij præclaro artificio admirationes faciūt magna signorū vi antiqui operis, & ipso pretio paratorū, tectorijq; vermiculatis, & marmorato fere ornati. Neq; ego si gularū formā explicare in animo habeo, non quod scribēdi laborē fugiam, sed ne earū rerū longior narratio tibi satietatem faciat, quā aspectus facere numquā potest. formam tantum vnus exponam, qui perfectus est, cum reliqui nondum omni opere sint absoluti. Mons est non perpetuo

petuo iugo continuatus, sed multiplici cacumine inæqualis altitudinis distinctus, in eam formam, quã vulgo oua tam dicunt, curuatus e vastis prominentibus saxis eius generis, quæ assiduus aquæ defluxus, ex cliuo præcipitata facit, haud absimilia subgrundiorum stillicidijs colore puni-
 cibibus proximo, tanto artificio factus, saxorumque ignentium eminentibus molibus ita scite collocatis, ut rudem quandam speciem, & subhorridã naturalis montis, aspicientibus tamen gratam reddat. Huius montis infima pars tribus speluncis excauatur, quarum in media si-
 gnum est mulieris in sella sedētis, dextra, & læua signa flu-
 minum in cubitū recubantium, omnia colossea. Ex antris magna uis aquæ in tria subiecta vasa effunditur, ex quibus illa assidue deffluens partim struclili canali, ac recto, partim duobus tenuibus euripis excipitur, qui totum Fal-
 leris hemiciclum flexuosis recursibus ambientes aquam in craterem peruastum firmissimæ columnæ impositū de-
 ferunt. Falere ipsum pluteo e columellis munitur. Ex cra-
 tere aquæ magna copia per totū circuitum assidue redū-
 dans ueluti cataraeta emissa in inferiorē peramplam pisci-
 nam ouatæ & ipsam formæ precipitatur, tanto cum stre-
 pitu, vt proximorum voces vix exaudiantur. In medio
 cratere marmoreus globus extat, quattuor plūbeas fistu-
 las sursum spectantes in triangularem formam cum vna
 media sit, defixas habens. E quibus quattuor aquæ imissio-
 nes in sublime emicantes, atq; inde deorsum curuatæ, æ-
 nustum speciem haud absimilem lilij floris exprimunt. In
 inferiore parte fontis, quæ superiore Falere decempedali
 altitudine depressior est, porticus ab interiore parte pisci-
 nam dimidiam curuato flexu, ut est natura loci, amplecti-
 tur, per quam deambulantes piscinam, atq; assidue deie-
 ctum imbrem per fenestras, quibus exterior paries aperi-
 tur, prospectant. Nec minimam loco addit commenda-
 tionem eiusdem parietis pons exterior inter fenestrarum
 inter-

interualla alterno ordine decē cubilibus excisa, in quibus Nereidū sigilla antiqui operis egregiaq; artis posita sunt suppositis vasis cubito innixa, quæ uasa ore in piscinam verso ingentem aquæ copiam magno impetu emittunt. neque modica additur venustas e platanis in area, quæ est ante fontem consitis grata vmbra locum opacantibus. Iam vero Antrum ad læuam aræ positū loci dignitatem cum primis auget magna signorum ui egregij operis, ac maximi pretij in parietum nidis in ordinem apte dispositis collocatorum exornatum, ad hoc picturis, & coronarijs ex marmorato, ac uarij generis uermiculato conspiciendū, quod in æstiuis caloribus Hexedra vsum præbet. quæ à loci natura refrigerata (magna enim pars, in dorso cliui partim humo egesta, partim saxo exciso est excavata) ac proximæ exterioris perstreptentis aquæ sonitu, in teriorisque fontis in fronte hexedra intrantibus aduersa murmure aures permulcente gratissimas præbet post meridianas sessiones. Hic fons ac triplex euripus cliuum transuersum secans, per quem aquæ à fonte manantes in alterum fontem, qui est e regione nomine, ac signis Vrbis Romæ, & Tyberis amnis insignē feruntur; atque ab eo in inferiorem late restagnate in lacum, cui maris est inditum nomen, deuoluuntur, non solum belle positi sunt ad loci ornatum, & ad oculorum oblectationem, sed subest quædam recondita haud inelegans ratio ad agri Tyburtis naturam exprimendam accommodata, quam commentus est celeberrimi nominis nostræ ætatis architectus mihiq; amicissimus Pyrrhus lygorius uir cum multiplici eruditione perpolitus, tum admirabili omnis antiquitatis cognitione præcellens. hanc explicare operæ pretium duxi. Tres sunt in agro Tyburte fontes, ex quibus tres manant annes, qui fines Tyburtes irrigant, ac deinde in vnum confusi tandem in Tyberim confluunt. Anio celebris nominis, Herculanijs, Albunea ab albis aquis ita appellatus

pellatus, seu, ut quidā putarūt, alia est eius nominis nō ita vulgata ratio. quā nō pigebit referre. Cū Ino Athamātis viri sœuitiā fugiens sese cū Melicerta filio in mare præcipi tasset à Libero patre misericordia nutricis cōmoto, serua- ta cū filio est, amboq; Dij facti, Ino Leuchotea, Melicerta Palæmō sūt appellati. Hoc ideo Poetæ fabulati sūt, quod Ino cū filio nauigio cōscenso salutē fuga expediuit, quam; quia in Græcia nusquā postea apparuit, undis haustā dixe- runt. At Ino post lungā nauigationē cū in Italiā venisset, latinū agrū tenuit, & in finibus Tyburtibus cōsedit; latino q; nomine Græci vī exprimēte Albunea est vocata, quæ cum diuinæ mentis afflatu adeūtibus ex oraculo daret res- ponsa, sibylla Tyburs appellata est, à qua & lucus, in quo cōsedit, & tēplū illi dicatū, & fons, ac riuus emanans no- men acceperūt. Duo igitur in hoc fonte recubantiū flu- minū signa Anienis, & Herculaniij imagines sunt, media se- dens mulier Dea ipsa est Albunea; tres Euripi profluētes manātes fluuios à fontibus declarāt; tōs e regione positus nomine, & signis Urbis Romæ, & Tyberis insignis Euri- pos excipiēs Tyberī ipsū significat, stagnū inferius maris locū tenet, in quod & tres amnes, & Tyberis ipse euolui- tur. Duo alij sūt a dextra & læua cliui fontes nō illi quidē tam vastæ molis, sed operis dignitate, multisq; egregiæ ar- tis signis, in primis vero Hydraulicorū organorū artificio non minus suspiciendi. in minore enī, qui omni opere est absolutus aquæ emergētes varios auiū cantus imitantur. quos auiculæ, ex ære effictæ ramulis æreis īsidētes emitte- re videātur per interualla modo ad recessū noctuæ ex ære quoq; effictæ canētes, modo ad accessū cātū intermitten- tes. Fons maior nondū ad finē perductus horribili classi- co, oīsq; generis tiliarū vario cantu resonabit. Adeo ex- cellentiū artificū industria in naturæ operibus exprimēdis nihil nō tentatū relinquit. Quæ de sūdo dicēda fuerūt, ijs quam cōmodissime potuimus explicatis, sequitur, vt ad
ædes

ades tādē veniamus, quæ amplæ, & excellæ, magnificæq; extructæ eiusmodi sunt, vt nihil ī ijs desideretur, uel ad habitationis cōmoditatē, vel ad domestici ministerij vsū, & ex plicationē, uel ad ornatus dignitatē. Triclinia .n. cecos, conclauia, cubicula perāpla habet, oīa leui tectorio exposita, egregijsq; picturis cōspicienda; cameras etiā coronarijs ex marmorato, atq; auro ornatas. Verū hæc cōia cum nōnullis ædificijs sunt. Illud est eximiū, & maxime insigne tres fōtes, vnus in ipso triclinico, duo reliqui in criptaporticu triclinij, & cōclauū lateribus prætenta, qui per fenestras triclinio, & cubiculis aspiciuūtur. ex quibus aquarum scaturigines varij formis emergētes, ac perstrepen-tes cœnantīū aures gratissimo murmure; oculosq; iucūdis- sima specie perfundūt. Affabre facti sunt, sūmoq; & poli- tissimo, ac magni pretij artificio perfecti. Vnum, qui est in triclinio, describere satis habeo. opus est hyalostrotū e mi- nutissimis tesseralis; neq; illud plana superficie, ac leui, qua- lis esse vermiculatorū solet, sed nouo quodā, ac venustissi- mo genere lapillis paullū eminētibus asperata. Antepag- menta, hyperthyrum, supercilium, corona varijs florum fertis, varijsq; arborum prominentibus speciebus distin- guuntur. Cydoniorum rami varijs flexibus inter se impli- cari supra coronā veluti ī tympanū fastigiantur amplis, ac prolixis fimbrijs a corona vtrīq; pendentibus. Duo vtrim- q; Telamones, quos etiam Atlantas vocari video, nym- pharum effigie ancones ab extremis coronidis crepidini- bus pendentes capitibus sustinēt. fons Fauni a signo huius Dei fistulis canentis uocatur. Frons ædium est in septem trionē uersa triplicē tredecim fenestrarū ordinē habens iustis paribusq; interuallis inter se distantīū. Aedificium enī in triū cœnaculorū altitudinē extollitur. Sed frōs per- petuā æqualitatē haudquaquā seruat. extremæ .n. partes vtrimq; eminēt veluti turres ædiū latera claudētes, & mu- niētes. Ex ijs, quæ diximus, facile vnusquisq; altitudinis, &

latitudinis modū potest conijcere . Aditus oīno duo sūt, alter superior per peristilyum, quod & ipsū fonte Veneris egregij operis ornatur à signo recubātis, & ad strepitū de eidentis aquæ dormiētis Deæ ita appellato, alter ab ipso fundo, qui plurimū dignitatis habet . Duplex .n. podiū à media aedium fronte eminens altissimis columnis usq; ad medium tabulatū exaltatur egregio opere e marmore Tyburti perfectum. Scalæ vtriq; ædium parieti iunctæ infimum mœnianum capitibus pertingentes geminū aditū ab vtroq; mœniani latere præbent. Iam vero quæ magnifico rū ædificiorū duæ solēt esse præcipuæ cōmendationes, vt & prospectū habeāt, & ipsa in prospectu sint, eæ in his ædibus insignes in primis, & eximie sunt. sūmo .n. & editissimo iugo cliui vndiq; cōspecto positæ latissime patēt ipsæ prospectū habēt in subiectos latij cāpos, quibus imperio quodā videntur imminere, Romaq; ipsa sereno tēpore sub oculis est ita aperta, ut nonnulla publica ædificia editioribus locis posita liquido p̄spicua sint . Extremū illud est, quod nullo modo à nobis prætereundum fuit, hortus ædibus dextra cōiunctus septus muro, in quē ex interioribus cubiculis est aditus perāplis uijs totū locū ābiētibus mediūq; interfecantibus, ac gratas deambulationes præbētibus, quadripartito distinctus egregijs, varijsq; generis topiarijs ornatus præcella in primis media craticia testudine anguloso ābitu rotūda, quattuor ostijs peruia, qua uiæ hortum distinguentes in decussim cōmittuntur. quaterni fontes parietes ostijs interiectos exornant in collium speciem confurgentes minutis innumerabilium colorum lapillis, omniscūque generis conchilijs opus scite uariantibus. Alterū caput viæ lateri ædium prætentæ fontē habet rudi opere, qđ rusticū vulgo appellari diximus, quo nullum est cōtēplātibus iucundius, prægrādibus eminētibus faxis pumicis p̄simili specie mulco cōtēctis herbisq; inter natis naturalē ūbrofi antri speciē reddens. Vnda guttatim vndiq;

vndiq; manans, ac stillâtia saxa numquâ intermisso fluxu irrigâs à subiecto labro gratissimo murmure excipitur. Ea dē via per totā lōgitudinē marmoreo suggestu tripedalis altitudinis parieti iuncto ornatur perpetuo canali exciso, cuiusq; a latere perforato, per quā topiaria fluenti aqua irrigantur. Exigui quoque crateres toto suggestu in ordinem dispositi scaturigines emittunt salicētem mobilitatem aquæ feruore turgentis imitantes. Nec vero sinistrum ædium latus suo ornamento, & commoditate caret, ex quo duplex porticus superiorum, & inferiorum conclauium solum altitudine æquans longitudinis pedum ducentorum, quæ vsque ad montis crepidinem porrectæ salubres, & gratas deambulationes ex ipsis conclauibus præbent. Subiectum est porticibus stadium ad lusum pilæ, vt nullum hoc in loco exercitationis genus desideretur. Formam Tyburtini Ferrariensis vniuersam, & earum paritum, quarum dignitas, & pulchritudo insigniores sunt, tibi Flauii amplissime summatim exposui, non quod sperarem, vt initio dixi, te ex meis, aut vero ex cuiusquam scriptis qualis is fundus sit, posse animo plane comprehendere, sed vt iussa tua facerem, cui imperanti non parere nefas duxissem. Deinde vt cupiditatem tibi, vel commouerem, vel iam sua sponte commotam incitarem locum inuisendi amœnitæ, operumq; ac substructionum magnificentia in primis conspiciendum. qua re nihil te putē hero meo hoc tēpore gratius facere posse. Cui ne scio, an hoc meū consiliū fundi describendi, si rem vmquā rescierit, sim probaturus. Vir enim est vt factis magnificus, ita ab omni inani ostentatione ingenio lōge remotus. Tu quidquid decreueris, me, vt facis, ama: sicque tibi psuade, eam me tibi pietatē, quā debeo, perpetuo præstaturū, nullusq; hoīs in te studia vmquā fore, quā mea ardentiora.

Vale. Dat. Tybur: Tertio Non:
Augusti. M. D. L X V IIII.

VBERTI

VBERTI. FOLIETAE
BRVMANVS
SIVE
DE. LAVDIBVS. VRBIS
NEAPOLIS
AD. ANTONIVM. CASELLAM
PATRITIVM. GENVENSEM



ANTONII. VACCÆ
IURISCONSULTI

*Condita quin fuerit, quin instantata iubente
Qualicumque quidem Numine Parthenope,
Ne modo præcipua Europa videatur habenda,
Verum Asia, & quot quot Sol videt omniuagus;
Vix dubitet, tanta molem qui uiderit Urbis,
Qui cali & terræ proxima, quique maris.
Argumenta tui si quis Folieta libelli
Legerit, id certo certius esse putet.
Forſitan & cupiet laribus patriæque relicta
Non alia extremum claudere ſede diem.
Rebus in humanis permagna eloquentia nis eſt.
Maior ubi ueri nititur aucta fide.*

VBERTVS

79

VBERTVS.FOLIETA

ANTONIO.CASELLAE

S. P. D.



Est virtus tua, eaque tua in me sunt merita Antonio, quae mihi grata recordatione perpetuoque studio colenda esse intelligam: quaeque non modo praedicatione apud homines, qui nunc uiuunt, illustranda, id quod continenter ac sedulo facio, sed apud ipsam quoque posteritatem scriptis meis testata esse uelim. neque enim obscura esse debent proximae laudes tuae in utraque fortuna conspectae. Tu enim singularem animi magnitudinem non minus aduersis, quam secundis rebus semper declarasti: neque minus te haec omnibus clarum & suspiciendum fecerunt, quam illae, quod solidae & rarae admodum uirtutis semper fuit, admirabilem ostenderunt. nam quemadmodum tum cum per amplas opes possidebas, nemo omnino de nostris hominibus erat, cuius Regia liberalitas ac splendor latius, aut in plures partes pateret, ita cum illis ministrorum tuorum culpa ac parum sincera fide decidisti, animi aequitas tui & constantia in tanta fortunae iniuria ferenda in primis eluxit, cum tantum rebus tuis inflictum uulnus amicis tuis dolorem attulerit, tibi gloriam adieccit. quippe qui te ostenderis tantis detrimentis nihil tua, sed amicorum duntaxat causa commotum, quod facultatem tibi illis benefaciendi ereptam uideres, docuisti quoque, nullum esse in sapientium compositos animos fortunae dominatum, quae sua quidem tibi adimere potuit, tua adimere non potuit. in quare me nihil mentiri, nihilque non credibile dicere, haud dubitabunt ij, quibus notus es, quique in rebus suis de te ac de bonitate tua periculum saepe fecerunt. Tibi igitur homini mihi amicissimo, quemque ego pro haud leuibus tuis in me meritis, expertaque liberalitate unice diligo & obseruo, tum autem in omni fortuna egregio libellum hunc, quem Brumani nomine nuncupatum de laudibus Urbis Neapolis amantissime scripsi, tanta Ciuitatis pulchritudine & magnitudine captus, dicandum existimaui cum ijs de causis, quas commemorauimus, tum ut tibi & omnibus declararem, me non fortunae tuae, sed tui amantem semper fuisse. Simul quod argumentum pro singulari tua in praclarissimam Urbem uoluntate, in qua

qua sedes & domicilium tibi constituisti, pergratum fore putavi. Ac
 me dubitatio quadam nutantem fecit, qua descriptionis forma mihi uten-
 dum esset. Genus illud exile & familiare, quo epistolas scribimus, mi-
 nime aptum materiæ uidebatur; contra amplum illud ac sublime &
 ornatum, longique illi ac pleni uerborum ambitus Panegyricum con-
 ficere in animo non habenti haudquaquam idonei uisi sunt. nudam
 enim rem sine ullo fūco ulloue amplificationis & exornationis genere
 exponere decreui. quæ tamen ea est, ut sua ipsa pulchritudine
 ac naturali uarietate nullis extrinsecus adiuta ornamentis
 deleat. Moderatio igitur quadam a nobis adhi-
 bebatur, medioq; quodam genere inter tenue &
 amplum illud utemur: atque ita tempe-
 rabitur stilus, ut neque humilitate
 sua rem deprimat, neque ni-
 mia ubertate redun-
 dans segetes
 strangulet:
 neque si nos supra aquabile illud &
 mediocre attollere nolui-
 mus, idcirco nimium
 demittamus.

VBERTI

VBERTI . FOLIETAE

BRVMANVS

SIVE

DE . LAVDIBVS . VRBIS

NEAPOLIS



CAESARIS Brumani ingenium cum natura excellens, & ad maxima quæq; natum, tum assiduo labore, diligentia, industria ita excultum est, vt omnibus ijs rebus, quæ magnum ac clarum virum decent, illo instructiorem cognouerim neminem. Nam cum in omnibus liberalibus artibus primos ætatis annos contriuit, itaque in illis versatus est, vt nihil in vlla earum sit, quod illius scientiam effugiat, tum in Philosophiæ & iuris Ciuilis studijs eos progressus fecit, vt nihil magnum aut arduum ab illis facultatibus tractetur, de quo is non commode & copiose disputer. Ius quidem ciuile illi adolescentiam nondum plane egresso, quod ætatis tempus ceteris ad discendum datur, interpretandum publice mandatum est. Quo munere magna cum ingenij & industriæ laude cōplures annos perfunctus est. Idem posteaquam relicto Gymnasio ad rempublicam gerendam animum adiecit, seque Romam contulit, mirum est, quàm subito omnium oculos in se conuerterit; quæ de se documenta statim dederit. quibus factum est, vt sapientissimus Pontifex oculos subito in illum coniecerit, illiq; in ipso ætatis flore haud leuem reipublicæ partem sustinendam mandarit. Durissimo enim ac difficillimo tempore illum Nuntium Neapolim misit, tum cum omnia inter ipsum & Vi-

L

carium

carium istius Regni essent exulcerata; controuersiaq; de sacrosancta iurisdictione maxime arderet, quod Pontifex acerrimus Maiestatis & iuris Pontificij vindex, & assertor nulla in re illud imminui pateretur, auctoritatemque sanctæ huius Sedis illo in Regno superiorum temporum vitijs & hominum negligentia multis in partibus lapsam restitui vellet; Vicarius vero iuris, quod multorum annorum vsurpatione veluti præscriptum contenderet, retinentissimus esset; quibusque ante Brumanum hoc negotium datum est; ij, in eo tractando parum cōmode versati essent; ac pro eo, vt inueterato morbo mederentur, ipsi noua vulnera addidissent, resq; ad apertum dissidium & ad turbas spectaret, Brumanus omnia sanauit, atque irritatos vtriusque animos, & contentione ipsa exacerbatos mitigauit; Vicariumque leniter animum eius tractando, tandem adduxit, vt in sacrosancta potestate esse vellet, seque ad Pontificis iussa & auctoritatem conformaret, atq; amborum voluntates mira coniunctione conglutinauit. Ita controuersia tot contentionibus tam diu iactata Brumani opera, diligentia, consilio finem tandem inuenit; resque in tranquillum statum redactæ sunt. In quibus rebus tractandis eam moderationem adhibuit Brumanus, ea cum lenitate omnia duxit, vt vtriusque gratiam & beneuolentiam teneret. Neque vero ea, quæ deinde consecuta sunt, non præclaris initijs congruerunt. Quippe omnes mandati muneris gradus tanta cum ingenij, industria, diligentia, consilij, prudentia, innocentia laude ab illo seruati sunt, vt quod arduum in primis est, & illi, qui ipsum legauit Principi, & illi, ad quem legatus est, plane satisfaceret; atque vtrique æquæ carus esset. Quæ res illi ad splendidiorem fortunam, & ad altiorem honorum gradus haud dubie viam muniunt; hominumque beneuolentiam & obseruantiam vulgo conciliant. Meum vero studium præter eximias has, & præstantes virtutes
alia

alia sunt, quæ ad illum trahant, illius nimirum in me haud exigua merita, singularisq. humanitas, ac morum suauitas, quam cum in quotidiana consuetudine, assiduoque usu Romæ perpetuo sensi, tum vero Neapoli in primis experitus sum, cum ad eam Urbem inueterati pedis, ac cruris morbi vaporario, ac Baianis fontibus curandi causa accessissem, hospitio ab illo peramanter, ac comiter acceptus, honorificeq. tractatus ac comnodis omnibus cultus. Cum igitur is Romam reuersus esset; Hippolytumque Estium Cardinalem Ferrariensem officij & salutandi causa inuississet, in longoque sermone, ut fit, mentio de Vrbe Neapoli sæpe incidisset, quæ fuit ex Brumano Ferrariensis, quæ sibi ea Vrbs visa esset. multos enim qui Neapoli fuerint, se se idein percupetatum esse; interque omnes magnam quidem ac præclaram esse Urbem Neapolim constare, verum nonnullos in eius laudibus immodicos ac nimios sibi visos. qui eam Urbem ceteris omnibus Europæ antèferre, & quidem magno interuallo non dubitent; quin etiam complures audiuisse, cum dicerent, se se specie ac magnitudine & pulchritudine illius Urbis captos relicta patria, in qua nati sint, sedes sibi ac domicilium in ea Vrbe ac posteritati suæ collocare in animo habere. Cui Brumanus horum, inquit, número præter Patriæ commutandæ consilium, me adscribe Ferrariensis; ac si illius Urbis laudes oratione persequi possem, non dubito, quin me magis quam ceteros miraturus esses. effusior enim quam illi, tibi viderer. Sed res est maioris otij, ac longi sermonis. neque nunc vacare puto: cum me audire cupies, accersito. numquam enim me improuium deprehendes. meditata enim mihi res est, multumque animo agitata, & de qua sæpe cum multis differui; compluresque quamuis retractantes in meam sententiam traxi. Hic Ferrariensis, vacat vero, inquit, Brumane, pergratumque mihi feceris, nisi molestum

est, ac nisi quid negotij tibi est, cui nihil præuerti possit, si rem ingressus fueris. cupidissimus enim sum tui audiendi, tuumque de re parum mihi comperta iudicium cognoscendi. neque sermo tam gratus longus videri potest. quin id mihi te loquente vsu veniet, quod de Demosthenis orationibus dici olim solebat, eam esse pulcherrimam, quæ longissima sit. Hic Brumanus se se in potestate esse dixi. neque enim illi imperanti non optemperare fas esse, atque ita orsus est. Ego igitur sic Ferrariensis statuo, Urbem Neapolim si vel illam vniuersam spectemus, vel singulas partes, quibus Urbes commendari solent, animo & cogitatione circumspiciamus, illarumque momenta perpēdamus, eam esse, quæ ceteris omnibus Europæ Urbibus, quarum excellens sit præstantia, immensa, ac prope infinita laude sit antepōnenda. Quippe in qua ornanda, & augenda fortuna cum natura certasse videatur, adeo vtrisque bonis instructa, & cumulata est. Equidem non negauerim nonnullas esse ciuitates, quæ vna aut altera commendatione præstent. Qua re tamen non sit, vt Neapolis, quæ tot partibus sit superior, non illi anteferatur, cum ipsa ne eius quidem laudis, qua paullum alteri concedit, omnino expers sit. Verbigratia Lutetia populi frequentia ac fori celebritate, caussarumque, ac iudiciorum multitudine vincit, at Neapolis quamuis duabus ijs rebus aliquanto inferior ceteris omnibus, quæ quamplurimæ sunt, quæque partim non minorem, partim etiam maiorem dignitatem Urbibus conciliant, longe antecellit. Opificum, & sellulariorum copia, & opulentia Mediolani maior est: at ceteris rebus, quæ præstantiores sunt, superior est Neapolitanæ Urbis conditio: cum tabernis, & officinis ipsa quoque frequens admodum sit; Celebrius est, & iopulentiùs Antuuerpiæ emporium, at ceteris in rebus Vrbi Neapoli, quæ commercijs terrestribus, & maritimis

ritimis ipsa quoque abundat, multam concedit. Salubriore celo vitur Genua, verum præter hanc unam gratiam, qua ne ipsa quidem Neapolis caret, qua tandem ex parte Genuam cum Neapoli conferemus? Ac ne longum faciam, si quis in ceteras Europæ Vrbes, quæ paullo conspectiores sunt, intuebitur, nullam inueniet, præter Neapolim omnibus naturæ, & fortunæ bonis cumulata, & in qua nō multa desiderentur. Quod ut planū fiat, age singulas eius partes, persequamur. Utque res dilucidior sit, illas ad duo genera referamus, hoc est ad Urbē in animam, ac Ciuitatem animatam. Ferenda hæc sunt vocabula, quod nulla in præsentia occurrant, quibus subiectas notiones cōmodius explicemus. Inanimam Urbem voco solum ipsum, situm, mœnia, portum, ædificia, plateas, totamque Urbis descriptionem. Ad animatam Ciuitatem pertinent Ciues, atque Incolæ; ac negotia, quæ tractant, muniaque, quæ multa, ac varia in hac Ciuitate coluntur. Ab inanima igitur Vrbe initium facientes, prima erit regionis consideratio; quæ res ad Urbium dignitatem commendandam haud dubie plurimum valet. Est autem posita Vrbs Neapolis in agro Campano, quē omnium scriptorum cum veterum, tum recentiorum consensus, ceteris omnibus agris totius orbis terrarum longe antepōnit. Verba L. Flori huc transferre non pigebit.

„ Omnium, inquit, nō modo Italia, sed toto orbe terrarum
 „ pulcherrima Campaniæ plaga est; nihil mollius celo; de
 „ nique bis floribus vernat; nihil vberius solo. Ideo Liberi
 „ Cererisque certamē dicitur. Nihil hospitalius Mari; Hic
 „ illi nobiles portus Caieta, Misenus, & tepentes fontibus
 „ Baiæ, Lucrinus, & Aucernus quædam Maris otia. Hic ami
 „ cti vitibus mōtes Gaurus, Falernus, Massicus, & pulcher
 „ rimus omnium Vesuuius Aetnæi ignis imitator. Quæ Flo
 „ rus perstringit, & coarctat, nobis sunt explicanda, & dila
 „ tanda. Prima cæli est cōmendatio, In qua re multus esse
 nolo

nolo. Illud tantum dicā, perpetuum ibi esse ver; neque floribus tantum vernare Neapolitana littora, sed nullam partem anni florum ac fructuum expertem esse; numquā regionem aut frigore rigere, aut niuib. horrere, aut gelu torpere. Ad solum venio. Eas fere esse regionum naturas constat, vt quod solum pingue, ac ferax sit, necessariiq; fructibus abundās, id minime amoenum esse soleat; contra quod amoenum est, ab vbertate destituatur. Eiusmodi esse circumpadanos campos, & Ligusticam oram cernimus. quorum illi frumenti, ac lactis, necessariarumq; rerum feracissimi amoenitate Ligusticorum littorum carent. Cōtra maritimæ Liguriæ omnibus amenitatibus referta ora solo macro, & exili vititur. Vsq; adeo vtraque laus eandem regionem raro commendat. At ea est agri Campani gloria, vt in illo fecunditas cū amenitate ceter; omnesque regiones, quæ alterutra tantum laude præstent, vtraque vi superet. Nam vbertas tanta est, vt merito Bacchi, & Cereris certamen hoc solum vocet Florus, Vtrorumque enim vsum, neque mutuo se impediētem idem solum præbet. Cuius gratiæ nescio an vlla alia regio particeps sit. Arua enim ipsa arbutis, ijsq; frequētissimis confita passum sunt; cæ populi sunt patentissimis ramis diffusæ; & in vastam proceritatem cōsurgentes vitibus amictæ, quæ geniculato procursu ad cacumina scandentes, atque inde præcipitatæ ad solum vsque peruenientes ea sunt feracitate, vt vna arbor eam vini ferat vim quod quinque clitellariorum mulorum iustum onus sit. At quæ vina? omnium toto orbe generosissima, quæque veteribus in summo prætio fuerint: Massica, Cæcuba, Falerna olim appellabantur, nos omnia vno vocabulo Græca appellamus; quorū prestans laus prouerbio ab omnibus accepto declaratur. Tres enim Græcas res esse prædicant, quæ in suo quæque genere principem locum obtineant. hoc est Græcum ventum, Græcam puellam, Græcum

Græcum vinum ; denique id vinum est, quod ex hoc Regno exportatū impenso pretio paretur, atque in Principum mensis palmam obtineat. Idem solum frumenti ita ferax est, vt a nullo, quod ea laude excellat, vincatur; quodque multis in locis si biennium quieuerit, quatuor cōtinuos annos restibile fiat. Huius agri pars ea, quæ Neapoli, & Capuæ interiecta est, fertilitate ceteras vincens laboriæ a veteribus vocata est, quo nomine nūc tota Cāpania appellatur, siue, vt nonnullis placet, quod in eo agro colendo plurimus exudetur labor; quod pingue solum vi sua molientium manibus relictetur, siue quod vero proprius puto, quod hoc in primis solum dignum sit, in quod hominum industria, & labor infumatur, neque ymquam a cultu cesset. Amœnitati vero & pulchritudini Neapolitanorum littorum quæ vlla non dico ora, sed oratio par esse possit? Est enim posita Vrbs Neapolis in sinu, qui inter duo promontoria Misenum, & Mineruæ in septuaginta circiter millium passuum ambitum introrsum recuruatur; cum ostium quindecim passuum millia pateat; quod ipsum Insulis Prochyta, Pitecusa, Capreis ab utroque cornu obiectis coarctatur, alteroque portu inter oppidum Puteolos, & Misenum promontoriū excavatur. Cingitur hic sinus mollibus vndiq; & placide accliuibus collibus; qui neq; nudi sunt soli, neq; syluestribus arboribus vestiti, sed vitibus, arboribusque pomiferis omnis generis amicti; tantaque est pomorum copia, & varietas, ac suauitas, vt in hac plaga non modo Baccus, & Ceres, sed Pomona quoque sedes, ac domicilium collocasse videantur. Frequentantur in primis nobilissima illa omnium arbore Medica, quam cum paullo intensius contemplerer; eiusque bona mecum reputarem, ac mirarer, sic statuebam, rudem plane fuisse veterum ætatem, cui tam felix arbor fuerit ignota. De cuius ac pomorum, quæ fert, laudibus, ac natura subiit animum
cupido

cupido nonnulla attingere, atque hic inferere. Vnum genus est, sed variæ, ac plurimæ sunt species, pomaque forma, colore, magnitudine, sapore, succo inter se differunt. Nam alia vt citrorum, & limonis colorè albo sunt, & in longitudinem producta; alia vt citriorum lutea, & orbiculata, alijs cortex crassior est, vt ijs ipsis limonibus, & citris, cum ipsum citrum totum fere cortex sit; perexiguosque nucleos habeat, ceterorumque omnium generum magnitudinē exuperet, suauiorque gustu cortex sit, quam ipsa nucleorum caro, cum contra in citrio tenuior cortex amaritudine sua à gustu respuatur; neque nisi conditus sapiat. Sed naturam omnium persequi infiniti operis fuerit. Terminabitur igitur descriptio nostra citrio, cuius pomi maior vbique est copia, & prima commendatio. Pomum rotundum, cortice crasso, & carnosum, colore auro persimili; vnde nonnulli malum aureum esse putauerunt, exterius leui, interius lanuginoso, & albo octonos, aut plures nucleos continet in orbicularem formam compactos, molli membrana contextos, & inter se distinctos; striato ambitu; nucleorum torulis eminentibus quorum caro granosa est; succusque natura acidus; nonnullorum etiam dulcis, verum id ab artificio originem habere putatur, quod tamen in naturā abiit. humectiora cibus condiendis magis apta sunt; sicciora esu suauiora. omni anni tempore a ramis recentia decerpuntur. sero enim annuoque curriculo ad maturitatem perueniunt, ac tam diu in arbore matura perennant, dum succrescentia maturefcere, ac subrubere incipiant; nec prius desinant, quā succedentia sint ad perfectā maturitatem adducta; iamque tertij anni flores cæperint vernare. Quo fit, vt nisi quis in illis legendis præproperus fuerit, geminati in eadem arbore duorum annorum semper conspiciantur fructus alij perfecte maturi, alij vel subnascentes, vel acerbi, vel maturefcere incipientes, vel ad maturitatem iam spectantes,

prout

prout plus minusue tempus anni iam processerit. Neque nobilissimi pomi recentis tantummodo vsus est, sed etiam condiri, & longum tempus asseruari, totque ac tam varis condituris recipit hoc pomum, vt ex illis vel solis salgamorum cella possit repleri. Neque vero felicissimæ arboris gratia solo pomo terminatur; sed cum floribus quoque & folijs communis est. Nam folia ita mollia sunt tactu, vt reliqua omnium arborum folia præ illis scabra, & aspera sint, contrectantiumque, ac prementium manus suauissimo odore veluti vnguento pretiosæ notæ delibutas perfundant. Flores vero candidissimi non modo suauitate odoris ceteros vincunt, sed tanto etiam virtute, vt cum reliqui non nisi naribus admoti fere sententiantur, ij odorem tam late fundant, vt non modo circumiectum aer perfundant, sed quibusdam spirantibus ventis ad eos, qui felicem oram nauigijs præterehuntur, longissimo maris interuallo perueniant. Cuius odoris suauitas non simul cum floribus decidua est, sed humor ab illis distillans ab igne expressus ac lagenis vitreis asseruatus suauissimi odoris vsu perpetuum præbet. Iam vero arbor ipsa perpetuo virens orbiculari forma, ac densissimis frondibus conspicienda ea est, vt si quis illam verno tempore pomis, & floribus onustam contempletur, tribus diuersis coloribus eam variantibus, ac veluti acu pingentibus, eam miratus esse dicat arboris pulchritudinem, & varietatem, quæ auri fulgorem pomis; margaritarum candorem floribus; smaragdorum viriditatem frondibus exprimat. Eadem laudes in ceteras species conueniunt, quæ forma tantummodo, ac magnitudine, & colore pomorum diuersæ sunt, id quod in ceterorum malorum genere vsu venire scimus. Hæ arbores, simulque mollissima myrteta, quibus solum vestitur cum perpetuo virore, & odore, tum topiariorum textu, quibus ea arbor apta in primis est, totam oram conspiciendam faciunt, quam etiam mire exornant

M

quam-

quamplurima oppida, & ædificia, quæ passim cernuntur. Eximia illa additur gratia repentium fontium, qui non modo delicatum vsum balneorum præbent, sed ad complura morborum genera sananda, & leuanda miras habent virtutes. sulfureæ etiam sunt venæ, ex quibus exhalans vapor per subterraneos specus ad corruptos humores exiccandos, debilitataque membra corroboranda, doloreque tollendos mirum in modum valent. Sed nihil ad locorum amœnitatem & pulchritudinem cõmendandam maiorem vim habet, vt mihi quidem videtur, quàm prospectuum iucunditas. Cuius rei sine cõtrouersia huic oræ palma tribuitur. Nam cum prospectus dupliciter cõmendantur: vel ex ipsa aspectus ratione, iustaque dimensione, vel ex rerum, quæ aspectui subijciuntur, specie, ac varietate, mirum est quantum vtraque re Neapolitani prospectus ceteris omnibus antecellant. Etenim cum nimis propinqua loca cursum radiorum ab oculis exeuntium cohibentia aciem visus perstringant, ac veluti carcere cõstringant, quæ offensio iucunditatem aspectus debilitat, ac plane tollit, contra infinitus prospectus nullis locorum terminis circumscriptus per immensam vastitatem excurrens; nulloque loco consistens, aut quiescens veluti lassetur, & hebetetur, nullaque obiectione speciei iucunditate perfusus, aut recreatus languescat, ac plane iaceat, vtroque incommodo caret Neapolitana ora. Per amplum enim Theatrum, circumiectæque Insulæ satis laxamenti oculorum aciei ad excurrendum præbent; eandemque obiectione suo terminant, ac circumcludunt, ne latius diffusa dissipetur, & euanescat. Hic prospectus cum ex omnibus sinu partibus pulcherrimus, & iucundissimus petitur, tũ vero si quis tranquillo mari ex ipsa Vrbe Neapoli, quæ in medio sinu posita toti oræ veluti dominatur, atque extantibus in illa locis, ac collibus, quos mœnia complectuntur ipsam subiectam tantæ magnitudinis Urbem, portum

portum omnis generis nauigijs refertū; superbam molem pulcherrimæ arcis coniunctam, velificantes naues vltro citroque commeantes contemplatus fuerit, circumferensque oculos vniuersum in circuitu sinum in crateris formam curuatum, amœnissimas Insulas; frequentia, ac magnifica suburbana ædificia, egregia per totum sinus ambitum oppida; nitidissimos colles, latissimas arbores; perpetuum hortorum, & topiariorum virorem, quibus omnia circumuestiuntur, maritimæq; antra, & opacos scopulorum secessus circumspexerit; clementissimique cæli teporem senserit, non iucunditate modo, sed admiratione, & horrore quodam peresus dicat, naturam cetera orbis loca alia alio fauore amplexam; maioreque beneficiorum copia alia alijs impartitam; at in felicissimā hanc oram vniuersam benignitatis suæ vim ac cumulum effudisse; cumque multis in orbis locis maiore gloria, quàm alibi confederit, in hac regione sedem ipsam Imperij, ac Regiam sibi constituisse. Iam Urbis mœnia ingressi præcipuas laudes attigimus, Portum, Molem, Arcem, colles, prospectus; nunc reliqua explicemus. Nō satis hæc Urbs in latitudinem patet; minusque quam pro magnitudine, & immensis opibus ampla est, quamuis nouissime Petrus Toletus Vicarius Cæsaris pomerium protulerit; Urbisq; longitudinem produxerit, receptusque intra mœnium septa collis ambitū Urbis auxerit. Vrgentibus enim a tergo collibus coarctatur. quo fit vt præter eam partem, quā Toletus addidit, quæ pulcherrima omnium est, quæq; dignitatem huius Urbis mire auxit, ac præter amplum decumanum hæc Urbs angustioribus semitis & angiportis vtatur; neq; multæ in ea sint perpetuæ viæ, sed omnia sint anfractibus, & flexibus implicata. quin etiā præter forum mercati, quod per amplum est, nullas satis laxas areas, aut campos habet. Sed hæ angustię altitudine ædificiorum compensantur excelsis cernaculis sublatorum. Illudque

est in hac Vrbe eximium, quod cum in ceteris Urbibus tenuiorum, & plebeiorem tecta humilia fere sint, in hac infimorum ædes altitudinē nobilium domorum æquent, omnesque fere in quintam contignationem, nonnulla etiam in sextam consurgant, quæ totidem familijs sedes præbeant. frontiumque specie, & pulchritudine nobilium domibus pares sint. nam ostia, & fenestras affabre factas habent, antisque & epistylijs, ac zophoris & coronis ornatas. Quæ laus haud scio, an ulli alij vrbi contingat. Ipsi porro nobilium domibus nihil ad magnificentiam deest. Nam maxima pars e lapide quadrato sunt, peristyliaque habent, atque ornatissimas, & laxas porticus, quæque vnica huius Urbis commendatio est, maxima illarum pars pensiles hortos habent feliciū arborum syluis confitos ad secundam cōtignationem sublato, in qua Herilis habitatio est, cum reliqua familia in inferioribus, & superioribus locis cubet, vt ex ipso Triclinio, ac cubiculis, quibus Herus vitur, sit in hortos ex æquo loco transitus. Quare vt nihil esse potest in priuatis ædibus aut ad vsum commodius, aut ad hilaritatem, & amœnitatam iucundius, ita illud ad Urbis gratiam cumulandam in primis est insigne, quod bis in anno vernantibus floribus omnes Urbis partes, omnesque plateæ suauissimo odore se fundente fragrantem imaginem quādam feliciū Insularum, quas Poetæ fabulantur, peregrinis insolita re obstupescatis præbeant. Iam vero vt nullum absit bonum saluberrimæ & liquidissimæ aquæ tanta est, ac tam exuberans copia, vt amplissimo aquæductu in Urbē inducta non modo per Urbem passim in Castella ingentē vim aquæ ad publicum vsum fundentia distribuatur, sed in omnes fere priuatas nobiliū domos, quæ quidē in inferiore Urbis parte positæ sunt, per plumbeas fistulas illata nō modo necessarijs vñibus, sed amœnitatibus etiā fontium, & hortorū irrigationibus sufficiat. Hæc fere de Vrbe inanima, circūiectaque

Etæque regione paucis perstringenda visa sunt, in quibus nimius fuisse videri non possum, quod quæ voluptas contemplantis oculos tenet, eadem loquentis cogitationem comitetur, ac quemadmodum videndi vis latissimo aspectu, ita animus iucundissima recordatione numquam satiatur. Sequitur ut ad Ciuitatem animatam considerandâ accedamus, quæ pars longe maior, & grauior est; in qua Ciuitate omni bonorum genere cumulanda nō minores Fortuna exercuit vires, quàm Natura in regione oranda, ut non Cereris modo, & Bacchi, ut veteres dixerūt, sed quod longe præstabilius est, naturæ, & fortunæ certamen, ut initio dixi, Ciuitas hæc esse videatur. Quæ res perspicua erit, si quis res, quibus magnarū Urbium dignitas max. Illustratur animo & cogitatione complexus fuerit. Eas ego quattuor imprimis esse statuo. Primum Incolarum frequentiam, deinde Ciuium opes & sortem; tum negotia, & cōmercia, postremo Imperij magnitudinem. Hæ res tantā vim habent ad Ciuitatum dignitatem extollendam, ut quæ Ciuitas vna exijs laudibus præcellat, ea in prima commendatione ponatur. In quàm alto igitur fastigio Urbem Neapolim locabimus, quæ omnibus ijs bonis ita floreat, ut ceteras Ciuitates ea ipsa laude, qua singulæ commendantur, longe superet? Singula mēbra persequamur. Atque in Incolarum multitudine brevis ero, quod ea res explicatione longa non eget. Ducenta circiter millia Ciuium capita (omnē ætatem & sexum utrūque complector) esse pro comperto affirmant; idq; ducta tritici, & annonæ ratione, alijsque certissimis argumentis perhibent cōstare; qui numerosa nulla Europæ Ciuitate præter Lutetiam, superatur; a quā paucissimis æquatur. Verum non tanta est in multitudine, quanta in genere hominum commendatio. Natura enim acutissimi sunt ingenio quæ præstantes, & ad omnes magnas res apti; linguaque ita prōpti, ut eloquētia naturæ beneficio eius Regionis

gionis propria esse videatur; plurimiq; omnibus ætatibus in hac Vrbe, ac toto Regno, omni doctrinarum laude omniq; litterarum gloria floruerint. Aptique in primis militiæ sunt, quod ingens sit & in corporibus robur, & in animis vigor, manuq; strenui sint, & animo audaces, contumeliarumq; & iniuriarum minime patientes; suiq; ipsimet acerrimi vindices; quiq; pro dignitate tuenda nullum recusent discrimen. Equestris præterea rei vñ peritissimi, in qua exercenda maximam operæ, & ætatis partem nobilitas positam habet. Iam vero, quæ altera erat laus, ea est Neapolitanæ Nobilitatis conditio, atq; is fortunæ status; exq; sunt Ciuium Neapolitanorum opes, quæ non fidem modo, sed admirationem pene exuperent. Cuius enim animum stupor quidam non defigat, cum secum repurauerit, Neapoli plus septingentos Ciues esse Vicorum, Castellorum, Urbium etiam dominatu conspiciendos, in quibus plus centum sint Principum, Ducum, Marchionum, Comitum titulis insignes; magnusq; eorum numerus sit, quorum annua vectigalia dena aureorum millia excedant, nonnullorum etiam ad quinquaginta millia, aut eo etiam amplius perueniant. Vt vere dici possit maiorem prope esse in hac Vrbe fiduciarias Ditiones obtinentium, ac populis dominantium, quàm in multis alijs opificum, & sellulariorum numerum. Paullo plus quam æquum sit, sibi assumere Neapolitani, tum dioraq; esse hominū ingenia, ac de se, & de Ciuitate sua paullo iactantius, & inflatius loqui existimātur. quod si quis secū reputauerit, fortunā hominibus animos, ac spiritus facere, fortasse illis ignoscat, si nimia rerū copia, affluētesq; opes illorū orationē paullo lōgius interdū puehāt. Negotia vero, quod tertiū ad cōmendationem proponebatur, Dij imortales quā multa, quā magna, quā multiplicia sunt, siue opificiorū copiā, & varietatē spectes, totāq; Urbē tabernis refertā aspicias, siue in maritima, & terrestria cō-

stria cōmercia, mercatorumq. frequētiā intueare; siue ad iurisdictionem & forenses causas animū conuertas. Maritimorū quidē cōmerciorū testis est portus onerarijs, & omnis generis nauigijs perpetuo refertus; nullaque Vrbs est tota Italia, in quam maior mercatorum copia commigret: quæque illos cum maiore quæstu, maioribusque compendijs dimittat. Amplissimæ sunt societates in vēstīgalibus publicis exercendis, & in ceteris omnibus rebus, in quibus mercatorū elaborat industria, occupatæ. Causarum vero forensium multitudo tanta est, quantam vnā in Ciuitatem inducere potest tanti Regni amplitudo. Quæ res immanem pecuniæ vim, immensasque opes huic Vrbi accumulât. argumento est Iurisconsultorum, & Scribarum infinitus numerus, qui ex tenni re ad amplissimas opes perueniunt; quique magnificentissimas passim comparant, & ædificant ædes. latifundiaque & amplissima patrimonia successoribus relinquunt. Postrema laus fuerat Imperium, quod omnibus ijs Prouincijs definitur, quæ inter superum, & inferum mare a Latio, & Piceno totam Italiæ longitudinem vsque ad Rhegiū promontorium terminant. Quæ omnes vno vocabulo nostra ætate regnū Neapolitanum appellantur. quo Regno etsi nonnulla ampliora sunt, latioribusq. finibus patent, tamen cum plures sint in illis iurisdictionis sedes, nescio an vlla Vrbs vastis in illis Regnis sit, in quam maior populorū frequentia confluat; à quaue plures Prouinciæ petant iura. Sed quantum huic Regno de magnitudine decedit, tantū dē de nobilitate, & felicitate accedit. Nullus est enim toto orbe terrarū ad cōmercia opportunior situs, quippe qui mare mediterraneū mediū secans, ac veluti nota discriminans, & in oēs cæli plagas vergens cōmodissimos, ac breuissimos ī Africæ, Asiæ, Græciæ, Illyrici oras habeat traiectus, atq. vtraq. eius littora omnibus amœnitatibus arborū cōsita frequētissimis, & tutissimis, perāplisq. protubus,

ac quāuis magnarū classium capacibus sint excauāta. Sed de huius Regni laudibus agere in praesentia nō necesse habeo. nā & res bene longū panegyricū magnitudine sua postular; & mihi Urbem tantūmodo Neapolim describere propositum est. Illud tantum omittere non possum, eam esse huius Regni felicitatem, vt fructuum copia, varietate, praestantia ceteras omnes orbis regiones vincat; nam nulla omnino re ad humanum victum, & cultum tam necessarium, quam delicatum eget importata, & ipsum tantam fructuum copiam ex se effert, quæ cum necessarijs incolarum vsibus affatim suffecerint, quæ superant exportata tricies centum aureorum millium numum pretiū conficiant. Ingens enim vis tritici, generosi vini, olei, saccari, serici, lanæ, carniū, cumini, croci, Mannæ quoque, & Reobarbari, ac ceterarum denique omnium fere rerum, quæ vsuum necessitas, & amoenitas postulat, ex hoc Regno in omnes orbis partes exportantur. Sed nulla re æque commendatur hoc Regnum atque generosissimorum equorum gregibus, qui crecta, & præcella forma; eoque vigore & virium robore, vt omnia aduersa impetu prosternant, bello supra omnes quos natura fert, apti existimantur; quiq; impensissimo pretio, ac quincuplo fere pluris, quam reliqui multarum regionum equi comparantur, quibusque potissimum, si illorum facultas est, Reges, ac magni Duces, & Proceres prælium inituri salutem suam cūmittant. Quam igitur Urbem cum Neapoli conferemus? quam cum illa in pari laude ponemus? quæ Ciuitas ad illius gloriā aspirabit? atque adeo quæ non illi plurimum de dignitate cōcedet? De cuius laudibus hæc adumbrasse satis sit; quæ pro dignitate explicare maioris otij, & ingenij fuerit. Ego enim me Ferrariensis imperio tuo satis obsecutum puto in locis notandis, req; nuda tibi ante oculos ponenda. quam qui otio abundant, & dicendi vi præstant, qua

ego

ego vtraque re careo , orationis copia dilatandam , & illustrandam suscipere possint . Vberrima enim materia est , & amplissimus campus , in quo eloquentia excurrere possit . Multos , vt omnia sunt humana , fore non dubito , qui sententiam meam improbent , meq. reprehendant , quin etiam nonnulli indignentur , & stomachentur , me multarum Vrbium gloriam , quarum dignitas multis , & eximijs naturæ , & industriæ bonis in primis commendetur , obscurasse ; ac tantis , & tam multis Ciuitatis Neapolitanæ laudibus pene obruisse . Hic Ferrariensis , quid (inquit) alij existimaturi sint , ipsi videant . Illud ex te quæro Brumane , etiam ne Romæ , & Venetijs Neapolim anteponas ? Cui Brumanus , Ego (inquit) sic statuo Ferrariensis Urbem Romam , si veterem illam spectes , nullam iam esse ; reliquias tantum priscorum ædificiorum , & ornamentorum extare : quæ res cum verius cælestes , quam humanæ sint ; ac si ita loqui fas est , prope Diuinæ , ipsa cælestium rerum , vt ita dixerim , fragmenta omnibus humanis rebus quamuis integris longe præstare ; eiusmodiq. esse eas reliquias , ut non Neapolim modo , sed omnes orbis terrarum Vrbes præ illis minimi faciam . Ea est enim illarum maiestas , vt intuentium animos veneratione perfundant ; stuporeq. quodam mentes contemplantium defigant , ac non modo orbis terrarum Imperij memoriam renouent , sed ipsum adhuc imperium spirare videantur . Nouam autem Romam quod Religionis arx , & domicilium sit , quodq. , Christianæ Ecclesiæ caput in ea sedes habeat collocatas ; quodq. ab illa sacra iura cunctus Christianus orbis petat , eximiam ijs de causis esse confiteor , nullamq. omnino Urbem cum sacrosancta hac conferri fas esse . Venetias vero , cuius Urbis maiestatis plena imago mihi semper animo obuersatur ; quæq. Patriæ

N chari.

charitatem apud me obtinet; cuiusque Urbis gloria, & opibus Italiæ dignitas, & salus in primis nititur, non in terra, sed in mari sitas esse dico. Quare Urbem illam veluti extra orbem positam, extra certamen quoque esse debere. Habes Ferrariensis meam de Vrbe Neapoli sententiam. quam si tibi verbis parum probaui, haud dubito, quin ipsius Urbis aspectus, si ad illam te vniquam accedere contingat, sit probaturus.



VBERTI

VBERTI · FOLIETAE
DE · NONNVLLIS · IN
QVIBVS · PLATO · AB · ARISTO ·
TELE · REPREHENDITVR



AD · ANTONIVM · VACCAM
IVRISCONSVLTVM · EXIMIVM



VLTVM solet Antoni Respublica
Platonis sermonem dare, resque in
conuiujs & in litteratorum coetibus,
ac quotidianis congressibus ingenti-
bus contentionibus, & disputationi-
bus iactatur; ac sententijs certatur.
nam maxima pars, quæ Ciuitas inter mortales numquam
fuerit, eam omnino constitui posse negant; totamque
hanc opinionem commentitiam plane, & nugatoriam
esse affirmant, quæ ad mentis quidem cogitationem spe-
ciosa sit, ad vsum vero, & ad hominum uitam numquam
accommodanda. Contra alij ijq. pauciores eiusmodi Ci-
uitatem inter homines numquam fore sperant, verum fa-
cultatem prorsus non tollunt; quin etiam affirmant, si
tanta sit alicuius populi felicitas, ut talis Reip. forma
apud illum constituatur, illisq. institutis assuefiant homi-
nes, sempiternam Ciuitatem illam, aut longe pluribus sæ-
culorum ætatibus, quàm ceteras omnes, quæ diuturnio-
ris æui fuerint, duraturam. Multa ij, qui a Platone dis-

sentiunt, reprehendere in illo solent rerum communita-
 tes; promiscua connubia, virilia, ac bellica munera cū
 mulieribus communicata, contra Platonis propugnato-
 res multa respondent. Atque vt promiscua coniugia
 in præsentia omittamus, quæ Diuina lege interdicta sunt,
 vituperationem munerum bellicorum historia Amazo-
 num, quæ certissimis, & grauissimis auctoribus constat,
 plane refellit. rerum vero communitas cur tandem facul-
 tatem non habeat, quam nostra ætate à plerisq. hominū
 institutis, & sectis coli nideamus? Neque vero Platonē,
 inquiunt, ab Aristotele recte reprehendi, eo quod negat
 rebus communicandis id assequi Platonem, quod contē-
 dit, vt scilicet causæ discordiarum inter homines tollan-
 tur, cum contra manifeste appareat, hanc ipsam rerum
 communitatem, vel præcipuam esse causam litium, com-
 muniēq. hanc rerum possessionem innumeras contro-
 uersias inter possidentes gignere, quæ possessio si dirima-
 tur, dirimi etiam lites. Vt in hoc meo, & tuo de hominū
 vita tollendo lites, & discordiæ non tollantur, sed indu-
 cantur. In qua re Aristotelem aiunt perpetuo studio Pla-
 toni aduersandi eo errore lapsum, quod non animaduër-
 terit, rationem suam in hoc vitæ genere, quo nunc vti-
 mur, suscipi posse, in quo homines res possidere separa-
 tim possunt. verum eam non ualere in ea ciuitate, cuius
 legibus, & institutis separata rerum possessio ciuibz sit
 interdicta. quid enim de illa re inter se ambigant homi-
 nes, quam ad se priuatim trahere, ac separatim possidere
 non possint? Vsu sæculi nostri, vt diximus, coargui Ari-
 stotelem, in quo tot sint opulentissima cœnobiaz, quæ la-
 tifundia, & amplissima vectigalia possideant; de quibus ta-
 men diuidendis nullæ sint inter Monachos lites, quippe
 quibus cōmuniter frui illis necesse sit, neq. suam quisq.
 partem sibi priuatim possit asciscere, nullæq. proinde di-
 scordiæ, ac rixæ, nullæq. odiorū causæ inter illos ori-
 untur.

nur . Sed facere hoc non nouum Aristotelem , aiunt , vt de Platone quantum possit, detrahat, ac quæcumq. eius viri possit ad reprehensionē carpat, qua in re sæpe ipsum, pace illius dixerint, turpiter labi; Platonisq. vicem sese ipsum vlcisci . veluti cum honestatem ab vtilitate seiungit, aliquaq. honesta esse affirmat, quæ vtilia non sint, vtiliaq. esse multa, quæ honesta non sint, contēdit . qua re quid pugnātius inter se loqui potuisse tantum cetero qui Philosophum? honestum enim esse quidquid cū virtute coniunctum est; contra inhonestum quidquid vitio sum . hoc igitur posito, nihil cuiquam aut homini, aut arti, aut instituto vtile esse posse, quod à fine, qui arti illi propositus est, abducat; contra omnia vtilia esse, quæ ad finem illum ferant, siquidem finem in omnia, quæ ad finē illum assequendum comparata sunt, sua se vi fundi, resq. omnes speciem ab illo accipere; recteq. dici à fine omnia pendere . Igitur cum vltimus hominum finis, summumq. bonum, ac beatitudo ipsa teste Aristotele ipso nihil aliud sit, quàm virtutis pròptus, & expeditus vsus; ad hunc autem altissimum gradum facilis vsus virtutis, vt ipsemet Aristoteles docet, virtute ipsa duce, assiduoque illius vsu, & crebra vsurpatione perueniamus, contrariis vero actionibus ab illo procul arceamur, fieri, vt omnes actiones honestæ, quæ eadem cum virtute coniunctæ sunt, necessario vtilis sint, quippe quæ ad summum illud bonum, summamq. illam vtilitatem, in qua omnia homini sunt, viam expediant . Contra inhonestæ; ac cum vitio coniunctæ inutiles plane sint, quæ ad hunc ipsum finem, summamq. illam vtilitatem iter intercludant . quo fieri, vt si quis ius violet; & ab honestate discedat, vt magnas opes, & potentiâ pariat, inutilem in primis sibi rem faciat, quippe quæ ad veram, & summam illam vtilitatē iter moretur, atq; adeo obsepia . Ac ne illud quidē leue esse erratū; nec minus secū ipsum pugnare Aristotelē, qui in Politicis

Politicis diserte affirmet, posse aliquem bonum Ciuem esse, qui idem bonus uir non sit; contra malum aliquem Ciuem sæpe bonum uirum esse. Vt si quis in corrupto aliquo reipublicæ statu leges ferat iniustas, atque alia iniusta quidem faciat, uerum quæ ad statum illum tuendum sint accommodata, is malus quidem, & improbus uir erit, uerum bonus illius Ciuitatis Ciuis, quippe qui statum illum tueatur. quam orationem ut in usu loquendi forensi suscipi posse, ita Philosopho turpem in primis esse, cui non ad uulgi opinionem, sed ad ueritatē res sunt exquirendæ, & nominandæ; ipsius quidem Aristotelis principijs aduersari. bonum enim ciuem eum tantummodo esse, qui quæ ueri sunt Ciuis munera colit, munus autem, & officium boni Ciuis esse, & se ipsum, & ceteros Ciues ad finem, cuius causa ciuitates institutæ sunt, dirigere, & conformare. Cum igitur Aristoteles Ciuitatem definiat, congregationem hominum esse bene, beateque uiuendi causa constitutam, beata porro uita sit, ut paullo ante diximus, uirtus ipsa, atque illius expeditus usus, eum profecto fore non modo bonum uirum, sed bonum quoque Ciuem, qui legibus, & institutis suis Ciues suos uirtutum usu assuefacere contendet; eosque sanctis legibus, & institutis ad finem, & beatitudinem, quam Ciuitatum institutio spectat, perducere studebit; contra qui flagitiosis legibus, & institutis, ut Tyrannicum, & corruptum reipublicæ statum tueatur animos ciuium deprauabit, malum hunc, & sceleratum uirum, bonum fortasse corrupti status illius assertorem uocari, boni uero Ciuis nomine in Philosophorum schola carere debere, quippe qui a boni Ciuis officio & ipse recedat, & alios abducatur. Verum ad incœptam de Rep. Platonis disputationē redeo. Equidem cum multa audio utrimque probabiliter dici, sententiæ uarietate distrahor; ac modo in hanc, modo in illam partem feror, nusquam tamen stabili

stabili assensu. Verum longe alia res est, quæ mihi animum magis dubium facit, quam eorum, qui de ijs rebus disputant, quæstione omitti miror. hoc est honorum, & munerum publicorum distributio. Non negauerim rerum possessionem, atque opum inæqualitatem magnorum motuum, ac malorum Ciuitatibus causas esse solere, multasq. respublicas, ex ea re labefactatas, ac funditus euersas, dum plebs, & tenuiores sese uel intolerandis oneribus & tributis confectos; uel æris alieni magnitudine oppressos, uel agrum, & totam regionem in paucorum possessionem cecisse queruntur, quibus ipsos extorres inopem, & miseram ætatem agere. quæ res Solonem atque alios sapientissimos uiros ad necessitatem tabularum nouarum adegit, Licurgumq. atque eius virtutis, & sapientiæ multo post tempore æmulos Agidem, & Cleomenem coegit, agros inter Laconas æqualiter paritiri. atque utramque rem legimus Romæ magnis contentionibus, atque interdum etiam seditionibus, quæ quandoque ad ferrum, & sanguinem exarserunt, sæpe tentatam. Verum nulli ad animos hominum incitandos atque inter se rixis, tumultibus, seditionibus, cædibus committendos acriores sunt stimuli, quàm honorum, & munerum publicorum partitio, qua peste omnes fere liberæ ciuitates semper laborarunt, quamplurimæ interierunt. In qua re Plato magnopere lapsus uidetur (disputandi hæc causa, non quod tantum uirum reprehendere audeam, pronuntio) qui si hoc meum, & tuum de Ciuitate sua sustulit, ut causam contentionum, & discordiarum præcideret, cur eam legem induxit, quæ fons discordiarum sit? Duo enim corpora Ciuium facit, quatum alterum ab honoribus, & publicis, ac bellicis muneribus prorsus excludit, atque agro colendo, opificiis faciendis, sellulariæ operæ; cæterisq. seruilibus ministerijs mancipat, alterum reipublicæ gerendæ præficit; muneraq. illi publica, ac bellica

bellica decernit, quæ lex multiplicem reprehensionem habere videtur, nam si plebem, & seruilem ordinem à Magistratibus, & honoribus tam pacis, quàm belli excludisset; paucosq. ad illos vocasset, minus hoc esset in inferiore ordinem contumeliosum; minusq. ægre ferrent secundæ sortis homines, earum se rerum expertes esse, quæ consilium, & virtutem postulant, quas res in se esse non intelligerent. Verum Plato nullam quamuis minimam aut infimam reip. partem illos attingere permittit; ab ipsisq. priuatis militiæ ministeriis, & à gregaria opera reipublicæ nauanda arcet. quæ res neque magni ingenij præstantisve indolis, neque eximij consilij est, vt quibus ad illâ videatur idoneus, modo corporis robore præditus sit. Cum militis officiū sit strenuam tantummodo corporis operam, atque obedientiam Imperatori præstare; resq. Ducum cōsilio regendas permittere, in quibus uis ingenij necessaria est. quæ animi indoles cum in paucissimis esse possit, exercitusq. ex magno hominum numero constare necesse sit, quid ita Plato superiorem ordinem totum ad bellica munera obeunda vocat, cuius maxima pars non magnopere virtute, & ingenio inferiori præstet; neque præstare necesse sit, cum etiam militibus vitio detur, consilia Ducum sciscitari, qui fideles tantummodo, ac dicto audientes esse debeant, ac promptam operam illorum imperiis bene obedientes præstare. Deinde humani ingenij vitio sit, vt vnusquisq. de se magnifice, ac longe supra quam ipse sit, existimet. quæ opinio omnibus natura penitus insita ex animis hominū euelli non potest. quo fieri necesse est, vt se ab armis tractandis, atque ab omni munere publico attingendo ad quas res se aliqua ex parte aptos putant, exclusos ægre ferant. qui acerrimus doloris, & indignationis stimulus illos ad rerum nouandarum cupiditatem possit incitare. nullum porro est tam infimum hominum genus

nume-

numerosum præfertim à quo periculū non immineat. Si-
 quidem Romanum ipsum Imperium tum cum maxime
 in flore virium esset, sæpe in extremum discrimen à sedi-
 tionibus, & bellis scruilibus est adductum. Equidē scio,
 multa ad hæc à Platonis defensoribus responderi posse;
 remq. longam habere disputationem. verū illud semper
 vincet, si quis rem vere existimare velit, atque omnium
 Ciuitatum annales memoria repetere, nullam vehemen-
 tiorem caussam, aut vberiore fontem discordiarum ci-
 uilium esse, quam hanc inter nobiles, & plebeios de ho-
 noribus contentionem. Habes Antoni meridiationem
 huius Tyburtini seccessus. quam ad te ideo potissimum
 misi, cum quod nemo est omnium amicorū, cum
 quo omnia mea communia esse malim, tum
 quod neminem de eiusmodi grauibus
 rebus melius, quā te iudicare pos-
 se existimo. expecto igitur
 quamprimum iudi-
 cium tuum.



VBERTI · FOLIETAE
DE · SIMILITVDINE
NORMAE · POLYBIANAE



AD · RAINALDVM · CORSVM
IVRISCONSULTVM · EXIMIVM



IBRVM meum de ratione scribendæ historia, quem amâtissime scriptû ad Octavianum Pasquâ Episcopum Hieracensem misi, te legisse scribis, eoq̃ue mirifice delectatum. In quo cetera omnia tibi probari adscribis, præter id quod affirmavi, rationem illorum mihi non plane improbabilem videri, qui nihilominus vt historia vera non sit, historiam tamen eam esse contendunt: à Polybioq̃, ea in re dissentiunt, ac similitudinem normæ ab eo inductam historię negant convenire. quam rationem paucis à me perstrictam, ac veluti per transennam ostensam tibi planius explanari postulas. Geram tibi morem. quid enim facere possum, aut umquam feci libentius, quam vt quacumq̃ re possem, voluntati tuæ obsequerer? quæq̃ue mihi occasio tibi gratificandi daretur, eam ne prætermitterem? postulat id cum vetus amicitia nostra sanctissime inter nos culta, singulariaq̃ue tua in me merita & officia, tum summa dignitas tua, quam tibi adiungit acutissimum & præstans ingenium, tum autem eximia & elegans doctrina cum haud vulgari eloquentia scribendiq̃ue facultate coniuncta,

iuncta, idque tam soluta, quàm numeris astricta oratione, ad hoc magna rerum ciuiliū scientia atque vsus. Verum illud prius testatum volo, me rem in vtramque partem in præsentia disputare in animo non habere, neq; iudicium meum interponere velle, sed rationem tantummodo à Polybio dissidentium tibi exponere. quibus ego tantum abest, vt assentiar, vt potius in contrariam partem, atq; in Polybij sententiam propendeam. cum tamen contra differentium, atque ab eo dissentientium opinionem non ita ab omni verisimilitudine abhorrētem existimē. transferenda hunc in locum sunt pauca ea, quæ pro sententia Polybij in libro posui. Qui igitur eius opinionem defendunt, atque auctoritatem sequuntur, quo in numero me quoque esse semper præ me tuli, ita disputant. Historiam veram esse oportere. neque enim aliud esse historiam, quam rerum veram narrationem. nam si historia narratio dumtaxat sit, tum vero historia nihil ab Epici Poetæ narratione differat. quippe quod vtraq; res gestas contineat. Vna igitur veritate duas has narrationes inter se distingui. Deniq. veritatem ita esse propriam historiæ, vt pars eius essentiæ sit. qua veritate carentem narrationem, non prauam modo, ac malam historiam esse, sed ne historiam quidem esse: neque historiæ nomen omnino posse obtinere. Itaque quamuis apta, ornata, copiosa, elegans sit narratio: quæque omnia locis, temporibus, personis, conuenientia plane seruet, consilia apte, & luculenter explicet; egregijs descriptionibus situs locorum, formas Vrbiū, ac munimentorum, instructiones acierum, ordines præliorum, discrimina, casus ante oculos ponat, ac veluti in rem præsentem legentium animos inducat, ac pro auditoribus spectatores faciat, omnibus deniq. eloquentiæ, & artis numeris expleta sit, si veritas in illa consideretur, decoram quidem, & aptam fore narrationem, at historiam non dico falsam, & prauam, sed nullam om-

nino futuram . Contra si rudi , & incomperto scribendi genere litteris sit mandata narratio ; neq; vllas partes ex iis habeat , quas Rhetorum præcepta præscribunt ; omnibusq. ornamentis plane sit orbata ; ad hoc consilia , & causas inapte explicet ; res gestas confusa narratione obscuret , ac pro eo ut lucem afferat , tenebras rebus ofundat , veritas tamen adsit , vilem quidem , & ineptam , ac despiciendam rem fore , historiæ tamen uim , & nomē retenturam . Magnopere igitur normæ similitudinem à Polybio commentam veluti rei mirifice aptam probant . Vt enim (inquit) norma ex auro , & ex quamuis pretiosa materia facta , si recta non sit , res quidem pretiosa est , at norma nullo modo esse potest . cum enim norma causa dirigendi operis inuenta sit , sit vt munus suum præstare non possit , nisi ipsa recta sit , quare ne norma quidē erit . Cōtra si recta sit ex quauis vili materia fabricata nullius quidem pretij erit , sed norma tamē erit , ita cum idem sit verum in historia , quod rectum in norma , efficitur , ac cogitur id quod diximus , vt falsa narratio neque sit , neque appellanda sit historia , quamuis omnibus verborum & sententiarum luminibus illustrata , ac politissimo genere conscripta : contra vera quamuis sordida , & inops atq; inepta re , & nomine sit historia . At qui contra sentiunt , distinctionem afferunt , contenduntq. aliud esse historicum , & historiam veracem esse , aliud historicum uerum , & historiam veram esse , cumq. qui in re gesta narranda veritatem non retinet , non vere rem narrare , eundem tamen vere narrare ; historiamq. in rebus narrandis à veritate discedentem , aut veritatem quouis modo corruptentem veram esse historiam , eandem tamen veracem non esse historiam ; neque ista inter se pugnare , si distinguere scimus , acriterq. in rem intueri . utrumque enim verum est , si ad diuersas res referatur . nam si verum ipsum ad rem gestam adiungimus , ac rem , quæ numquam
gesta

gesta sit, tamquam gestam referamus, vel si gesta quidē sit, non tamen eam, ut gesta est, explicemus, nō quidem rem veram narramus, neque proinde uerax est narratio, aut historia nostra verax, neque historici veraces sumus. res enim quæ numquam fuerit omnino, aut quæ aliter fuerit, vera esse non potest. quod si veritatem ad narrationem ipsam referamus, & vere is narrat, & vera est narratio, & verus *ιστορικός*, hoc est uerus narrator est is, qui narrat. quamuis enim rem veram non narret, neque narratio rei veræ sit, vera tamen est narratio, hoc est verum est, illum narrare. quare perspicuum esse id, quod propo sui, aliud esse historicum ueracem esse, aliud historicum verum esse. aliudq. historiam veracem esse, aliud veram esse. qui enim res veras, ac veritatem narrat historicus est verus, & verax, eiusq. historia vera, & verax est. qui veto rem veram non narrat, aut eam nō vere ut gesta est narrat, is verax quidem historicus non est, sed tamen uerus historicus, & eius historia non verax quidem est, sed tamen vera historia, hoc est vera narratio, quæ rem siue veram, siue falsam, & quocumque modo narrat. Verum est enim illum narrare. Regulæ vero similitudinem. quæ tantopere nonnullis arridet, futilem plane rem esse aiunt disputationiq. susceptæ parum aptam. non enim quemadmodum is qui narrat, æque narrat, cum verum, & eum falsum narrat, ita regula cuius munus est opus dirigere, æque dirigit distorta, ac recta. nam opus dirigere quæ ipsa recta nō sit, nullo modo potest, quin contra si materiæ per se rectæ adhibeatur, illam distorquet. quare regula non recta non male dirigit; sed non dirigit omnino. fit igitur ut regulæ neque vim, neque nomen obtinere possit. at quæ falsum narrat historia, male quidem, & improbe narrat, narrat tamen, quod ad nomen, & uim historiæ tuendum sufficit. Elegantiore igitur comparatione sese uti affirmât. institutæq. disputationi ita conueniente, vt

non

non similis sit ouum ouo, ac lac lacti. Ea autem est eiusmodi. Quod in historia est ueritas, idem est in iudicii iustitia. æque enim debet Iudex in causis cognoscendis, iudicijsq. tam priuatis, quàm publicis exercendis, & ambigentium cōtrouersijs diiudicandis, ad iustitiæ normā, legumq. præscriptum sententiam, & iudicium suum dirigere; atque historiæ scriptor ueritatem in scribendo spectare: atque æque utrumque ad utriusque fidem, & officium pertinet; atque æque uterque puniendus est, si ille à iustitia, legumq. præscripto discedit, ac si is à ueritatis lege declinat, hoc etiam grauius Iudex, quo maiore publico detrimento peccat. Quare fit, ut quemadmodum si Iudex iuste non iudicat, vel legum, & iuris ignorantia lapsus, vel gratia inflexus, vel pretio emptus, vel animi in alteram partem propensione deprauatus, vel etiam probabili aliquo errore obiecto, qui grauem & religiosum Iudicem a ueritate deducere possit, uere tamen Iudex est, latumq. iudicium non minus iniustum, quam iustum, uere iudicium est, vimq. & nomen, atque auctoritatem iudicij obtinet, eoq. non stare modo necesse est, sed etiā oportet, si Socrati credimus, ita historicus, si uel ignorantia, uel negligentia, uel ambitione, uel gratia, & assentatione, uel odio, & inuidia, uel quauis alia de causa à ueritate discedat, historicus tamen est, non quidem verax, sed uerus; neque historico- rum numero excludi potest; neque illius scriptis historiæ nomen est abrogandum. Perspicuum igitur esse putant, historiam falsam æque uere historiam esse, atq. iudicium iniustum, uere iudicium esse. Nam quod de Epico Poeta opponitur, eiusmodi esse aiunt, ut nihil sit responsu facilius. Neq. enim ueritate, ac falsitate historicum ab Epico Poeta distingui. in qua re versari magnum errorem. esse enim qui putent, ea in primis re historicum ab Epico Poeta differre, quod ille in narrando uerax sit, hic mendax;

dax; illiusque narrationem veram, huius falsam, ac fictam esse oporteat. quorum errorem aperiendum esse. neque enim historicam Epici Poetae narrationem, quae vera est, ex quattuor partibus Epico Poetae necessarijs, falsam, & mendacem esse necesse est. nihilominus enim erit poetica narratio, Poetaeque conueniens, si vera, ac si falsa sit; quin etiã qui in Epicis Poetis fastigium tenent Homerus, & Vergilius veras narrationes amplexi sunt. Vere enim Troia decem annis à Græcis circumfessa narratur; item vera est Aeneae nauigatio, verusque in Italiam aduentus, verumque praelium cum Turno de Lauinia nuptijs secum ambigente commissum: Vera inquam haec sunt omnia, nihilque ab historicorum narrationibus, à quibus sumpta sunt, discrepant. In quo ergo Epicus ab Historiographo differt? quod historiae scriptor rem simpliciter narrat, nihilque a proposito aberrat, nihilque à se confictum, aut extrinsecus delectandi causa petitum, quodque à narratione alienum sit, illiusque seriem interrumpat, narrationi institutae interponit. At Epicus Poeta, quot, & quanta Dij immortales incohatae narrationi inserit, quas fabulas à se confictas, quot iucunda mendacia, quae Deorum consilia, quas eorundem rixas, orationes, studia etiam partium, vaticinia, oracula, monita, spectra passim inculcat. vt minimam operis partem suscepta narratio obtineat, omnisque ingenij, & industriae vis contenditur in re varijs ambitibus ornanda, & illuminanda, amoenisque, ac frequentissimis fabularum diaeticulis, quae Græci *παιδια* vocant, distinguenda, ac veluti varij generis floribus, & coloribus pingenda. Neque vero fabulas tantummodo extrinsecus accersitas, quaeque nihil ad institutam historiae narrationem pertinent poesi suae inserit Poeta, sed ipsam historicam narrationem fabulose contexit, cum tamen veritatem historiae non peruertat. nihil enim prohibet verum fuisse, & ex historia petitum,

Aeneae

Aeneæ classẽ suã tempestate iactatã, ac procellis pene obrutam, totamq̃ue disiectam esse. quæ res cum paucis expediri potuisset, quot ambieus Dij immortales circa eam facit Poeta, quotq̃ue fabulosis commentis illam dilatat, ac variat, cum Iunonem exacrabilio odio Troianis infensam facit, indignabundamq̃ue, & exoptulantem adeo numen suũ sperni, vt gens capitaliter inuisa tam diu incolumis nauiget; ipsaq̃ue inuita optato Italix solo positura sit; Acolum pacta nuptiarum mercede ab illa exoratum claustra euertisse; ventos carceribus emissos; Neptunum imis sedibus excitum audaciam ventorum grauitè increpuisse, quin etiam in ipsum illorum Regem aspere inuectum, qui in aliena Ditione imperium exercere veritus non esset; neque suis se finibus continuisset ventisque nutu Dei fugatis tempestates sedatas mareq̃. tranquillum factum. Eiusmodi sunt Poetarum narrationes. Neque enim id studet Poeta, vt quemadmodum Historicus narrando homines doceat, sed vt animos legentium afficiat, in illisq̃. in quam partem velit permouendis prima est Poetæ commendatio. quare mentes hominum modo incitat, modo reflecit, animorumq̃ue sensus modo inflammat, modo inflammatos restinguit; modo ad iram, modo ad misericordiam impellit, modo amoris flammæ, modo odij stimulos suscitât. modo gestienti lætitiã animos titillat, modo ardentissimas doloris faces admouet, modo gaudiũ, & risum excirat, modo fletum, & misericordiam commouet, modo animos exacerbat, modo sensu quodã suauitatis perfundit. Deniq̃. quantum sit munus Poetæ per animos hominũ sensu quodã, & permotione peragere, quanta operæ pars sit infundenda in illis afficiendis, quemadmodum ipsos affici velit, declarauit Horatius, qui ei rei palmam dedisse videtur illis uersibus.

Ille

- Ille per extensum funem mihi posse uidetur
- Ire poeta, meum qui pectus inaniter angit;
- Irritat, mulcet, falsis terroribus implet;
- Vt magus & modo me Thebis, modo ponit Athenis.

Non igitur id spectat Poeta, ut audientes gestarum rerū participes, & gnaros faciat, sed aurium voluptati omni verborum lenocinio, omnibusq. figmentorum illecebris influit, audientiumq. delectationem, quæ res est illi in primis proposita, omni ratione captat, tantoq. præstantior est Poeta, quanto ad inueniendum, & fingendum natura est habilior, atque vberioribus, & celerioribus utitur ingenij motibus. quam rem in Poeta dominari recte affirmat Plutarchus quantus qualisq. Philosophus, quàm acri iudicio præditus. nam neque numeri, inquit, neque uerborum immutationes, neque dictionis maiestas, neque translationis opportunitas, neque concinnitas, & compositio tantum habet blanditiæ; atque gratiæ, quantum fabulæ apte connexa dispositio. non igitur id quod nomen ipsum declarat, simplex narrator est Epicus Poeta, ut historiæ scriptor, sed fictor, & creator. quod nomen non tam a carminibus faciendis, & creandis impositum habet, quàm a fabulis a se fictis, & creatis deductum. quod Græcorum auctoritate firmatur. Veteres enim eos, qui rem simpliciter carminibus narrabant, carminaq. faciebant nullis fabularum figmentis admixtis, non diuino hoc Poetæ nomine dignabantur sed *ἱεροποιός*, hoc est carminum factores appellabant. Tradit enim idem Plutarchus sacrificia nonnulla choris, & tibiis carere posse; Poesim fabularū, & figmentorum expertem esse non posse. quare Parmenidis, & Empedoclis inuestigationes, & disputationes rerum natura, quibus addere possumus Lucretium nostrum; item Nicandri theriaca, ac Theognidis sententiæ, quamuis carminibus conscriptæ poemata tamē non sunt, neque illarum auctores in Poetarum numero umquam

habiti sunt, aut Poetæ nuncupati. Iam vero ipsemet Poeta Epicus in initio Poematis sui sese non narrare, aut scribere, sed canere p̄fitetur. Musasq. proinde inuocat, quæ sibi canenti adsint, canendaq. inspirent. quæ preces superuacaneæ plane essent, si ipse, id quod facit historicus, narraret tantummodo, neque fingeret, ac res crearet, quod nisi Diuino quodā instinctu, ac furore mentes Poetarum tactæ efficere non possunt: At historiæ scriptori nihil necesse est internum hoc lumen præferri, neque eius modi furore illius mentem calefcere, neque rem ab ipso non inueniendam, aut fingendam, sed palam in oculis hominum gestam tamquam ignotam illi Diuinitus subici. non igitur Musas, aut Diuinum vllum numen inuocare cogitur. Nimiis in re perspicua sum. cum præsertim Vergilij, & Homeri poemata, quæ omnibus patent, laborem hunc mihi adimant. Patet igitur, quàm Poeta Epicus obiectus nihil contra nos faciat. Iam vero si nulla est historia, nisi quæ verax est, nulla iam erit historia. Vt enim verax dici nō potest is, qui in multo maiore parte vitæ veritatem retinet, aliquando tamen, & aliquibus in rebus ab illa discedit, ita verax historia non est, quæ tota vera non sit, quæque nonnumquam, & aliquibus in rebus mētiatur. at nemo v̄mquā historiæ scriptor (historias in sacris libris scriptas semper excipio) non aliqua in re lapsus, ac falsus est, non modo in causis, & consiliis exponendis, in quibus tamquam abditis, & abstrusis maior est errori veniæ locus, sed in ipsarum rerum, quæ palam geruntur, narratione. nullam enim rem à pluribus scriptoribus, vel eiusdem ætatis, qua res gesta est, & qualibus traditam legimus, quæ non aut tempore, aut ordine, aut modo gerendi, aut vero aliqua ex sui parte variet; in eaq. narrādi scriptores inter se discrepent. quamuis de re ipsa inter omnes constet. Verbi gratia Annibalē in Italiam cū Punicis copiis descendisse, inter omnes conuenit. at quā-

tæ fue-

tæ fuerint copix, scriptores haud paruo numero inter se
 dissentiunt. idem est dissensus de copiarum numero in
 Africam a Scipione trajectarum. Iam vero in Tib. Grac-
 chi eius, qui bello secundo Punico clarissimas res gessit,
 cæde tradenda, quomodoq. is in insidias præcipitarit, mi-
 ra est scriptorum varietas, cum tamen inter omnes con-
 stet, perfidia circumuentum cecidisse. Eiusmodi uarietati
 plenæ sunt omnes historiæ. Vt T. Liuius, qui omnes res
 gestas P. R. ab ipsis Urbis initiis a compluribus scriptori-
 bus traditas, ac dispersas in vnũ corpus redigendas, vnâq.
 & continuatam historiæ seriem contexendam suscepit, in
 tanta scribentium varietate plurimum negotij habeat in
 veritate coniicienda; iudiciũq. suum sæpenumero in-
 terponere cogatur, quæ narratio ad veritatẽ propius ac-
 cedat. quod iudicium, & ipsum sæpe potest labi. Qua in
 re alterum fieri non potest, vt plus vna eiusdem rei narra-
 tio vera sit, alterum fieri potest, vt omnes falsæ, & erran-
 tes sint; cum vna tantummodo sit veritas, vnâq. dumtaxat
 ad illam perueniendi, illamq. tradendi ratio, & via;
 ac plurimæ, atq. adeo infinitæ sint ab illa aberrationes.
 Quocirca alterutrum necesse esse contendunt, vt aut hi-
 storiam esse vllam omnino negemus, quod ne ipsi
 quidem, qui normæ similitudinem excogita-
 runt, dicere ausi fuerint; aut quæ vera
 non sit, historiam ta-
 men esse.



VBERTI · FOLIETAE
IN · FESTO · DIE · OMNIVM
SANTORVM.



AD · IVLIVM · III · PONT · MAX ·
ORATIO.



ETEREM Ecclesiæ morem Iuli Pontifex Maxime sanctorum virorum, quos eximia, præstātesq. virtutes ad beatas Diuorum sedes extulerunt, commemorationem anniuersarijs festis diebus celebrādi hodierno die colentes, qua nam tanta amentia vi teneri, quove tanto sceleris furore agitari nostrorum temporum hæreticos dicemus, vt præ nimio de sanctæ huius sedis dignitate quibuscumque rebus possunt detrahendi studio, pium in primis vsum reprehendere, & vituperare non dubitent? Neque animaduertunt viri amentissimi in sancta hac sede eiusq. institutis insectandis, quam impietatis inuidiam illi studēt confare, eam in ipsos redundare. Etenim cum morem hūc iam inde ab ipsis Christianæ religionis initis, atque primordiis manantem, omniumq. deinceps sæculorum vsurpatione in Ecclesia retētum ad nostram vsq. ætatem perductum constet, tanta tamen isti nos, nostraq. oppugnandi cupiditate feruntur; tanto, tamq. capitali odio a nobis dissident, vt dum Romanos ritus omni ratione euertere, illosq. vel impietatis, vel superstitionis arguere contēdunt, ne sanctissimis illis quidem

dem temporibus parcant . Quorum singularem audaciã & temeritatem nihil est, quod nos longa oratione retundere aggrediamur, cum brevis interrogatio illos elingues reddere possit ; eumq. illis laqueum iniiciat, quo si expedire se velint, magis induant . Aut enim hunc morem priscis Ecclesiæ temporibus fuisse negent necesse est , aut si maxime fuisse fateantur , illum tamen ad imitationē non satis valere contendant . Vtrum horum dixerint, in eo vel non ferendæ impudentiæ , vel intolerabilis arrogantæ & impietatis crimen hærebit . Nam si negent fuisse, cum innumerabilibus, & apertissimis sanctorum Patrum testimoniis concionibusq. ab illis in anniuersarijs, ac sollempnibus harum commemorationum diebus habitis, tum omnis generis monumentis impudentissimi mendacij cōvincuntur , quod si priscæ Ecclesiæ auctoritate standum negent, hoc vero omnis impietatis caput est, fundamētum videlicet illud firmissimum, quod Christiana veritas in primis innitur, labefactare, atque adeo euertere conari . Ac mihi quidem istorum amentiam miranti ; causamq. tantæ insanix quærenti nulla alia in mentem venire solet, quā Deo immortalī lumine suo illos deferente sacrilegos homines a mente consilioq. deduci Diuinumq. Numen immanium scelerum poenas quæ maxime sunt , ab illis retere . An illi Patres amplissimi, tot sacrilegia, tot piacula impune ferrent ? Quiq. tam multa in Deum immortalem impie , nefarieq. commiserint ; eius templa sanctissima violarint , spoliarint , euerterint , sacras aras demoliti sint ; Crucem ipsam salutis nostræ augustissimum signum atque arcem de suis sedibus deturbatam , afflictamq. conculcarint ; Religionis nostræ sacrosancta Mysteria polluerint ; in Christianum sacrificium, in ipsum Christi corpus sanctissimum omnia sacrilegæ mentis, impuriq. oris maledicta congefferint, eos putemus tam immanium, tamq. atrocium criminum impunitatē diutius fuisse habituros ?

Illi

Illi vero eas pœnas dant, quæ sunt eorum sceleri maximæ debitæ, hoc est furoris atque amentię. quibus sacrilegos homines præcipites agi; & ad iusta debitæq. supplicia rapi sinamus; nosq. ad ea, quæ sunt hodiernæ lætitiæ, ac celebritatis, hoc est ad maiorum nostrorum beatissimorum hominum, quorum tam eximia in Christianam rempublicam extant merita, memoriam grato animo, ac debitis laudibus recolendam accedamus. Quorum maxima pars pro christiana religione acerbissima supplicia fortissime subiit, pars Christianam veritatem hæreticorum oppugnationibus omnibus fere temporibus tētatam nūquam tamen euerfam aut labefactatam præclarissimis ingenij doctrinæq. monumentis stabiliuit, pars uero singularis iustitiæ eximiæq. continentię, ac ceterarum virtutū laudibus supra hominum captum floruit. Quos ego Iuli Maxime, si verbis meis pro dignitate non satis ornaro, nihil est, quod meam aut ingenij tenuitatem, aut orationis inopiam excusem, cum clarissimorum, beatorumq. hominū Diuina virtus humani ingenij vim magnitudine sua tantum exuperet, vt nemo sit tantis naturæ, atque industriæ præsiidiis instructus, qui tantarum rerum gestarum gloriam, tanta tamq. innumerabilia, ac supra humanam facultatem, & consuetudinem omnium virtutum edita exempla non modo oratione se consequi speret, sed admiratione omnino valeat æquare. Illud igitur in hoc mihi apud te Iuli Maxime, atque in augustissimo hoc totius orbis terrarum sanctissimoq. loco dicendi imposito munere iure lætandum esse video, quod de eorum virorum laudibus mihi est dicendum, in quibus si defecero, non tam copiam mihi, aut ingenium defuisse, quàm rei magnitudine oratoriam facultatem superari sit existimandum; neque tam imbecillitas mea sit vituperanda, quàm communis humani ingenii exiguitas agnoscenda. Sed antequam de sanctissimis viris dicere incipio, pauca mihi de
Christia.

Christianæ reipublicæ dignitate necessario sunt dicenda. quam rem in veterum more positam fuisse animaduertimus. neque enim laudes clarorum viroꝝ, quorum in republica gerenda virtus, & industria excelluissent, umquam fere orationibus suis persequi aggrediebantur, quin dignitatem quoque reipublicæ, in qua illi essent cum laude versati, simul complecterentur; magnum inde videlicet cumulum hominum gloriæ, quos laudandos susceperant, accessurum arbitantes, si docuissent, eam illos gestisse rempublicam, a cuius eximia dignitate non minorem ipsorum memoria acciperet splendorem, quàm quanta ipsi præclaris virtutibus suis, atque egregiis facinoribus illi tribuissent ornamenta. Qui mos eo magis nobis seruandus est, quod rempublicam omnium, quæ vniquam fuerunt, optimam & præstantissimam habemus. Quæ res facile apparebit in singulas res, quibus hominum cõmunitates commendantur intuëti. Ego enim sic statuo in rerum publicarum, atque in omni humanæ societatis dignitate ponderanda, quattuor in primis spectari oportere; primum finem, quem propositum habet, tum initia & conditorem, tertio loco leges, & instituta, quibus temperata est, ad extremum incrementa rerumq. gestarum gloriam, & magnitudinem. Quas res si quis secum singulas reputare uoluerit, facile intelliget, Christianam Ecclesiam ceteris omnibus Ciuitatibus, atque hominum communitatibus, quæcumque omnibus ætatibus fuerint, dignitate infinito quodam interuallo antecire. Atque ut finem primum consideremus, qui in rebus gerendis principium est, cuiusq. vis in omnia quæcumque in hominũ actionem cadunt, ita fluit, ut ab eo res speciem accipiãt, planeq. conformentur; quis negauerit Christianam rem publicam altissimum dignitatis gradum obtinere? Nam cum ceteræ omnes reipublicæ, & societates ad humanum aliquod bonum referantur, huiusq. uitæ angustissimis spa-

tiis terminentur, longe altiora spectat Christiana professio. Cælestem enim Patriam, vitamq. illam immortalē, & æternam cum Deo ipso degendam propositū habet. ut quantum cælum terris, cumulatissimāq. illa bonorum detractis malis omnibus complexio, perfectāq. beatitudo humilibus his, & terrestribus rebus præstat, tantum Christianæ religioni, ex qua vna ad tam beatæ vitæ statū hominibus gradus sit, reliquæ humanæ societates fluxi, & caduci boni causā constitutæ concedant. quod beneficium cum per se illud est, quo nullum a Deo immortalē aut habere, aut expetere homines possint maius, tum alio prope non minore cumulatur. Neque enim ad summam, & sempiternam beatitudinem iter tantummodo nobis communiuit Christiana religio, sed ex horribilibus mortis, atque orci faucibus nos extraxit, atque eo ex loco, quo nullus in miserijs esse possit inferior. ut in eadem religione & beatitudinis, & salutis firmissima sint collocata præsidia. quæ res nobis silentio nullo modo est prætereunda, dabisq. veniam Iuli, si in salutis humanæ ratione explicanda paullo longior fortasse videbor, atque in hoc loco, quo nullus tota in Theologia vberior est aut ornator, paullo diutius immorabor. ex eo enim Christianæ Ecclesiæ dignitas in primis elucebit, quæ tam infinita beneficia: tamq. immensa bona mortalibus attulerit. Premebatur igitur teterrimo seruitutis iugo humanū genus, cælestiq. Patria extorre in luctu & in squalore iacebat primorum parentum inconsulta temeritate in tam miserabilem statum preceps datum. Nam Dei immortalis similis homo creatus, Diuināq. imagine in illius forma expressa, ac iustitia in naturam insita, omnium præterea creaturarum rerum moderator, ac Dominus; ad hoc æternæ beatitudinis particeps factus placidum, ac tranquillum, beatissimūq. vitæ cursum initio agebat nullis aut animi perturbationibus agitatus; aut corporis mor-

bis

bis obnoxius, aut externis molestijs infestus; sed contra omni voluptatum, ac iucunditatum genere circumfluens, admirabili rerum scientia, & cognitione præditus; omnium denique bonorum complexione cumulatus; ad extremum interitus quoque expers. Ceterum cum ille cæbræ consortis mulieris astu insidiatoris serpentis circumuentæ Adamum in tam irrevocabilem casum præcipitem egissent, ut Divini imperij præscriptum negligeret, interdictæque arboris pomis vesci non dubitaret, continuo iustitiæ ordine perturbato, ac vinculo, quo omnia inter se apta erant, perfracto miserabilis omnium rerum conuersio facta est homoque ex altissimo dignitatis gradu ad infima præcipitatus. Obedientiæ enim, quam creatori Deo debebat perrupta usu ipse imperij in ceteras sibi subiunctas res iure priuatus est. Ac primum cælestis Patriæ aditu (quod miseriarum caput est) perpetuo est exclusus. Deinde sensuum vires animique per motiones rationis imperio natura subiunctæ rebelles, ac contumaces factæ omnia vincula perfregerunt, bellumque intestinum excitantes rationem contra constrictam tenere cœperunt. Indomitæ igitur cupiditatibus mortalium genus rapiendum, ac lacerandum innumerisque angorum morsibus perpetuo conficiendum relictum erat. Ad hoc cæli iniurijs, & multiplici morborum, ac contagionum generi, immaniumque bellarum sævitia expositum manebat. Nec a cælestibus modo sedibus homines procul amandati sunt; sed ex loco omnibus amœnitatibus refertissimo, in quo illos collocauerat Deus, exturbati omnibus ornamentis spoliati; omni ope nudati; omni præsidio deserti; omni solatio destituti; quin etiam terra, & ipsa rebelli facta alimenta subtrahente, omnium rerum inopia laborantes inter omnia inimica, atque infesta semipiternæ morti, ac perpetuorum hostium seruituti obnoxiam ætatem agebant; nullumque erat a tantis calamitatibus in vlla condita

re per fugium, cum præsertim ad labem humanæ naturæ totiq. posteritati conceptam delendam nihil esse præsidij in veteribus sacrificijs, aut in Mosaicæ legis obseruatione vsu compertum esset. Quare fiebat, vt in comparatione cum ceteris animantibus maxime omniû miserabilis esset humana conditio. Quid enim proderat animam præ ceteris rationis, & intelligentiæ participem accepisse, cum a Dei immortalis conditoris sui cognitione, quæ res est huic ipsi intelligentiæ in primis proposita, altissimis ignorantæ tenebris prohiberetur? Cum præsertim Philosophorum somnia ad hanc explicatam Dei notitiam assequendam maiores potius tenebras indies offunderent, quàm quidquam lucis afferrent. Aut quid humanam miseriam leuabat, tanto studio ad tam varias artes, quibus orbis terrarum distinguitur, & ornatur, manus, & ingenium excoluisse, cum omnia tantorum laborum, tantæque industriæ opera breuissimo æui spatio essent fruenda? aut quid imperio in belluas, ceterasq. conditas res (quæ res præcipuam hominis dignitatem dum mortalem vitam agit, continere videtur) subnixa ambulant homines, cum ipsi durissimam seruitutem hostibus suis seruirent? Animorum vero immortalitas; cælestisque natura, quo beneficio nullum maius a Deo esse potuit, an non in malum humano generi vertebat, quippe quod beatis sedibus eiectum eternis tenebris, ac supplicijs esset mancipatum? Quem statutum Deus O. M. tandem miseratus opem ferre decreuit, humanumq. genus tantis malis oppressum, atque afflictum, aliquando subleuare. Neque enim pati diutius potuit paternus illius in homines amor, infinitaque bonitas, vt quos cælestibus spiritibus prope pares, atque ad Diuinam imaginem formarat, eos sempiterno carceri cum sceleratis spiritibus, quos ob execrabilem superbiam e cælestium cœtu exterminarat, & ad æternas tenebras cruciatusq. præcipitaret, esse m̃cipatos.

Hoc

Hoc consilium haud plane celatos esse homines voluit; sed illius notitiam quandam iam inde ab initio humanis mentibus insinuavit, non illam quidem satis explicatam aut perspicuam, sed adumbratam, & obscuram, atq; vsq. eo dumtaxat, quo homines ne plane animum desponderent. Quid enim pateretur Diuina clementia homines quamuis paternæ culpæ offensione grauiter inuifos omni spe orbatos vincere? Quorum potius fiduciam vt confirmaret, non lumine tantummodo mentibus præferendo illorum spem alebat, sed sacrificijs quoq; circumcisione, reliquisq; veterum institutorum sacris, & ceremonijs tamquam certioribus pignoribus signisq. aptioribus hanc illorum expectationem voluit esse cõsignatam. Qua expectatione & spe ne homines diutius frustrarentur, cum dies aeterno consilio præstituta tandem venisset, quod se facturum tot sanctorum hominum vaticinationibus prædicarat; tamq. multis mysterijs significarat, tandem edidit. Nam filium suum in Diuino Numine secundam ordinē personam, atque ex omnibus partibus parē sibi in terras misit. qui Diuinam naturam nulla ex parte deponens humanam carnem, humana anima præditam sibi assumpsit; verusq; Deus remanens verum hominem est indutus. Neque vero paterni criminis delendi vllum fuit aliud expeditius iter. Tantam enim vim, tantamq. necessitati ea culpa habebat, vt cum ad totam pōsteritatem, vt dictum est; permanasset; in easq; penitus insedisset, nullius hominis polluto sanguine posset expiari. Neque rursus iustitiæ ratio ferebat, cum homo crimen illud ipse admisisset, pœnas illius temeritati debitas alieno supplicio lui. Deus igitur cum homine coniungendus fuit admirabilique Diuino consilio factum est, vt duæ hæ naturæ in vnā personam conuenirent, cuius duplex vis, & quod humanæ imbecillitati deerat, Diuina virtute supplendo, & quod ab homine ipso iustitia repetebat, humano mi-

nisterio persoluendo munus hoc perfecte, cumulateque sustineret. quæ coniunctio spiritus sancti tertiæ in Diuino numine personæ virtute facta est. Cuius influens vis in virginali Mariæ alio Diuinam personam humanæ Naturæ ex eius sanguine nulla humani seminis admistione conceptæ copulauit, veraque unitate utramque inter se coniunxit. Deus igitur homo factus supplicio, quod grauissimum pertulit, poenas humano generi debitas persoluit, retra seruitute homines liberauit; aditum ad cælestem Patriam ad illum diem obstructum patefecit, iter ad beatitudinem communiuit; Christianamque Ecclesiam fundauit. Igitur (quæ altera fuerat Rerum publicarum commendatio) Dei ipsius filius Patri numine, potestate, æternitate, reliquisque ex omnibus partibus par Christianæ Ecclesiæ auctor, & institutor fuit. Quod si in dignitate rerum publicarum æstimanda tantum in auctore ponebat antiquitas, ut originem suam atque primordia ad commentitium aliquem Deum vnaquæque fere paullo illustrior Ciuitas referret, quod ex auctoris dignitate aliquid in posteros cõmendationis permanere arbitraretur, quæ gens in pari huius rei cum Christianæ ecclesiæ commendatione uersetur, quæ Christi hominis uerique Dei sanguine sit fundata? Sed (quod deinceps in rerum dignitate perpedenda sequebatur) non minorem splendorem Christianæ Ecclesiæ conciliauit legum, & institutorum præstâtia. In qua re tantum ceteris gentibus antecellimus, quantum ceteris Legûlatoribus præferendus est Legislator noster Deus. Ceteræ enim leges id fere uitij omnes habent, ut in exterioribus hominum actionibus regendis, & moderandis totæ fere sint occupatæ; de interioribus vero partibus formandis (quod Legumlatorum præcipuum munus est) non ualde sane laborent. Ita fit, ut appetendi, irascendi quæ vires nullis præceptis aut institutis assuefactæ liberæ suique arbitrij relinquuntur. quæ cum natura ue-

hemen-

hementissimos impetus habeant, actiones ab illis extra manantes nullo possunt legum præscripto coerceri, nullisq; præceptorum frenis constringi, sed libidinum, & cupiditatum ardentissimis æstibus inflammata omnia vincula perrumpunt. qua re fit, vt talibus legibus ducibus homines neque iustitiam aut vllam omnino virtutem colere; neque pacem, & concordiam (quam rem leges in primis spectare videntur) inter se possint tueri. At Christianæ legis uis in interiore homine formando in primis exprimitur. Quo fit, vt pijs moribus mens imbuta sanctisq; habitibus plane conformata nullis interioribus per motionibus extra officij fines prouehatur. Talibus institutis Christiani homines ad omne virtutis genus formati ij extitere, vt illorum fortitudo, continentia, iustitia; innocentia, mansuetudo, animi magnitudo, rerum humanarum contemptus illis ipsis acerrimis Ecclesiæ oppugnantoribus admirationi fuerint, quippe qui maioribus nostris vitæ ab omni cupiditate disunctæ, ab omniq; vitiorum labe puræ, atque integræ, ac cum omni officij religione coniunctæ amplissima sæpe, ac clarissima dederint testimonia, clarissimisq; verbis confessi sint futurum fuisse, vt optime cum humano genere ageretur, si omnes homines instituto Christianorum viuerent. qua laude, quam ab ipsis hostibus nostris veritas sæpe expressit, nihil esse potest firmitus ad morum, & institutorum Christianorum sanctitatem comprobendam; omnibusq; gentibus præferendam. Atque ego nunc Iuli Maxime de Christiana lege, vt certa præcepta habet, quemadmodum ceteræ leges, quibus homines ad iustitiam, fidem, pacem, concordiam, ceterasq; virtutes diriguntur, ita adhuc loquor. illa quæ in ea longe sunt præstantiora; quæq; nullam cū ceteris legibus similitudinē, aut comparisonem habent, & quæ neque vllis præceptis continentur, neque vllis sunt tabulis, aut scriptis consignata in præsentia omitto

Vera

Vera enim ac præcipua Christiana lex est Diuini spiritus gratia, quæ fidei virtute in hominum mentes influit, cuius beneficio cum Deo arctissimo necessitudinis vinculo coniungimur: Diuinitatisque participes plane efficimur. Verum ego hæc, vt dixi, tamquam ceteris gentibus ad percipiendum obscuriora in præsentia omitto. Extrema fuerat rerum gestarum magnitudo, & gloria. In qua re qui populus, quæ ciuitas, quod Regnum, quod denique Imperium Christianæ Ecclesiæ non longe primas tribuet, quæ totum fere orbem terrarum, cunctos Reges, ac populos, ipsum denique Romanum Imperium circiter trecentorum annorum spatio Ditioni suæ subiunxerit, sineque Romanos supergressa in longe remotissimas Regionēs se superfuderit; atque in extremam Indiam, Actiopiā, septemtrionalem plagam penetrarit, ac non modo ceteri Reges, ac populi, sed Romani ipsi rerum Domini Imperatores humi abiecti Christianorum Pontificum pedes demississime sint osculati? Qua victoria vt nihil est ad gloriā insignius, ita maiorem prope, quàm ipsa victoria admirationem habet vincendi ratio. Quod facile apparebit, si quis ad ea, quæ dicturus sum, mentem, & cogitationem conuerterit. Nam cum multæ sint viæ homines in nostrā sententiam traducendi, vel etiam si verbis nostris fidem non habeant; neque ijs assentiantur, ad nostram tamen voluntatem adiungendi, vt etiam quæ minus probent sequantur tamen, non modo nullam earum præci illi Heroes, quos Christus ad cælestem hanc legem toto orbe terrarum disseminandam legauit, institerunt, sed contrarias plane rationes, ab hominumque sensu, & natura abhorrentes, ab omni que intelligentiæ vi remotas ingressi sunt, ijsque rebus omnes gentes, & nationes, quas adierunt, ad nomina in Christianam religionem, & militiam danda adduxerunt, quæ eas debuerant ab illa longe detertere. Principio cum ad assensum verbis nostris præbendum homines

mines aut ratione compellantur, aut auctoritate mouean-
tur, Deus immortalis, quam absurda, quam rationi repu-
gnantia auctores nostri docere videbantur. Quid enim ab-
surdus, quid ab omni sensu intelligentiæque vi magis ab-
horrens videri poterat, quàm Deum hominem factum?
eumque vnum esse humano generi salutis auctorem, &
largitorem; præterea neminem, qui ipse se a cruciatibus,
supplicijs, interitu seruare non potuisset? Beatitudinis spēs
in egestate, miserijs, erumnis vexationibus, turpissimo
mortis genere positam esse? cum tamen nihil horum ra-
tione planum facerent. Auctoritas vero, quæ esse pote-
rat in ijs viris, qui obscuro loco orti, nullis opibus fulti,
nulla doctrina commendati, nulla eloquentia instructi;
quosque nemo testis recipiebat, sed omnes respuebant,
aspernabantur, oderant, quique summis infimis inuisi, &
despecti, a Magistratibus tamquam malefici exagitati &
supplicijs affecti, errantes, & profugi in luctu, & squalo-
re totum orbem terrarum peruagabantur? ijs ne homini-
bus, ac tam absurda prædicatibus homines assentirentur?
aut eorum orationem non modo animis sed auribus ad-
mitterent? Iam vero ea circumspeciamus, quæ & si assen-
sum ab intelligentiæ vi non exprimunt, homines tamen,
vt ea quæ minus probent, sequantur, inducunt. hoc autē
pluribus de causis faciunt, vel ui adaçti, vel metu mali
subacti, vel ingentium præmiorum spe induçti, vel opum,
aut honorum, aut imperij ostentatione impulsæ, vel volup-
tatum illecebris attracti. Hæc fere sunt, quæ homines in-
ducere solent, vt ea, a quibus ratio illos reuocat, se-
quantur tamen, alicuique disciplinæ, quam minus pro-
bent, sese applicent. At in Christiana lege suscipienda
totum contra fuit. Nam quam tandem vim asferre;
quamue sui formidinem iniicere cunctis gentibus, ac
nationibus, ipsi denique Romano Imperio possent homi-
nes nullis opibus muniti, nulla potentia subnixi, nullis
cogna-

cognitionibus circumsepti, nullis nervis firmi, nullis præ-
 fidijs fulti, sed contra omnium hominum contumelijs, &
 iniurijs expositi, & obnoxij? aut quas opes, quos hono-
 res, quæ Regna ceteris largirentur homines in summa re-
 rum inopia versantes? quin contra clarissimis verbis vul-
 go prædicantes, si quis Christianam legem, ac perfectam,
 & absolutam pietatem profiteri vellet, ei ijs ceterisq. om-
 nibus rebus, quæ animum iucunditate, & sensuum volup-
 tate perfundunt, esse carendum; omnesque res illis con-
 trarias amplectendas; ac pro opibus egestatem, pro ho-
 nore contumelias, ignominiam, hominum contemptum,
 pro Regno summam animi demissionem, atque humilem
 & infimum fortunæ gradum; pro uoluptatibus labores,
 ieiunia; erumnas, verbera, cruciatus ultro appetendos;
 mortem denique ipsam alacri animo oppetendam. Quæ
 res cum ex omni sæculorum memoria numquam sint au-
 ditæ; cum ab intelligentiæ vi tam longe sint remotæ; cum
 a comuni sensu tam vehementer abhorreant, necessa-
 riam confessionem vel ab inuitis exprimunt, Diuinam
 hanc esse legem; Diuinamque occultam vim illi inesse,
 qua mentes hominum tactæ ad demissam cælo religio-
 nem accipiendam palamque profitendam, seseque pro
 illa deuotendos impellerentur. Paucis his de Ecclesiæ
 dignitate breuiter perstrictis superest Patres, vt ad claro-
 rum virorum, qui in ea floruerint laudes, quod est institu-
 tæ orationi in primis propositum, accedamus, ab ijs ini-
 tium facientes, quibus dignitatis primæ omnium consen-
 su merito tribuuntur. Nego igitur aut cum hoste valentio-
 re vllum vmquam populum contendisse, quàm Christia-
 num cum omnium florentissimo Romano Imperio; aut
 Romanos ipsos in vllam vmquam gentem atiociores ex-
 titisse, quàm in Christianum nomen. ceteros enim popu-
 los satis habebant, si victos bello Imperio suo subiunge-
 rent, ac leges accipere retractantes cogerent. Idque sum-
 mopere

mopere laborasse videntur; ut non minora in uictos mansuetudinis suæ, quàm bellicæ virtutis expromerent monumenta. At Christiani nominis numquàm victoriam, sed semper internicionem per acerbissima supplicia quasi uerunt. Age mentem nunc, & cogitationem ad Christianos homines conuertamus, ac cum animis ipsi nostris contra reputemus; quibus illi armis tantis opibus restiterint, easque ad extremum superauerint. quo & victoria appareat irabilior, & virorum, quorum memoriam celebramus, virtus sit insignior. Cruciatibus, quos maximos crudelitas edere potuit, perferendis, morti sese sponte offerendo egregià hanc victorià maiores nostri pepererunt. Quorum cruciatuum, ac suppliciorum ingens multitudo, atque acerbitas adeo fortissimorum hominum animos atrocis, horribiliq̃ue aspectu, atque perpeſſu numquam fregit, ut non modo incitatum religionis ardorem non reprimeret, sed contra studia excitaret: cum sæpenumero ipsi tortores in crudelissimo ipso munere lacerandorum hominum, ac necandorum administrando Diuino numine repente correpti sese quoque Christianos esse clamarent, quæque alteri offerebant supplicia, ea ipsi sponte subirent. Qua in re id assequebantur hostes nostri, ut pro vno Christiano, quem excruciatum necabant, complures subito excitarentur, ut in Christianorum cruore vis seminis inesse videretur, quod terræ mandatum vberimos hominum Christo nascentium fructus ferret. Itaque tam diuersa a reliquis hominibus vincendi ratio; cum ceteri hostibus interficiendis aut capiendis victoriam pariant, Christianis suis sibi supplicijs victoria constet, aper-tissimo est testimonio, neque victoriam vllam admirabiliorem vmquam fuisse, neque in fortitudinis laude vllam gentem posse ad maiorum nostrorum gloriam aspirare. Nam qui in acie discrimen vitæ subierint, multos quidem de suis hominibus complures populi proferre possunt.

R

Sed

Sed nō magnam fortitudinis laudem ea videtur res habere. Nam proelio commisso hominum mens pugnae ardore veluti a se abducta non satis habet ad se se colligendum spatij : vt periculi magnitudine animo agitata , ac metu in consilium adhibito deliberare secum possit,adeundum ne illud periculum sit , sed impetu quodam præceps fertur; neque fere quisquam est, qui non potius mortem se hosti oblatum, quàm se ipsum in acie casurum speret . Tot præterea hominum millium , quibus exercitus constat, discriminis societas veluti periculi partitio quædam magnam habet timoris alleuationem. mutua namque ope sese tutos confidentes aduersum a se casum vnusquisque spe propulsat , & ad socium delegat. cumq. certe in tanta multitudine e cæde cōplures elabi necesse sit , nemo fere est, qui non ex ijs sese fore confidat . Quo fit, vt ex ea re; quæ certam mortem non ostendat, mortis contemptus in hominibus colligi nō possit. si quidem multos videmus nullum in acie timoris signum dedisse, quos si ad tribunal constitutas , illisque haud dubiam mortem denunties, abiecto animo repente concidere. Qui vero ad tormenta; & ad certam mortem constanti , intrepidoque animo rapitur; quem nullæ tortoris, aut carnificis formidines labefaciunt; qui cum nulla vitandi supplicij spes ostenditur, propositi tamen retinens est, hunc dicere possis veram fortitudinis laudē assecutum. At eiusmodi homines tres, aut quattuor apud singulos populos vix possis nominare, cum de Christianis plus decies centena millia proferantur, quos tormentorum horribilis aspectus, atque perpessio nihil commoueret; qui extremi supplicij certissima, atque ante oculos posita exspectatione non deficerent, qui aculei, qui ferræ, qui candentium luminarum atrocissima specie non debilitarentur, sed omnes terrores, omnes acerbitates, omnes cruciatuum faces, omnes dolorum morsus virtute prosternerent. Neque vero tantæ virtutis admiratio

admiratio solis viris, ijsque confirmatæ iam ætatis terminatur, quibus ad tormenta perferenda quamquam humanæ fortitudinis vim accerbitate sua longe superabant, aliquid tamen opis in ætatis, & sexus robore fuisse suspicemur, sed fœminæ quoque & imbecilli pueri in præclaro hoc agone sancta æmulatione pariæ fortitudinis laude cum viris certarunt; cum non modo eadem omnia tormenta, quæ viros subiisse rettulimus, teneræ virgines in corporibus suis constantissime sint perpeßæ, verum etiam (quod pene fidem habere non videtur) matres ipsæ natos suos atrocissimis cruciatibus lacerari non modo intrepido animo inspecerent, sed eos etiam vltro hortarentur, ne animo deficerent; neque tormentorum stimulis victi Christi fidem negarent, sed cruciatuû faces patienter ferrent. Quin etiam de nonnullis memoriæ proditum est, cum audissent in alia Ciuitatis parte in ceteros Christianos sæuiri, ipsæque latendo, ac dissimulando immanissimam Tyrannorum rabiem effugere possent, lætas accurrisse, paruulosque natos suos ad easdem acerbitates subeundas secum duxisse; neque aut materna indulgentia, aut miserationum ministrorum monitis ab inflammato studio abduci, aut retardari potuisse. O eximiam, ac supra hominum captum maiorum nostrorum virtutem, o nullis cum gentibus conferendam fortitudinem, verberibus ad necem cædi, interiorem virtutem non conteri; tormentorum vi, ac magnitudine vires corporis torqueri, virtutem animi non debilitari: ardentissimo igne corpus cremari, charitatis ardorem non consumi; a fera bestia corpus laniari, virtutem non distrahi; intestina auelli; a constantia, propositoque non abduci, toto corpore lacerari, animo non frangi: natorum eiulatus audire, cruciatus inspecere, maternum animum non insecti. Vt ego mihi optarem, tantarum rerum, tantæque fortitudinis gloriæ parem orationis co-

piam ac facultatem dari . Profecto illis commemo-
randis , atque extollendis nullo umquam labore aut
satietate defatigarer . si modo laus hæc tota fortitu-
dinis est existimanda , ac non maiorem in ea partem
obtinet charitas . nam & si tam multa illa adniran-
dæ virtutis exempla a fortitudine edebantur , eadem ta-
men a charitate imperabantur . Neque enim fortitudo ip-
sa suis satis viribus constare potuisset charitatis opibus de-
stituta . Quæ virtus veteribus plane ignota , ac Christiano-
rum hominum propria cum in ceteras virtutes ita influat
easque conformet , vt sine ea ne virtutis quidem perfectæ
nomen vlla earum possit obtinere , apparet tantarum lau-
dum societatem non modo cum charitate esse comuni-
candam , sed maiorem partem charitati esse tribuendam .
Sed fortium virorum in Christianâ rempublicam merita ,
quamquam infinita sunt , nullaque vel longissima oratione
satis umquam laudata , non tamen nos hoc solo studio ita
conuenit efferri , vt silentio prætereamus immortalia be-
neficia , quæ Christiana Ecclesia ab ijs viris non minora
prope accepit , qui in ea omni litterarum , & ingenij glo-
ria floruerunt . Nam vt externis vexationibus Christia-
na Ecclesia in primis exercita fuit , atque infesta , ita do-
mesticæ illius res nõ magis quietæ , ac tranquillæ fuerunt .
Neque enim vlla umquã gens magis ex intestinis discor-
dijs laborauit , quam Christiana veritas hæreticorum se-
ditionibus omnibus ætatibus iactata fuit , & exagitata .
Verum vt aduersus externos hostes Diuinus spiritus Chri-
stianam causam ingentibus fortium virorum animis ar-
mauit , qui tormentis constantissime perferendis , qui
morte fortiter oppetenda , qui sanguine profundendo
Christianæ Ecclesiæ veræ religionis testimoniũ dederũt ,
vnde est illis Martyrum ductum nomen , ita aduersus hæ-
reticorum dissidia , & oppugnationes non imbecilliori-
bus opibus Christianam veritatem communjuit . Quam-
plurimos

plurimos enim doctos homines excitauit, qui impia dogmata firmissimis rationibus refellerent, qui in Diuinarum, ceterarumque magnarum rerum scientia, & doctrina tantos progressus habuerunt, ut in eorum gloria Philosophorum nomen a Christiano splendore sit obscuratum. Nam cum sapientiæ studio summæ illius veritatis hoc est Dei immortalis cognitio sit proposita, quousque tandem tantis disputationibus, tam multis questionibus, & controuersijs, tanta denique contentione in hac inuestigatione processit Philosophorum labor, ac studium? aut ad quem scientiæ gradum in Diuinarum rerum notitia tandem peruenit? Ut enim omittam vetustiores illos, qui de Deo, ac primo rerum principio tam uaria, tamque absurda locuti sunt; tamque in ijs rebus errantes & vagas opiniones habuerunt, ut de suo unusquisque capite Deum fingere videatur; ac cum Poetis certare, plures ne illi de Dijs fabulas attulerint, an plura ipsi de Diuina Natura somnia commenti sint, cum alius Diuinum numen rerisque primordia ad ignem aut elementorum aliquod referat, alius in casu fortuitoque atomorum concursu principia rerum ponat; alius etiam (si Deo placet) discordiam Deum faciat, alius alia deliramenta loquatur, quæ singula persequi haud sane est operæ pretium, tum quod eiusmodi somnijs ac nugis risum potius hominibus commouere, quam ullam voluisse doctrinam tradere videri possint, tum quod tribus ijs libris, quos aduersus Philosophos scripsimus, satis est a nobis Philosophiæ studium exagitatam atque reprehensum. Ut igitur eos omnes omittam, Quid? Paripatetici ipsi, qui Aristotele Duce ac Magistro de naturalibus Diuinisque rebus paullo ad veritatem propensius disputarunt, quidquam magnum aut amplum de Deo ac prima rerum causa nobis, attulerunt? aut quidquam in ijs rebus stabili certaue scientia comprehenderunt? Quantis in aestuationibus Deus immortalis

immortalis, quantis in angustiis, quantis in controuersijs atque in ter se varietatibus cum ad sublimia hæc inuestigationem adiiciunt, versantur, quàm pauca, quàm parua, quàm exilia de rebus Diuinis assequuntur: eaque quàm incerta, quàm parum explicata, quàm euersu facilia tradunt. At Christianorum hominum splendida ingenia Diuino spiritu lumen præferente quàm multa, quàm magnifica de Diuino numine, de eius essentia, de sapientia, de libera voluntate, de personarum manatione ac distinctione, de rerum creatione atque primordijs, de æterna prouidentia, de animorum natura, & immortalitate, de summa beatitudine, deque alijs innumeris ac præclaris rebus sunt affecuti, earumque rerum quàm stabilem, quàm constantem, quàm perspicuam doctrinam tradiderunt; Quantis denique ex errationum tenebris Diuinarum rerum cognitionem eduxerunt: atque in apertissima veritatis luce collocarunt; vt pueri & aniculæ nostræ maiorem & perfectiorē de Diuinis rebus, eamque minus errantē, magisque explicatā notitiam habeant, quàm vlli veterum doctissimi habuerint. Neque vero tantarū rerū sola cognitione & scientia, aut nuda simpliciq. traditione contenti fuerunt maiores nostri, sed easdem litterarum monumentis ita commendarunt, vt nullum doctrinæ studium, aut maiore rerum copia, & varietate, aut subtiliore disputandi ratione; aut pluribus orationis ornamentis, maioreque verborum, & sententiarum splendore fuerit vquam tractatum. Neque enim (vt ceteros innumera- biles omittam) in Nazianzeni oratione Demosthenis sonitus aut fulgura desideramus, neque Chrysostomus nō beatissima illa copia, & vbertate, omniq. exornationū, & amplificationum genere Ciceronem nobis expressit, Romani vero Leonis Diuinæ summæque dignitatis plenæ breuitati verborum numerum sententiarum multitudine, & pondere prope superanti quem tandem de externis

ternis æquabimus ? in Augustini vero, & Thomæ celesti
ingeniorum acie, acerrimæque in disputando vi, an non
Aristotelis nomini Christiana gloria respondit? Atque in
Doctorem hominum laudibus quamquam infinitæ sunt,
tamen longiores esse non debemus, tum quod Diuinis
litterarum monumentis sine cuiusquam oratione nomen
ipsi suum immortalitati satis commendant, tum quod
temporis angustia nos cogunt aliquem tandem orationis
modum facere. Cum præsertim eorum virorum memo-
ria silentio non sit prætereunda, quos video instare, quo-
rumque infinita turba me iam dudum sentio vrgeri. ij sunt
beatissimi illi viri, qui tantis continentia, atque iustitia
laudibus floruerunt, vt in eorum virtute Christianorum
gloria ceteras omnes nationes quarumque in ijs laudibus
nomen paullo clarius extat, infinito interuallo superarit.
Nam cum continentia vis in duas sese partes fundat, vt &
a voluptatum illecebris, & ab opum cupiditate corpus,
& mentem integram serues, quæ gens Christianis homi-
nibus erit æquanda, si cogitare voluerimus pro tribus,
aut quattuor, quos vnusquisque populus proferre pos-
sit, quorum fuerit excellens in ea laude præstantia, innume-
ra apud nos hominum millia extitisse omnibus continen-
tia partibus cumulatorum? cum illud satis cõstet, cum mo-
rem pluribus sæculis viguisse, vt multo maxima homi-
num pars omni re sua in commune collata, eiusque
distributione sacerdotibus, qui Ecclesijs præerant, per-
missa in solitudinem ipsi concederent, ibique tenui vi-
ctu contenti non modo omnem ætatem ab omni cupidi-
tate disinctam, atque ab omni avaritia, & voluptatum
contagione puram, atque integram agerent, sed lege
quoque sibi ipsi, & voto earum rerum libertatem præ-
ciderent. Cumque iustitia laus, & vis in eo versetur,
vt sua vnicuique tribuamus, neque quemquam per
iniuriam lædamus, quis vtraque in re huic virtuti pro-
pior

pior fuit , quam ij viri , qui rebus ipſi ſuis ſeſe ſponte priuarint , ne dum illi aliena auferrent , quique . ab inferendis iniurijs tantum ſemper abſuerint , vt in illis potius perferendis præcipuam Chriſtianæ profeſſionis laudem conſtituerent . Ac de beatorum hominum virtutibus quamuis non ſatis pro dignitate dictum ſit , neque vero dici poſſit , tamen breuitate temporis cogimur paucis his eſſe contenti . Sequitur vt de præmijs non nihil attingamus , ac quambreuiffime videamus ſatis ne tantis laboribus , & vexationibus tantisque cruciatibus , ac ſupplicijs digna merces ſit reddita . Illa vero tanta eſt , vt non modo nulla oratione poſſit demonſtrari , ſed omnem humanæ cogitationis vim effugiat . vt prope nihil mirum ſit , maiores noſtros in laboribus exantlandis , in periculis adeundis , in terroribus non formidandis , in minis deſpiciendis , in vexationibus non recusandis , in crumnis non expauſcendis , in ſupplicijs perferendis , in morte denique contemnenda ceterorum hominum virtutem tam multis gradibus ſuperaffe , cum ex ijsdem acerbitatibus ſibi ad ea præmia gradum fieri intelligerent , quæ omnem comparationem infinito interuallo antecendant . Quid enim opes , quid potentia , quid gloria , quid Regna , quæ omnia tantis laboribus , ac ſudoribus , tam multis diſcriminibus atque periculis homines conſectantur , veri , ac ſolidi boni habent ? aut quid ad mentis tranquillitatem , atque ad hominem beatum faciendum omnino ex res valent ? ad quas ſi quis tandem peruenerit , tantas in illis tamque turbulenta moleſtiarum tempeſtates , tantosque ſolicitudinum ætus offendit , vt nihil aliud ſe tam multis curis , ac vigilijs , tantaque animi contentione quæſiſſe iutelligat , quàm vt negotij vim ſibi pararet , & quidem longe moleſtiores , quàm illa ipſa incōmoda , quæ pro ijs rebus aſſequendis ſuſceperit . De nominis vero poſt mortem memoria ſlaborare , eſt eiufmodi

modi, vt non satis queam ea in re admirari mortalium lenitatis plenam stultitiam; quos eius rei cura torqueat, qua nulla fingi possit inanior. quid enim ad hominem huius vitæ sensu omnino carentē pertinere potest, omniū sermone celebrari? aut quem oīo ex ea re sensum percipere potest is, qui de viuorum numero penitus sit sublatuſ? A tam fluxis, tam caducis, tam inanibus, tam falsis bonorum imaginibus longe non solum magnitudine, sed etiam genere differunt Christianorum præmia. Nam nullo ætatis spatio terminantur, sed sunt cum virtute infinita, tum duratione æterna. In infiniti enim illius boni, hoc est in Dei ipsius fruitione posita sunt, quæ res perpetuum humanæ mentis, ac voluntatis inotum, & agitationem infinita virtute sua tandē sistit. Nam cū in Deo Optimo Maximo perfecta sit omnium bonorum detractis malis omnibus, & infinita complexio, omniumque beatitudinum plenissimus, & infinitus cumulus, sit, ut in eius cognitione, & amore humana intelligentia ac voluntas plane acquiescant. Neque enim Diuinam essentiam per effecta, aut coniecturas, aut vero per fidem cernunt, sed apertissima visione intuentur, in qua cum bonitas infinita sit, infinitas sui in contemplatione voluntatis excitat cupiditates, mutuaque charitate homines complectens facit, vt totum ipsum Deum homines possideant, arctissimoque amoris vinculo cum illo coniungantur, atque in Deū ipsum commutentur, Diuinæque naturæ participes fiant. Sed quid ago? eā ne rem verbis demonstrare aggredior, quæ ne cogitatione quidem possit adumbrari? Quare illius declarandæ, quod fieri non potest, cogitationem ommittamus, atque ad eam assequendam, quæ res facultatem habet, totum animum conuertamus. Vna autem est ad eam perueniendi via, si maiorum nostrorum fortitudinē, continentiam, virtutem imitabimur. Cuius rei vtinam nobis, cunctisque hominibus natura nobis, & Christia-

na lege coniunctis aliquando mens detur. Quam quoniā nostris viribus suscipere non possumus, quippe quæ Diuinitus sit mittenda, quibus eam rebus a Deo O. M. imptabinus? ijs scilicet, quas ille pro sua benignitate apud se voluit valere, precibus nimirū partim nostris, partim vero Beatorum hominum, quos apud eum summum gloriæ locumobtinere non est dubitandum. Itaque sanctissimæ Animæ, a quibus me nunc vsque e cælo, quod beatissimæ incolitis, exaudiri confido, eam nobis virtutē a Deo immortali impetrate, vt immortalem uitam, æternamque beatitudinem cunctis rebus anteponentes, nullo hostiū nostrorū impetu a Diuinarum rerum amore adducamur; quamque vos quondam in Tyrannorū vexationibus, & crudelitate contemnenda, atque in carnis, & peccati impressionibus repellendis, ac prosternendis fortitudinem, & continentiam præstitistis, eandem nos cum iisdem opugnationibus tentamur, adhibeamus; Vt omnibus in rebus vestigia vestra persequentes, cum huius carceris vincula, quibus nunc constringimur, soluentur, perpetua in cælesti Patria vobiscum summæ beatitudinis societate coniungamur.

F I N I S.